



حسام مصطفى إبراهيم

كتاب التعافي

كيف تستعيد جمال العالم بداخلك وتبدأ كل شيء من جديد

كتاب التعافي

كيف تستعيد جمال العالم بداخلك وتبدأ كل شيء من جديد

حسام مصطفى إبراهيم

"نحن مستوحشون مثل أطفال ضائعين وسط الأحرار. عندما تقف أمامي وتنظر إليّ، ماذا تعرف عن الأحرار التي بداخلي؟ وماذا أعرف أنا عن أحزانك؟ وإن كان لي أن أسكب نفسي أمامك، وأنتحب، وأخبرك بكل شيء، فماذا ستعرف عني أكثر مما ستعرفه عن الجحيم عندما يخبرك أحدهم أنه حار ومريع؟ لهذا السبب وحده، علينا -نحن بني البشر- أن نقف أحداً أمام الآخر بنفس الإجلال، والتفكير، والحب الذي قد نقف به أمام بوابات الجحيم".

من رسائل كافكا إلى ملينا

إهداء

إلى زوجتي وحببتي التي جعلتني أتعافى من كل شيء.. إلا حبّها.

....

إلى أخي حازم دياب، الذي تألّق كشهاب خاطف ثم خبا كحلم، فغاب جسده
وبقيت روحه وكتابات الإنسانية وقصة حبه لهبة خميس، تُذكرنا أنه يمكن أن
تكون موهوبًا، وفي الوقت نفسه إنسانًا حقيقيًا ونبيلًا!
محبات يا صديقي النبيل، وإلى لقاء قريب عند مليك مقتدر.

...

إلى الدكتور أحمد خالد توفيق، الذي فقدت معه أبي للمرة الثانية: كلُّ يومٍ يمرّ
وأنتَ لستَ هنا، يثبتُ لي كم كنتَ فارقًا، وكم كنتُ محظوظًا أن تقاطعت طرُقنا
ذات يوم!

نَمَ هنيئًا يا حبيبي، فقد أدّيتَ ما عليك، وأثمرَ غرسُك شبابًا مثل الورد في كل
ربوع مصر والوطن العربي، سوف يُكملون ما بدأت.

حسام

أول سطر

كتاب التعافي لا بينصحك ولا يبلومك، لا يقول لك اعمل ولا ما تعملش، لكن بيقف جنبك وقت الخذلان والتخلي وانقطاع السكك وغياب السند ونزول الغشاوة على عينك واختفاء الصديق وبيع الحبيب وإدبار الدنيا عنك.

بياخذك من إيدك ويشاور لك على الحاجات اللي مش واخد بالك منها عشان لسه جوا التجربة وقلبك موجوع وعينك ضريرة وإيدك قصيرة ونفسك مقطوع.

بينور لك لُمض تشوف على هداها إيه اللي حصل، وليه، وإزاي ما نفضلش نعيد نفس اللقطة تاني ونتحط في نفس الموقف إلى ما لا نهاية!

أنا كنت لابس نفس جزمته في يوم، وواقف في نفس ركنك الضيق، وحاسس بنفس إحساسك، وضقت بيا الدنيا بما رحبت، وبفكر في كل الأفكار الغبية والشجاعة والكثيية والمتهورة اللي بتفكر فيها دلوقتي، وشايف إني اتحبست في دايرة الحزن واللا فعل للأبد، لكن.. خرجت، وخذت نفس عميق بحجم كل اللي اتخلوا عني، وشببت وطلت شعاع الشمس.

لأن غريزة الحياة جوانا أكبر من الهزيمة والمعارك الخسرانة والفرص اللي مش على مقاسنا، أكبر من الضعف والمطبات والنهايات اللي اتفرضت علينا وهي ما تليقش بينا.

إنت مش سوبر مان ولا اللي حواليك وحوش جاين الدنيا بس عشان ينغصوا عليك حياتك، ولا أنا "هو ديني" الساحر اللي هيكشف لك سر تحويل التراب لذهب، لكن إنت وهم وأنا: أحجار على رقعة شطرنج كونية ضخمة، وكتاب التعافي هيعلمك إزاي تلعب "الجيم" صح عشان ما تخسرش تاني.

كتاب التعافي.. الريموت كنترول اللي هتتحكم بيه في كل الأفلام اللي حاب تشوفها على تليفزيونك العمر اللي جاي كله.

على باب الحب

أمرٌ مخيفٌ حقًا
أن القلوب لا تُصدر صوتًا عندما تنكسر
حوادث السيارات تنتهي بانفجار
السقوط ينتهي بارتطام
حتى الكتابة؛
يخدش القلم الورقة فيحدث صريرًا
بينما تتحطم القلوب في سكون تام
وكأن لا أحد
-حتى الكون نفسه-
يمكن أن يخلق صوتًا لهذا الخراب
وكأن الصمت هو الطريقة الوحيدة
التي يمكن أن يعبر بها العالم عن خشوعه
أمام قلب يتصدع!
نيكيتا جيل – ترجمة ضي رحمي

()

الحب وصل^{١٥} وإيصال^{١٥} وحلول^{١٥} وتعبد^{١٥} وتشبيك^{١٥} وحضن^{١٥} ومناجاة^{١٥} وتعلق^{١٥} وتبتل^{١٥} وذوبان^{١٥}
وتوسد^{١٥} لذراع الحبيب ودخول^{١٥} في كامل تفاصيله، عزف^{١٥} للسلم الموسيقي على
بيانو الجسد، وتلاوة قصيدة الحياة من كتاب الروح، صلاة صوفية في ملهى ليلي،
مسكة يد ومسكة روح ونبضة قلب تُجيب نبضة قلب، إيقاع يردّ على إيقاع،
ونفس يواكب نفساً، وومضة تجاوب ومضة، نقطة عرق تتعشق في نقطة عرق
لحظة الملامسة، بركان من اللذة والتنهد والوجع والارتقاء والألم والنشوة والندم
والجشع وخوف الفراق، اندلاع، فوران، لا إرادة، لا منطق، لا معقول، لا حسابات،
لا موازنات، إحياء، إرواء، نور، برّ، رحمة، طهر، فجر، رافة، انصياح، كدح، تقوى،
مكابدة، اتحاد، شغف، تنزه، صباغة، لوعة، خشية، طيبة، تضحية، مصادفة، مودة،
وجد، وداد، ولع، إيثار، منح، جوى، هيام. إيلاف، صفا... حب.

()

الحب مش مصباح علاء الدين هيجل لك كل مشاكلك، ولا شريط ترامادول
هينقلك بره الدنيا وينسيك كل مواجعك، ولا ليلة القدر اللي اتفتحت لك وهتطلب
فيها بقى وتتمنى كل اللي كان ناقصك طول عمرك فيتحقق!

الحب مش هيغيّر فيك حاجة إنت مش عايزها تتغير، أو عامل نفسك مش واخذ
بالك منها، أو مش مستعد ليها كفاية، أو استسهلت وما عملتش الهوم وورك
بتاعها!

الحب.. لو متشعلق في قصص قديمة لسه ما انتهتتش، لو مُشوّه ومنتَهك
ومخذول وما عندكش القدرة على تحمل المسؤولية، لو ما بتعرفش تدعم الطرف
الثاني وتقف في ضهره وتقدر ظروفه، لو أناني ولعبي ومتسرّع وعشوائي، لو
جعان للعلاقات أو بتدور على تعويض أو بتجرب أو بتسلي وقت فراغك.. مش
هيبقى نور بالنسبة لك ولا علاج ولا وطن، إنما -للأسف- سلاح هتطعن بيه طرف
تاني ملوش ذنب، وهينوبك من الشر جانب طبعاً بلا أدنى شك!

الحب مشروع، أهم مشروع إنساني في الواقع، ليه بداية ونقطة وصول ومعالم
وأحداث وخارطة طريق وبروتوكولات وشفرات وليلة كبيرة سعادتك، وأي إفراط أو
تفريط في جزئية من دول، بيفرقع في وشك فوراً ويخلف ندوب ممكن يبقى
عمرها أطول من عمرك.

الحب زي الامتحان؛ محتاج مجهود وطاقة، والمفروض تروح له مذاكر ومحضر
ومستوعب ومستعد للمفاجآت وشبعان وغاسل وشك وسنانك ونايم كويس
ولابس الحثة الزفرة عشان ما تفقدش تركيزك ولا تتشتت وتعرف تنجو بالدرجات
اللي نفسك فيها وتحقق حلمك.

الحب اجتهد ومثابرة وصبر ويقين وأمل ومودة ورحمة ومداواة ووصل وإيثار وتجلّي
وتحلّي وتخلّي ومشاركة وإخلاص ومواءمة وإعزاز وتلطف وتغاضي وشغف وميل

ومصافاة وهيام وولع وغرام واحتمال ورؤيا وأناة وتبصر وتجلد وحلم وروية وصلابة وكفاح وتعقل وجنون ومواساة ومؤازرة وتحنان وتعاطف وصداقة وصدق وتفهم وإنصات واستيعاب وتمهل ورفق ومهادنة ووفاء.

الحب هو آخر آخر آخر ضمانة في هذا العالم عشان نفضل بني آدمين!

()

الحب - في جوهره- رحلة استكشافية، يخوض فيها الاثنين مجاهل النفس البشرية حرفياً، ويعرفوا -يقينا لا تخميناً- همّ مين، وهي تصرّفوا أزاى في المواقف المختلفة، وحدود رحمتهم -أو قسوتهم- ببعض إيه.

وبالتالي فردود فعل كثيرة تبقى مفاجئة وغريبة وغير متوقعة بالمرّة، وأول حد بيتفاجئ بيها هو صاحبها شخصياً، وللسبب نفسه ممكن تجربة الحب الثاني تكون أنضج من الأولى، لأننا بنبقى عرفنا شوية أسرار عن نفسنا وطرق إدارة الحب وكيفية التصرف في المواقف الصعبة.

ورغم إن مفيش كتالوج موحد ولا وصفة سحرية الناس كلها تمشي عليها عشان نوّفر على بعض وجع القلب، ففيه قواعد مهمة لازم نخطها في الاعتبار، أهمها إننا (بشر)، مش ملايكة ولا قديسين ولا أصحاب رسالات سماوية، ما يعني إن هتيجي علينا لحظات نضعف ونخاف ونكذب ونمل ونخون ونشتهي ونغير ونحقد، ومش شرط يكون ده دليل على إقلاعنا عن الحب، ولا إننا ما كناش بنحب أصلاً، ولا إن ما عادش ينفع نكون مع بعض.

لكنه في الغالب يبقى مؤشر إننا محتاجين هدنة، أو استراحة، لإعادة ترتيب الأولويات ورؤية مكاننا الحالي على الخريطة، والتأكيد على محطة الوصول.

والعلاقات اللي مشيت سلسة من أول طلعة، وما قابلتش غلطات ولا هتّات -على ندرتها- بتبقى هشة للغاية، وأي مشكلة صغيرة تتفجر في وشها وقت الجد، بتبقى مدمرة، لكن اللي اتطحنوا وعجنوا وخبزوا بعض، فرصهم في البقاء بتبقى أقوى.

وساعات من فرط الحب، وخوفنا من انتهائه، بنتغابى، ونعمل بالزبط اللازم عشان نقضي عليه، زي اللي شاف مصيدة منصوبة قدامه، ومن شدة رعبه جري عليها بدل ما يجري منها، فاتقفلت على رجله، وكسرتها!

لكن أكبر عدو للحب على الإطلاق: العشم.

إننا نعمل غلطة أو تصرّف ما وإحنا متعشّمين إن الطرف الثاني هيستوعب، وهيعدّي، فنفاجأ إن رصيدنا لم يعد يسمح، وإن الحياة وقفت تماماً وتجمدت بشكل مطلق عند النقطة دي، وكل استجابتنا ومحاولاتنا لعمل كنترول زد والرجوع للحظة السابقة عليها، باءت بالفشل، وما يبقاش فاضل غير إننا نطلع

المحفظة ونحاسب على كل المشاريب، اللي طلبناها واللي طلبها غيرنا!
عشان كده، تبقى أهم حاجة في العلاقة على الإطلاق: الرحمة.

رحمة المحب بحبيبه، وقدرته على تفهم **أخطائه** ومسامحته ومنحه فرصة ثانية،
والشفقة على حاله واستخسار العمر اللي فات والعمر اللي جاي وهم مش
بعض، لو مفيش إحساس الاستخسار ده، هتبقى العلاقة مجرد استجابة آنية
لشخص قال لنا كلام لطيف، لكن مش حب، مش مودة ورحمة، مش توحد مع
شخص في سبيل الوصول لهدف مشترك.

الموجع.. رغم إن الحب هو المرادف الأرضي لكلمة جنّة، ومن لم يدخل جنّة
الأرض لم يدخل جنّة السماء، فلو ما كانش ناضج كفاية وواعي ورحيم، بيبقى
بوابة التيه الأبدية، واللي بيدخلها ما بيخرجش منها سوي ثاني أبدا!

()

البياعين عندهم مصطلح مشهور اسمه زبون (طيّاري). يعني اللي بيبقى معدي
بالصدفة فبيشتري منه مرة واحدة ومش هيشوفه ثاني، فبيدي له أسوأ بضاعة،
من فوق بتبرق ومن تحت زبالة حرفيا، لأنه مش فارق معاه وما بيمثلوش عامل
تغذية مستدامة.

أما الزبون الدائم فليه معاملة خاصة **ومختلفة** تليق بقدرته على أخذ حقه
وبستفة البيع لو حس إن المعاملة مش تمام.

وده نفس اللي بيحصل في العلاقات بالطبط!

فيه ناس بتعتبرك حبيب طياري، واخدين قرار إنك مش مكمل في حياتهم، إنت
بتاع وقتك ومرحتك هتنفذ غاية في دماغهم وهتتكلم على الله، فبيقضوا معاك
وقت لطيف بدون مستقبل، ممكن يزعلك عادي ويهينك عادي ويجي عليك
ويخذلك ويعرضك لكل صنوف الإساءة الممكنة بضمير مستريح.

أما لو إنت فارق معاه، وبيخطط لمستقبله وياك فعلا، فالمعاملة هتختلف ١٨٠
درجة!

وإحنا بنبقى عارفين على فكرة إذا كنا طياري في حياتهم ولا لأ، بس بنختار
نتجاهل ده.. يمكن!

بنختار نتعلق بحبال دايبة، ونلتمس أعذار مش موجودة، لأن حياتنا فارغة
وموحشة ومحتاجين نحب ونتحب، محتاجين صدى لصوتنا اللي اتنبح من كتر
الندا على اللي سابونا لوحدها ومشيو!

لكن الدرس اللي هتتعلمه بتمن غالي قوي في النهاية: إن القلب مش بعزقة!
القلب مش بعزقة يا شقيق.

()

مفيش كتالوج للمشاعر الإنسانية، ولا قاعدة واحدة تنطبق على جميع البشر. والحب تجربة شديدة الذاتية والخصوصية، وحتى لو تشابهت الخطوط العريضة للحكايات هتفضل فيه تفاصيل لا يدركها إلا من يكابدها، فما تستوردش خبرات حد ولا تحاول تطبق ظروفه عليك.

لكن -بصفة عامة- عشان تعرف إذا كنت ماشي صح ولا غلط، شوف إنت مبسوط في العلاقة دي ولا لأ. إحنا بنحب عشان نبسط ونفرح ونتكامل، بنحب عشان رؤيتنا ل بكره تتسع وإحساسنا بالجمال يزيد وثقتنا في نفسنا ترتفع، فلو العلاقة بتخضم من رصيد أي مُعامل من دول، يبقى فيه حاجة غلط، ولازم وقفة.

ومش شرط عشان بدأت تكمل لمجرد الإكمال، لما تنفصل بعد ٢٠٪ من المشوار أفضل من لو انفصلت بعد ٩٠٪. قلبك مش معمل كيميا، تركب ده على ده يمكن يطلع شغال!

قلبك سلاحك الوحيد في معركة الحياة غير العادلة، وليه طاقة شحن زيه زي أي مُعدّة، فما تخسروش بدري، أو تديه للي بيسحب من الباور بتاعته، عشان تفضل قادر تحس، وعشان تفضل قادر تبقى بني آدم.

()

أسوأ ما في كلمات الحب، إنه بعد انتهاء العلاقة بتبقى أكثر حاجة هتجننك: هو الكلام ده كان حقيقي فعلا وقتها والحال اتبدّل، ولا كان كذب وشربته؟!

الكلام اللي سهرت الليل تفكر فيه، وكتبت بعضه على نوتس الموبايل بالساعة والتاريخ عشان ما تنساهوش تحت أي ظرف، وحكيت لصحابك عنه، ورددته بالساعات بينك وبين نفسك وإنت بتتنهد ومآمن للي جاي على الآخر!!

إذا كان كذب، ازاي كان واصل ولا مس ومخترق وبيطبطب كده؟!

وإذا كان حقيقي، فازاي انتهى النهاية الباردة دي؟!

الكلمات، عمرها أطول من اللي قايلها، فلو مش ناويين تكملوا، ما تتكلموش أرجوكم، ما تزودوش الأسلحة اللي بتطعننا بعد ما بتمشوا، ولا الأشباح اللي بتعشش في دماغنا وتنغص علينا كل ثانية بعدكم، ولا الساعات اللي بنقع فيها تحت رحمة أسئلة ملهاش إجابات..

وإذا أحببتم -يوما- فأحسنوا الذبح!

()

فيه نوع من البشر، لأنه مُهتم جدا، ويحبّ بكل ذرة في قلبه، وبيأخذ آلام الآخرين على صدره بلا دعوة من أحد، ومستعد -حقيقي- يبذل دون مقابل لآخر

نقطة -لسبب ما- ما يجذبش غير الأشخاص المتنمرين والمؤذيين ومصاصي الطاقة، وبيتورط معاهم في علاقات مريضة جدّا ومجحفة ليه على كل المستويات؛ كل ما يزداد في العطاء يزدادوا في القسوة عليه واستغلاله، كل ما يفتح مساحات للتلاقي، يفرّعوا 100 وسيلة للفرقة.

ومشكلته الأساسية إنه ما بيقاش مصدّق إن الطرف الثاني وحش كده فعلا، وبيدّمه بالبطيء، فيفضل يبص حواليه بحثا عن أي تفسير للي بيحصل، غير إنه يحمله المسؤولية الكاملة ويقتنع إنه أساء الاختيار زي كل مرة، أو بيتصوّر إنه أقل من الطرف الثاني وكونه فاز بيه فدي نعمة تستوجب الشكر وتحمل أي شيء للحفاظ عليها!

لكن طال الوقت أم قصر هتيجي لحظة يلاقي نفسه -حرفيا- في الطلّ: اذّي اللي اداه، ورصيده حفنة من الوجع، أخلص وتغاني، وآخرته كانت مما يليق بالسفاحين وقتالين القتلى!

والكلاسيكيات بتقول إن القفلة دايما بتيجي من عند المتنمّر، اللي قضى وطره خلاص وشيع استغلال وملّ، وآن الألوان ينقل العطا على ضحية ثانية، فيحط كلمة النهاية بأكبر قدر ممكن من الوحشية والجبروت، كأنّ مش هالين عليه يسبب فيك ذرة سليمة، أو حاجة حلوة تفتكرها، ومحتاج يتطمّن إن مش هتقوم لك قومة بعده!

ولو الشخص/الضحية -في لحظة تنوير- أدرك قدرته الفطرية على تدوير الآلام، وإعادة إنتاجها على هيئة دوافع للإفلات من المحنة وتذوق الحياة اللي بجد ورسم خريطة طريق على مقاسه، هيقف على رجليه في يوم من الأيام، ويشوف نفسه -على ضوء المحنة- بمنظور جديد يستحقه.

لكن لو ما اتعلّمش الدرس، وفضل يستنسخ التجربة نفسها مع أشخاص آخرين، فهيعيش مستباح للأبد، باب خراب، ممسحة كل من هب ودب يمسح رجليه فيها ويرميها ورا ظهره في النهاية!

أنا عارف طبعاّ إن التغيير صعب، والتعافي من إدمان العلاقات مش سهل، والتعود أشد تأثيرا من الحب، بس فعليا كل واحد عنده فرصة للاختيار، وتعديل مساراته، والبدء من جديد في أي نقطة من عمره -أيا كان اللي هيخسره!- وجزء كبير من التعافي في تقبلنا لفسنا ولأخطائنا وسقطاتنا وضعفنا وحبنا ليها وإيماننا إننا نستحق الأفضل، لكن الاستمرار في تلقي الأذى وتبريره -وأحيانا الاستمتاع بيه لا شعوريا!- مش هيوديك في أي حنة. وأكيد أكيد أكيد -3 أكيد- فيه مخرج في حنة ما، يمكن لما تركّز تشوفه، لما تبذل بعض الجهد بنية صادقة توصل له، لما تطلب مساعدة من متخصص أو حد تثق فيه ينور لك اللي كان غايب عنك.

بس لازم الأول تدرك حجم الخراب الحادث في روحك، حجم الظلم اللي بتظلمه

لعمرك، حجم الفرص اللي بتفوّتها على نفسك، وتأخذ القرار، وتتعب شوية معلىش عشان تنقّذه، لأنك لما تدخل في علاقة سوية ومتكافئة بعد كده، وتشوف النعيم اللي ممكن تعيشه، والفرج والبراح اللي هيتضاف لرصيدك، والمحبة اللي ممكن تقابل بيها العالم، هتزعج من نفسك قوي قوي على اللي عملته فيها زمان، وهتندم إنك ما قدرتش نفسك حق قدرها من بدري!

()

ليه بنخاف من الحب؟
لأن ليه فاتورة، وغالبًا مش بسيطة، والبشر أغلبهم بيميل للأخذ دون محاسبة على المشاريب.
كمان نسبة الخداع وعدم اليقين والخذلان والتخلي بقت مروّعة في العلاقات، فالناس بتكشّ، لأنها على شعرة ومش ناقصة!
وضيف لده: عدم النضج العاطفي. يعني الناس عايزة تحب بس مش عارفة يعني إيه حب، أو عارفة عنه إنه تسبيل ومسكة إيد وورد وعشا رومانسي لكن ما تعرفش إن ليه جانب ثاني، اسمه المسؤولية والتحمل والتضحية والإيثار والكفاح والتغاضي ليدوم الوداد!
فبعد ما حلاوة البدايات تخلص، ونيجي للجد، بيتخضّوا، ويبلّغوا فرار!
الحب شعلة، لو عرفنا ازاى نمسكها صح هتنور لنا الطريق، ولو ما عرفناش، هتتحرق أرواحنا للأبد!

()

الانبطاح في العلاقة مع الآخر وفرط تدليله وكشف كل أوراقك قصاده بدعوى الحب، بيوصلّ له رسائل سلبية كثيرة وعكس مرادك طول الوقت، زي إنك ما تقدرش تستغنى عنه.. فيترجمها بإمكانية الإساءة ليك دون توقع رد منك أو معاتبة!
وإنه بقى مصدر سعادتك الوحيد.. فيتمنّع عليك ويقرب ويبعد دون منطق، عشان يساومك على أوقات البهجة!
وإنك بتثق فيه.. فيلعب بديله دون انتظار عقاب أو تخيل وجود محاسبة!
وإن الحفاظ عليه في قلبك مسألة حياة أو موت، فيكفّ عن العطاء ويكتفي بالسلب فقط!
وإنك مؤمن بيه.. فيتصرف بعجرفة وياخذ القرارات دون تبريرها أو مراعاة مصلحتك فيها، أو حتى وضعك في الصورة وشرح الأمور ليك.
وإنك اختزلت كل العالم فيه.. فيطاوع فيك العزّال والكارهين والمأجورين، ويقدم

مصلحة كل الناس عليك!

وإنك عايش عشانه بس.. فينسي إنك بشر، ليك سلبياتك وإيجابياتك، ويحبسك في إطار حديد من التصورات والتوقعات الخاصة بيه هو، ولو اتصرفت عكس تخيلته، أو ارتكبت نفس الأخطاء اللي هو بيرتكبها عادي، يتجنن ويثور ويقول إنك اتغيرت، وما يغفرلكش ولا يسامحك أبدا!

وبعد شوية نزف والكثير جدا من "لا مش ممكن، هو أكيد بيحبني، بس أنا اللي فاهم غلط"، و"أكيد عنده ظروف" و"أكيد عمري ما ههون عليه"، بيتحوّل الأمر – بوضوح- لواحد بيدّي بس، والثاني بياخد بس، واحد بيراعي ويصون ويتحرّى ويحسّس على كلمة خوف الزل، والثاني قطر مندفع نحو رغباته بلا محطة وصول، واحد بيقيم بساتين للبهجة والتحقق، والثاني بيحطف كل الزهور ويصطاد كل الفراشات ويضرب كل للمبات النيون بالنبلّة!

وبعد ما كانت العلاقة مُنشِط عام للدورة الدموية وفيتامين (أ) و(ب) و(د)، وما يستجدّ من فيتامينات، بتتحول لفأس بيهدم جدار روحك كل يوم، ويلتهم حبة قلبك، ويسحب رصيدك –الواهي أصلا!- من المقاومة، ويسيبك أعزل تمامًا ومخدول للأعماق أمام قُطاع الطرق ولصوص المشاعر وبلطجية الأحاسيس! بس التاريخ بيقول إيه؟

إن الواهب المعطاء حي، وإن كان ميّت دلوقتي وسجين وجعه وخذلانه وعمره اللي أراقه على عتبات مَنْ لا يستحق، والسالب الناهب ميّت، وإن كان مفعم بالحياة دلوقتي ومش حاسس بجريمته وبيخطط لارتكاب المزيد، لأن الواهب عاش فعلا واختبر وعاین واقترّب وتعشّم ورأى وطالع بعين الله، بعين الحب، فيما السالب كان بيأدّي ويمثل ويبالغ من غير ما يعيش بجد ويدخل الحضرة ويغشى قلبه النور الحق!

والتاريخ برضه بيقول إن الدنيا دوّارة، وسريعة القلب والتغيير حد الفجيعة، وكل اللي مرّينا بيه يُوشك إنه يرجع تاني من زاوية تانية وشكل تاني ومع بشر تانيين، فَمَنْ ظَلِمَ وتَجَبَّرَ وخَذَلَ وأَوْجَعَ وابتلى، سيّشرب من الكأس نفسها ولو بعد حين، ومن سلّم وأَنَابَ وراعى وأحسن واتقى ووقى، فإن له الرضا حتى يرضى.

()

فيه علاقات بيبقى الطرفين فيها نفسهم يرجعوا، عرفوا إن حياتهم مع بعض أيا كانت مشاكلها أهون بكثير من الفراق وإن كل واحد يحارب على جبهة لوحده. وأدركوا إن براح الفرص التانية سلم خلفي للفرار من مصير ينز وحدة ووجع وتأنيب ضمير!

لكن في اللحظة النورانية دي، فيه عفاريت كثير بتقف في سكتهم: كبرياء زائفة على خوف من تكرار الفشل على الناس هيقولوا إيه على هو اللي غلطان،

وصولا لـ "قدّر الله وما شاء فعل"!

لكن الله لا يفرض علينا شيئا، سبق علمه بنتيجة تصرفاتنا لا يعني موافقته أو دعمه للخطأ، ومحاولة التمسح بيه في كل قرار غير موفق بناخده، مش هتعفينا من مواجهة نتيجة تصرفاتنا الغلط في النهاية، ولوحدنا تماما!

مرّة صديق كان بيفضض لي، ويحط إيدي على وجيعته: "أنا مرّة عيّطت وأنا ماسك إيدها، مش لأي حاجة، غير لأنني حسيت إنني بحبّها قوي، ومش عارف أعبر عن ده غير بالدموع!"

الصديق ده ساب البنت اللي حبّها عمر كامل، لأسباب يطول شرحها، ولما خد قرار الرجوع بعد ما بقاش قادر فعلا ولا هي قادرة، كان كل شيء فات، وخسارته كانت أبدية.

ولحد النهارده بيتفرّج على الحياة مش بيعيشها. وساعات يكلمني في التليفون ويسيب الخط مفتوح ما بينا من غير ما ينطق بكلمة، لمجرد إنه كان بيحكّي لي عنها، فبقيت -بشكل أو بآخر- من ريحة الحبايب اللي ما عادش طایلهم!

فيه خسارات مهما كابرنا ونجحنا وخطّينا.. ما بتتعوّضش، ومشاعر مهما اخترنا وتحايلنا واجترأنا.. ما بتتكررش، وقصص مهما جرّبنا وغامرنا وطوّحنا إيدينا ورجليننا.. مش موجود منها غير نسخة واحدة بس، لكن لما عشناها كُنا أغبى من إننا نعرف ده، ونعض عليها بالنواجذ.

وكلنا -في مرحلة ما وحكاية ما- أغبيا!

()

الحب حلو، لما ينتهي إلى اللقاء والقرب والموّدة والرحمة والإيثار واحترام الوعود وصيانة الأمانة، ولعين لما يبقى مجرد تجربة، مرحلة، مساحة نشم نفسنا فيها قبل ما نكتم نفس الطرف الثاني!

كل الهزائم قابلة للترميم، كل الفراغات قابلة للملء، إلا ما يفعله الغدر بالقلب، وما تُملّيه الهزيمة والبغّة على حبة الروح.

فما تعشّموش حد بما لا تملكون، وما تستهونوش بطعنات تقودها يدٌ كانت حبيبة ذات يوم- إلى سويداء القلب.

()

سلامًا لمن تغاضى ليدوم الوصال، وتخلّى لتستمر المحبة.

()

الحب -(المشاعر وليس الأفعال)- مش بالزراير والله، يعني أنا مش بشوف ظروف

اللي قدّامي الأوّل مناسبة ليا من كل النواحي وهتمّثل صفقة رابحة، فأقوم
ضاغط على الزرار اللي على إيدي الشمال ده فأحبه!

أو ألاقى فيه عيبين ثلاثة ما يأكلوش عيش، فأقوم موقّف البروسسينج، وناقل
العطا على غيره!

عشان كده ممكن تلاقي واحدة بتحب حد قد أبوها، وواحد متجوز وبيحب واحدة
تانية، وواحدة مخطوبة ومتعلقة بحد تاني، ومش شرط النماذج دي تبقى بنت
وسخة على فكرة، يعني ولا ليها أنياب ودائرة على حل شعرها تخرب البيوت
الأمّنة المستقرة، لأن ده -مرة تانية- غصب عنهم، مش بإرادتهم، دي حاجة ربنا
ابتلاهم بيها.

ولو بصيتّ لملامحهم كويس هتتأكد إنهم مش من عالم تاني، بالعكس دي أختك
وزميلتك وصاحبك اللي على أول الشارع ويمكن أبوك!

آه ساعات بيبقى فيه ظلم لأطراف تانية، وفيه سياقات إنسانية لازم تتراعى،
وحسابات لازم تعمل، لكن الواقع مش دايم عادل وإنساني ومثالي، لأنه واقع.

ورفضنا للشيء لتلافي أضراره، لا يعني بالضرورة عدم وقوعه، أعتقد إننا تجاوزنا
مرحلة إننا نغمض عيننا فتختفي مشاكلنا كلها، فنضحك في انتصار وزهو، إلا لو
قررنا نكمل حياتنا كلها عميان بعد كده!

وصحيح يمكن جسديا طرّفا المحنة يقدرُوا يبعدُوا ويهربُوا، لكن قلبيا بيظلُوا أسرى
وعبيد ودروايش للمشاعر، بيتأكلُوا داخليا وهم بيتفرجُوا على الحياة مش
بيعيشوها، لحد ما يقابلُوا وجه رب كريم!

لكن فعليا ما حدش عارف ظروف حد، و(لا أحد غيري يعرف أن حذائي يؤلمني)
زي ما بيقولُوا، فنرحم الناس، وما نضبّش ونوجع ونعلّم، لأن اللي فينا -كلنا-
مكفينّا عموماً، ومفيش كلام بيغيّر، وما حدش عارف ربنا مخبي لنا إيه بكرة!

وكونك معافى في قلبك واختياراتك حتى اللحظة، لا يعني إن اختبارك انتهى،
بالعكس، ده على وشك البدء في أي لحظة دلوقتي، فخلي بالك كويس، لأن
حُكمك على غيرك دلوقتي هيكون الدرجة اللي هتاخذها في الموقف نفسه بعد
شوية.

يعني إنت اللي بتعلّم امتحانك بعدين.. بس دلوقتي.

فاحذرا!

()

وإذا امتلأ الفراغ الذي تركه مجبُوبك بسواه، فتأكد أنه لم يكن يناسبه منذ البداية،
وأنك أنت الذي منحتة حجماً أكبر من حجمه!

()

لو الطرف الأول صرّح للطرف الثاني بحبه، والطرف الثاني ده ما كانش بيبادله الشعور نفسه، فغالبا هو صدّر مشاعر ما، أو أبدى استجابة معينة، أدّت الطرف الأول مبرر وعشّمته لدرجة إنه يتجاسر ويعمل كده، وهو متوقع بنسبة كبيرة إن الرد يكون في صالحه.

وارد طبعا يكون الطرف الأول موهوم لوحده، وعلى تكة، بس أغلب القصص اللي عاصرتها، كان الطرف الثاني مشارك في الإثم بطريقة أو بأخرى، بيتسلى بقى، بيجرّب، بيقضي وقت فراغه، بيعوّض اللي اتعمل فيه، مستخسر ما ينتهزش الفرصة، المهم إنه مشترك في جريمة سحل بني آدم كل ذنبه إنه حب.

فيه ناس يتفوق في المرحلة دي وتبطل لعب، وناس بتكمّل شوية، وأوسخهم اللي بيكمّل بلا وعود ولا إعطاء نفسه حتى فرصة للتفكير، يعني يكتفي ازاء كلمات الحب والوله وانسحاق المحب بابتسامة محايدة وكلام مايع ما يتمسكش، عشان وقت الجد، وبعد ما يلعب كل الألعاب، وينحت القلب اللي حبه تماما، ويسيبه على الطوب الأحمر، يرفع قدام ضميره يافطة: والنعمة ما أنا دي أؤختشي منى!

لكن، وهو بيعمل حساباته العظيمة دي، ويبخرج بلا خسائر، من وجهة نظره، بينسى إن تأخر دفع التمن لا يعني الإفلات بالبضاعة بلا مقابل، بينسى دورة الزمن وعبر التاريخ، وبينسى إن القلب اتسمى كده من سرعة التقلب والتبدل والتحول، وإنه مش ملك حد، لكنه بين أصبعين من أصابع الرحمن يقلبه كما يشاء.

إحنا في منتهى الهشاشة والله، نفسيا وجسديا، فمين بنجيب الجرأة واليقين المفرط ده وإحنا بندبح وبنهيل التراب!

وازاي بنآمن كده وبنقدر نكمّل حياتنا وجثث القلوب مرمية ورا ظهورنا!

ويا ترى لما بتترد لنا الضربة بنعرف ده ذنب مين، ولا كتر ضحايا ما بيسمحلناش نفتكر؟!

()

ويتعلّق العاشق بالمعشوق، ولو قسا وهجر وأساء، لأنه يتعالى علي اللحظة الآنية، طامعًا فيما يعقب الصفاء، يلي المكاشفة، من حلاوة الوصل، ولذة القرب، وغنج العتاب، فإذا الوقت الصعب مطيّة للمباهج، والهجر العابر سلم لوصل أكثر ديمومة.

()

أكبر حاجة تخليك تنجح في جوازك: إنك وإنت داخل دنيا تبقى مقتنع بالطلاق! بمعنى إنك تبقى عارف إن لو ما حصلش توافق، أوبشن الطلاق متاح، لأن إحنا

ملناش إلا حياة واحدة ومش هنجامل فيها الناس ولا هنصرفها بقشيش على حد!

الجواز يعني سكن ومودة ورحمة ودفا وإيلاف وسعادة ومتعة وراحة نفسية، فإن كان على النقيض من كل ده، يبقى إيه فايدته؟

صحيح القرار مش سهل، ومفيش حاجة بترجع زي الأول، وساعات فاتورته بتبقى ثقيلة جدا، لكن في أحيان كثيرة، الحياة الحقيقية -فعلا- بتبدأ بعد الطلاق. لأنك بتبقى خدت خبرة كافية تمامًا لإنك تحسن الاختيار المرة الجاية، واكتسبت قدر من المرونة يخليك أقوى وأكثر قدرة على الحكم على الأشياء.

يعني كل اللي عنده مشاكل مع مراته يتطلق؟

لا طبعاً، مفيش حياة خالية من المشاكل، ولازم تحاول مرة وألف تصلح، وتتعلم تفرّق بين الحالات العارضة والحال الدائم، لحد ما تتأكد تماماً إنك وصلت لحيطه سد. ساعتها اقعّدوا مع بعض، وبكل احترام حددوا الخطوة الجاية سوا.

التعاسة -زيّها زي السعادة- قرار.

()

رغم اختلاف أسباب فشل العلاقات عموماً، فغالبا بيبقى فيه قاسم مشترك أكبر بينها، هو بلا منازع: الغباء.

غباء الرغبة في الحياة والنوال قبل الأوان، غباء الاستسلام للظروف والخوف من بُكره.

غباء عدم اليقين والتأرجح والعشم في فرص ثانية مش هتيجي أبداً!

كل يوم الإنسان بيثبت إنه لا يستحق هبة السعادة، هو جيد فقط في الشقاء واجتلاب المحنة كمغناطيس، ولما بيلاقي تننوفة سعادة جاية له في الطريق، بيجري بالمشوار عشان يبوظ كل حاجة!

من زمان -وبشكل شخصي- فقدت إيماني بالبشر، وحُسن إدارتهم لمواردهم: القلب والعقل، وكل تجربة أقول مش هندهش، مش هتخض، لكن عبقرية الخذلان وعظمة التخلي كل مرة بتهزّني، وتخوّفني، وتفكرني بكل أشباحي وعفاريّتي، وإن كانت بتفسّر ليّ ليه الحجر والجبال والجمادات رفضوا خلافة الأرض، والإنسان اتشملل وقال أنا أشيل: لأنه غبي، وما بيعرفش يقدر إمكانياته في مواجهة الأشياء والظروف، لكن المصيبة إنه مش عارف ده، ومتصور إنه قادر يعمل كل حاجة في وقت واحد: يحب ويجرح ويسيب ويرجع ويخذل ثاني ويفارق ويلعب ويتنطط ويعرف وينكر ويرجع تالت وعاشر ومليون، وكل مرة هيبقى قادر يصلح كل حاجة، ويدير دفة الأمور لصالحه، كل مرة هيبرر ويداوي ويلعب بالتلات ورقات ويلغي الطرف الثاني ويحقق اللي هو بس شايفه، لكنه بيكتشف - بالطريقة الأصعب على الإطلاق- إنه واهم، وأهبل، وإن اللي راح مش بيرجع، ولو

رجع عمره ما يكون بنفس بهاءه الأول وعفويته.

لكن ما حدث بيتعلّم، ما حدث بيحس بوجع غيره، وكلنا لما بتجلنا لنا الفرصة بنجرح ونخون ونغزل صغيرة جديدة في سجادة الألم الكونية المهولة.. كلنا بلا استثناء.

()

هتفضل تتحمل منه حاجات كتير وصعبة وتفوق طاقة البشر، وكل اللي حواليك مستغربين من قدراتك الخارقة، وبيلوموك وهم بيضربوا كف على كف، وإنت بتبتسم في قلة حيلة، لحد ما تيجي تفصيلة تافهة وعبيطة وأقل من إنها تذكر، فتنفجر، وتهد العلاقة على راسك ورأسه، بلا لحظة تردد واحدة!

إنت مش ضعيف، لكن اتحملت أكثر مما ينبغي بالفعل، استهلكت الشمعة من الطرفين، زقيت العلاقة بالتغاضي والمعلش، لحد ما بقيتش قادر تطنّش أكثر من كده، وما تنصاعش للعلامات.

ومع إن كان ممكن تكمل -زي ما عملت قبل كده كتير- وتزوق ثاني لقدام، لكن روحك فضيت، ومغيث مصدر ، ولا حتى هو، يقدر يشحنها ثاني، والمفاضلة دلوقتي ما بقيتش بين حياة فيها حب وحياة مافيهاش، لكن بين حياة ولا حياة!

ارحموا حبايبكم من الوصول لمرحلة حرق المركب والبحر والسّمك والشط، عشان يقدروا ياخدوا أنفسهم، وينقذوا قلوبهم -على آخر لحظة- من قزمة الصقيع!

()

الصدام بيقع لما يبقى فيه طرف عايز علاقة عابرة ذات منافع معينة ومحددة سلفا بصرف النظر عن رغبات الطرف الثاني واستعداداه وملاءمة المطلوب مع خطته العامة للحياة، في الوقت اللي الطرف الثاني بيبحث عن استقرار وهوية ويمكن شكل اجتماعي معين وإشباعات محددة.

ولو الطرفين ما كانوش واضحين مع بعض من الأول بما فيه الكفاية لمعرفة خارطة طريق كل واحد ونواياه، يبقوا بيضيعوا وقتهم ويسحلوا بعض وبيخصموا من رصيد استقرارهم النفسي كتير قوي لحد ما -عاجلا أم آجلا- الورق بيتكشف، وكل واحد بيتحط قدام حقيقة الآخر ويتقع الصدمة!

وفي مستوى آخر من الغباء بعضهم بيعاند ويقرر يكمل على أمل زائف إنه هيقدر يغير وليفه، وطبعاً ده ما بيحصلش، فتقع الطعنة الثانية اللي بتدمر مزيد من رصيد السلام النفسي وتحمل الحياة لدى صاحبها!

والتجربة والتاريخ والجغرافيا كمان والله يقولوا إننا ممكن نوفر وقت كبير قوي لو حطينا ورقة على صدرنا في بدء العلاقة فيها طلباتنا بوضوح وصدق: أنا عايز حب

بلا التزام، عايزة عريس، عايز أعط، عايزة أبقي أم، عايز أصحاب، عايزة حب، عايز
أكون أسرة، عايزة أتفسح وأسهر، عايز... عايزة...
لكن -غالبا- إحنا عايشين بس عشان نكرر أخطاء الآخرين بدل المرة ألف،
ومصممين كل مرة نتصدم إنها أسفرت عن نتائج مختلفة!

()

الاحتياج بيقوّي الوهم، ويخلينا نقَلِّب في دفاترنا القديمة، ونضفي صفات مش
حقيقية على اللي فاتونا، لدرجة إننا ممكن ننسى مصائبهم، ونلبّسهم جناحات،
ونتمادى فنتصوّر إننا اللي أسأنا ليهم واتسببنا في الفراق!

()

لا دية لمن ألقى بقلبه على نصل ذابحه، ولا تعزية لمن حمل كفته بين يديه
ليسترضي قاتله!

()

معظم النار من مستصغر (العشم)!

()

مشكلتنا الحقيقية مع اللي بنسلّمهم قلوبنا إننا ما بنقدرش نشوفهم على
حقيقتهم: أشرار وأصحاب منفعة!

عشان كده جلّ وقتنا معاهم بنقضيه في محاولة التماس الأعذار ليهم، وإيجاد
أي مخرج لإساءتهم وتجبرّهم علينا وعدم معاملتنا بما نستحق أو -على الأقل-
زي ما بنعاملهم!

يمكن عشان ما نعترفش إننا بالسذاجة دي، ولا بغفلة القلب والحماقة اللي
تخلينا كل مرة ناخذ نفس الضربة، يمكن عشان ما نضطرش نغيّر شيء اتعودنا
عليه وبقي مغرور في تفاصيل حياتنا ونبدأ كل حاجة من الأول، أو نرجع تاني
لوحدتنا وغربتنا، يمكن عشان لسه عندنا أمل تحصل المعجزة ويحسّوا بينا
ويفوقوا ويلحقونا قبل ما نضيع من بين أيديهم، يمكن لأننا بنحبهم فعلا رغم
عيوبهم مش عشان مميزاتهم!

لكن في النهاية، مهما عافرنا وضحّينا وهربنا وكابرنا: طاقتنا بتخلص، وأرواحنا
بتبقى مخوّخة، وبتضيق الدنيا علينا بما رحبت، وبنلاقي نفسنا برضه واقفين
قدام السؤال الجارح نفسه: هو إحنا ليه بنعمل في نفسنا كده؟ وإذا كنا هُنا
عليهم ورخصنا في نظرهم للدرجة دي، فليه نهون على نفسنا؟!

()

عبارة الست اللي بتقول: "دا الصبر عايز صبر لوحده"، بتلخص المأزق الوجودي اللي العاشق بيجد نفسه فيه فجأة، لما تحصل بينه وبين محبوبه حاجة، ويبقى حلها الوحيد في الصبر، وانتظار ما تأتي به الأيام، فحتّى لو وافق نظريًا على الانتظار، ومن ورا قلبه، وبحكم إنه لا يملك الرفض، السؤال الملح هيبقى: هيعمل ده ازاى؟!

منين هيجيب الطاقة اللي تخلّيه يراقب تغيّر الحال، وزوال ما تعود عليه، وتحوّل النعمة لنقمة، وهو مكتوف اليد، ومش قادر يعمل أي حاجة؟! وازاي هيقدر يزق الثواني والدقائق والساعات والأيام، عشان يوصل للحظة المرتقبة، سواء هيصدر فيها حكم بالإعدام أو البراءة؟! بأي وسيلة يقدر يوقف نبضات قلبه إذا صاحت، وهفغان روحه إذا اشتعل، وتوق نفسه لسابق العهد مع المحبوب إذا تأجج؟!

ازاي هيقدر يحارب سيل الذكريات والصور والعبارات والمواقف اللي هتتسلط على حبة قلبه -مثل لهب صهر المعادن!- وتفضل طول الوقت ترسم له مشيدين، واحد ألوان وهم بيتكلموا لآخر مرة مع بعض زي عادتهم، وبيضحكوا، وينكتوا، دون معرفة بما تخبئه اللحظات التالية، والتاني أبيض وأسود، مش باين فيه غير صهر كل واحد فيهم وهو بيمشي في اتجاه معاكس للتاني!

فيما إنه واقعيًا، كل الطرق لممارسة فضيلة الصبر، بتثبت فشلها الفادح في النهاية، أو بتنجح أول يومين ثلاثة، بفعل حلاوة الروح، وبعدين تفرقع في وش صاحبها، أو تصيبه بحالة عكسية من البلادة، فتغيّر جيناته للأبد، فيصعب عليه استعادة نفسه ثانية، حتى لو تغيّر الحال لعين مطلوبه!

فلا تُطيلوا عذاب محبيكم، ساعدوهم على برّكم، وقصّروا أيام الغياب، وفرّجوا كربات انتظارهم، وسكّرات خوفهم، ولا تُقنطوهم من رحمة الله.

()

كانت هناك أيام، أستيقظ فيها من تلقاء نفسي مبكرًا جدًا، دون منبه لحوح، ولا اتصال من صديق، كنت سعيدا وأريد أن أقابل العالم، وأدردش معه قليلا ونحن نشرب شايا بالنعناع ونستمع لمزيكا رائعة، قبل أن أرتدي أفضل ما عندي وأهرع لقطف ابتسامة صباحية من جنة حُسينك!

أيامٌ مجيدةٌ كنت خلالها قادرا على فعل كل الأشياء التي أعجز عنها الآن، ومقابلة كل البشر الذين أتهرب منهم الآن، والوفاء بكل (الديد لاينز) التي ستجري ورائي -حتما- يوم القيامة!

كانت هناك أيام، كنت فيها -فعلا- أفضل، وأقوى، وأحدّ بصرا وبصيرة!

كانت هناك أيام...

كانت...

()

كثير بتكمّل في تجربة، عشان مش عارف لو خِلصتُ فعلا هتعمل إيه!
طول الوقت بتتخيّل الفراغ المرعب اللي هتبقى فيه بعدها، وعدم وجود أي خط
تاني في حياتك تمشي عليه، فتفضل واقف مكانك، ومنتبّ في الحالة، مستنّي
المعجزة، وأحيانا مش مستنّي ولا حاجة، واقف وخلص!
الانشغال -من وجهة نظرنا في الوقت ده- حتى لو بلا هدف ولا نتيجة مستقبلية،
بيبقى أحسن من الفراغ والموت التام ساعات!

()

من أرادك حقًا.. نالك.

()

اللهم لا تكل أمر قلوبنا لمن لا نهمهم، ولا تسلم مفاتيح أرواحنا لمن لا يعتبرونا
أهلا للمحبة، ولا تشعل فينا شغفا لن يروى، وعشقا لن يكتمل، وأملا لن يقف
على قدميه، وفرحا تتجاوز شهادة وفاته مع شهادة ميلاده.

()

وأعلم -أعزّك الله- أن جرح الحب إذا لم يُغلق على نظافة، بُعث مرةً أخرى على
رأس كل فجیعة، وبين يدي كل محنة، فأسال دما حسبتّه جف، وأوجع قلبا ظننتّه
تسلّى، وأحرق مهجة خلتها برئت واستقامت لها الحال. فلا تبخل على نفسك
بنهايات ناصعة البياض، وتخرج لطيف العبارة رشيق الإشارة، فلعل الدنيا تدور،
والحظ يدور، والنصيب يدور، وتلتقي الوجوه ثانية، في ظروف أكثر رحمة،
ومساحات أكثر قربا، فتصل ما انفصل، وتخيّط ما انقطع، وتجبر كسر ما انفطر،
وتستأنف حياتك تماما من النقطة التي متّ شوقا، ودعوت ربك سرا وجهرا وليلا
ونهارا، أن تُخلق منها.

()

خد القرار اللي تقدر تبصّ في وشّه وانت قاعد لوحذك آخر الليل، مجردا من
الحول والقوة والعزوة والصاحب والولد، وما تحسش بقبضة باردة بتعصر قلبك.

()

بعد خروجك من العلاقة، بتشوف كل حاجة بشكل تاني: ريحة الهوا والناس
والطرق والعربيات والإفیهات وتاسكات الشغل والمزيكا والأكل ويوم الأجازة!
شيء أكبر من إنك تشاور عليه اتغيّر جواك للأبد، وخلّى العالم كله كأنه جديد
عليك، أو إنت اللي جديد عليه، ماتت الذاكرة المشتركة ما بينكم، وأصبحت
محتاج -زي الطفل اللي بيتعلم المشي- حد يسندك، ويلفت انتباهك للحاجات

من أول وجديد، عشان تتوازن وتقتنع وما تغلطش، لكنك للأسف هتترنج، وهتغلط كثير قوي، وهتقع، وهتجرح، ورجلك هتزلّ في تجارب فرعية كثير، هتفكرها طوق نجاة في الأول، لكنها في الحقيقة طوق حوالين رقبتك!

وكأن هزيمتك أول مرة، بقت مبرر لاستمرار الهزيمة باقي عمرك! أو كأنها لعبة وكل اللي كان حيلتك حياة واحدة بس، ضيعتها بغبائك!

الهزيمة في حب صادق، ممكن تبقى آخر مسمار في نعشك، حتى لو فضلت واقف على رجلك، بتضحك وتتكلم وتمثل، ورفضت تمضي شهادة الوفاة، اللي اسمك الثلاثي مكتوب في أول سطر فيها، وممكن تبقى بداية فوقانك وتحولك لإنسان أفضل وأكثر حقيقية، واللي بيحدد ده: نظرتك لنفسك وإذا ما كنت تستحق تعيش الحياة فعلا ولا لا تستحق أكثر من إنك تبقى مجرد سطر في قصة أحدهم!

()

بعد انتهاء العلاقات، خصوصًا لو كانت النهاية نيّة ومش مطبوخة كويس، أو مؤلمة وجارحة وبتجيب دم، أو غير متوقعة وغير منصفة، طبيعي جدا تتمنى للطرف الثاني إنه يتنيل على عينه وما يتوفقش!

طبيعي جدا تتمنى له الفشل من بعدك وإن ربنا يخرب بيته، عشان يعرف قيمتك وأهميتك ويندم على الفرصة الكبيرة اللي ضيعها على نفسه!

إحنا مش ملايكة، ولا صوفيين متجربين، ولا من أولياء الله الصالحين، فطبيعي جدا تبقى دي مشاعرنا، وتبقى دي عتبة تفكيرنا الأولى ساعة الصدمة وفي عز الوجع، دون أن يعني هذا من قريب أو بعيد إننا أشرار ومصاصي دماء وبنتنسلى بفقء أعين الناس وقت الفراغ!

وحتى بمنطق ديني: الذنب لا يُحتسب إلا إذا وقع، أما التفكير فيه دون فعل فلا قيمة له، فإنك تتمنى له الشر، ما دام لم يتحول إلى فعل وسعي حقيقي لنقله إلى حيز التنفيذ، فليس شرا، وإنما مجرد تنفيس ومحاولة لنفث الكبت ووجع القلب والذكريات الزبالة، لإعادة التوازن النفسي وإخراج الصديد وطرح الفرص والإمكانيات على مائدة البحث.

فما تشقش على نفسك، وتحس بالذنب وبالخطيئة لما الأفكار الشريرة تستفرد بك، وفي الوقت نفسه سيبها، ما تدخلش في صراع معاها ولا تحاربها وتزق فيها، عشان ما تأكدش وجودها جواك، بعد شوية هتمشي لوحدها وهتدي الفرصة لإرادة الحياة جواك ترفع راسها وتنتشلك من كل المشاعر السلبية دي، وتوريك السكة الجديدة اللي لازم تمشي فيها.

()

أخطر العلاقات وأسوأها على الإطلاق، هي اللي بتعقب الانفصال، بيبقى الواحد عايز يعوّض خسائره بأقصى سرعة ممكنة، ويثبت لنفسه وللطرف الثاني إنه مش غلطان، وإنه لقطة، وألف مين يتمناه، ويخليه يندم على يوم فراقه!

ودي المرحلة اللي بنلتهم فيها الأونطة بأريحية مطلقة، وعن طيب خاطر، ونصدق أي حد يقول لنا كلمتين حلوتين، من غير ما نمرّهم على عقلنا خالص، أو نقف لحظة واحدة عشان نفكر ونحسب ونوازن بين الخيارات ونشوف الإثّة فين، بل وبنحارب اللي بيحاولوا يلفتوا انتباهنا للي بنعمله في نفسنا، وممكن نخسرهم ونصنّفهم في خانة أعداء النجاح والحاquدين بكل سهولة، لمجرد إنهم بيقولوا كلمة حق!

والصح إننا ناخذ هدنة معقولة عقب انفضاض أي علاقة، نقف على مسافة عادلة من كل حاجة وكل شخص، لحد ما نستوعب الأشياء، ونعرف راسنا من رجلينا، ونفهم ازاي وصلنا للنقطة دي، وازاي ما نعملش في نفسنا كده تاني، وما نحاولش نستنسخ اللي فات في اللي جاي، أو ندور على التجربة نفسها بحذافيرها مع شخص تاني، لأن ما حدش شبه حد.

الأخطاء والسقطات وسوء الحكم على الأشخاص والفشل في تأويل الحالات أمر طبيعي للغاية، وما حدش معصوم منه: الأذكياء والأغبياء، اللي بيقطعوا السمكة وديلها واللي ما بيعرفوش يفكوا الخط في العلاقات، حاجة كده زي الضريبة اللي لازم تدفع عشان تعدي، ودي مش مشكلة في حد ذاتها، المشكلة في عدم برمجة الخبرة السيئة في المخ، والاحتفاظ بيها عشان نصنع مضاد حيوي ليها وتطعيم ما يخليهاش تخيل علينا تاني، وبالتالي السقوط في البئر نفسها كل شوية.. كل شوية!

انتهاء العلاقات أحد أصعب الآلام في الحياة، وما بنقدرش نتجاوزه بين يوم وليلة، وأثره بيمتد لآخر العمر في حالات بعينها، لكن -على الجانب الآخر- الإنسان بطبعه طماع، ونسبة الحمورية في دمه لا يُستهان بيها الحمد لله، ويفضل يعمل نفس الحاجات كتير قوي وهو منتظر نتيجة مختلفة، ومهما ده ما حصلش، ما يقللش عناده وغروره، كأنه في مهمة مقدسة لحبس نفسه في سجن الحزن والحيرة للأبد، ثم بكل وقاحة يقول: ليه يا رب ده بيحصل لي ده أنا بالذات؟!

أقول لك ولا تزعلش؟!

ابذل كل ما تستطيع للحفاظ على علاقاتك، لكن لو انتهت غضب عنك، اقف، وفك إيدك، وسيب الحاجات تنتهي، واسمح لنفسك بالحزن، وما تعملش فيها سوپر مان، واشغل وقتك وابعد عن الحاجات اللي بتفكرك بيها واهتم بنفسك وغير أسلوب حياتك على قد ما تقدر ووسع دائرة معارفك والنشاطات اللي بتعملها، وواحدة واحدة، السم هيخرج من دمك، وهتقف على رجلك، وتبقى مستعد لعلاقة جديدة على نضافة، من غير ما تظلم نفسك ولا تظلم طرف تاني ملوش ذنب.

وتذكر أنه لا يوجد أي شخص لا يمكن تعويضه.
أي شخص.

()

اللي بيحب حد، بيبقى في لاوعيه -ولو للحظة- رغبة دفينه غير معلنة إنه يسببه
ويلم الدور، عشان يتخلص من عبء العلاقة ومسؤولياتها وتبعاتها وتعقيداتها،
ويستعيد حريته مرة ثانية ويعيش من غير وجع دماغ.

واللي شغال في شغلانة، مرتاح أو مش مرتاح، بشكل أو بآخر هتلاقيه في
لحظة ما برضه، بيفكر يسيبها، ويشغل في حاجة بتاعته أكثر وتناسب إمكاناته
وطموحاته بشكل أكثر تحديداً، أو يمكن ما يشتغلش خالص أصلاً!

واللي متجوز، ومهما كانت قوة علاقته بالطرف الآخر، نفسه -في اللاوعي برضه-
ينفصل ويتحرر ويبقى خفيف ويشوف الدنيا من منظور جديد.

الرغبات الدفينة دي، وتهويمات العقل الباطن، واللي ممكن تكون لحظية وعابرة،
ونتاج تعب أو إرهاق أو خذلان أو إعادة تقييم أو تغير في الشخصية بمرور الوقت،
ممكن تتحكم فينا وفي تصرفاتنا من غير ما ناخد بالنا، وتغير خريطة علاقتنا
بنفسنا وبالأخرين.

فتلاقي المحبين بيهبشوا في بعض فجأة على سبب تافه، وتلاقي المتجوزين
ممكن يوصلوا للطلاق بلا أي مبرر قوي ملموس، وتلاقي واحد صحي الصبح راح
قدم استقالته ورجع قعد على القهوة بكل هدوء ودون أي خطط مستقبلية
محددة!

عشان كده، لازم نتعود نسحب مشاكلنا ومخاوفنا ورغباتنا المكبوتة للنور،
ونناقشها، ونفتش وراها، ونعرف أسبابها، ونحاول نعالجها ونطمئنها ونوفر لها
خروج آمن، اتقاء للمفاجآت وردود الفعل غير المبررة.

لازم نبقى صرحاء مع أنفسنا وعارفين حدودنا وإطارنا الأخلاقي ومنظومتنا
القيمية ومساحات المغامرة في حياتنا ومواطن الضعف.

الإنسان كائن معقد جداً، ومفيش كتالوج موحد ينطبق عليه، وبقدر ذكائه فهو
غبي، وبقدر شجاعته، فهو أحمق، وبقدر طبيته فهو شرير، والتعامل معاه لازم
يكون على نفس القدر من التعقيد، والحيلة، والانتباه، عشان تبقى النتائج
النهائية مرضية إلى حد ما، ومفيش فيها كوارث تطيح بمكتسباتنا اللي تعبنا فيها
عمر كامل ومع ذلك ممكن تضيع في لحظة!

()

ابعدوا شويّة عن اللي بتحبّوهم، ما تعرفوش كل حاجة عنهم، ما تتشاركوش في كل شيء، ما تخرجوش طول الوقت مع بعض، سيبوا مناطق رمادية صغيرة ما بينكم، مساحات شخصية مش مطروقة، أصدقاء مجهولين. الاكتشاف الكامل بوابة الزهد التام.

()

ومن قال إن "البعيد عن العين.. بعيدٌ عن القلب"، جحشٌ كبيرٌ، فالشوق تُسكّنه - وقتياً- نظرة للمحبيب، فإن لم تتوافر، تكفل القلب بنسخ المحبوب في كل ما يحيط بالعاشق: البشر والأثاث والسيارات والشوارع والمباني، حتى لم يعد يرى سواه أو يفكر في غيره، فيستفحل شوقه ويتعاضم وجده، أكثر مما لو كان المحبوب أمامه، ملء السمع والبصر!

()

لما بنحب.. بنشوف اللي بنحبهم ملايكة بجناحات، منزّهين عن الخطأ، وليهم حق في كل اللي بيعملوه، وأي تصرف غبي يصدر منهم، بتتسع صدورنا ليه وبنلاقي له 100 تفسير منطقي وبرنس في نفسه، ويمكن ده اللي بيصعب الدنيا أكثر بعد الانفصال: إننا بنتخيل إننا خسّرنا كائن سماوي مش هيتكرّر.

لكن لو قدرنا من الأوّل نخط كل واحد في حجمه الحقيقي -بما في ذلك أنفسنا- هنبقى أكثر قدرة على قيادة العلاقة لبرّ الأمان وتخطي العقبات من ناحية، ومن ناحية ثانية هنعرف نقرأ العلامات صح، وما نتخدعش، أو نطنّش مؤشر حيوي وخطير ذو دلالة مهمة في مسار العلاقة.

ولو ما حصلش نصيب هيبكون عندنا من الوعي اللي يخلينا نقفل الصفحة دي باحترام وإنسانية ودون إراقة الدماء وزرع الضغينة، والاستعداد لفتح الصفحة التالية بسلاسة وأريحية.

الحب مش تسبيل وخروجات في ضوء القمر وعش العصفورة يقضينا وسلانتر وماك، إنما بنيان على شفا حفرة، مركب ضيق لا يتسع سوى لفردين في خضم بحر عرمرم، ثقب ضئيل في جدار مُصمت يوشك أن ينقضّ، ولا يقدر عليه سوى أولياء القلب الصالحين.

()

أسوأ ما في انتهاء قصة حب بين رجل وامرأة، أنهما لن يعودا صديقين مرة أخرى!

()

دائماً بنيجي على اللي بنحبهم، وبنتجاوز معاهم كل الحدود، عشان مطمّنين

من ناحيتهم، وعارفين آخرهم، وواثقين في قدرتنا على مداواة غضبهم منا أو إحباطهم من تصرفاتنا، لكن مع الوقت بتختفي من قدام عينا الفروق الجوهرية بين اللي يمكنهم احتماله فعلا واللي لا يمكن بأي حال من الأحوال التساهل معاه، لحد ما بنصحى في يوم على حياتنا معاهم -حرفيا- مرمية في الشارع!

وساعاتها الحساب مش بيبقى على آخر موقف حصل بينا بس، لكن على الفاتورة كلها بدون حد أقصى لرد الفعل!

يمكن بنعمل ده بغباء ومن غير قصد ولا تدبر في العواقب، لأننا في غاية الهشاشة والعوز، وطول الوقت محتاجين حد نسند عليه ونتعري قصاده وإحنا مش مضطرين للتبرير أو إرهابي الذهن في إسباغ المنطقية على تصرفاتنا في حضرته أو ادعاء الانصياع لمسلمات المجتمع وشكلانيات العادات والتقاليد، حد نكون معاه على طبيعتنا الحقيقية من غير أقنعة ولا حسابات المكسب والخسارة ولا تركيز في التفاصيل وتفاصيل التفاصيل.

لكن المشكلة إننا وإحنا بنعمل كده، بننسى إن هو كمان محتاج منا اللي محتاجينه منه!

الموضوع معقد للغاية، ومساحات الصح والغلط فيه مش محددة بقلم أحمر وقاطعة الثبوت والدلالة، ومفيش حد هنا شرير بشكل مُطلق ولا خير بشكل مطلق، وقدراتنا مش زي بعض، والفروق الفردية بينا أكبر من أن يتم حسابها وحصرها بسهولة، ومفيش -للأسف- كتالوج موحد للعلاقات يمكن الرجوع إليه للاسترشاد والتوعية، لكن فيه مبدأ عام وأساسي أعتقد لو حطيناه قدامنا طول الوقت يمكن يكون دليل على السكة، وبداية لرحلة إعادة التوازن لعلاقتنا المهمة واللي فارقة معانا في الحياة: ما تحوجوش حبايبكم لغيركم.

()

ما ينفعش تستجدي الحب. تمد إيدك كل يوم وتبص له بعيون مهزومة وتقول له: أنا بجري على قلب مكسور شوية حب لله، وتصمم تفضل في حياة شخص شايفك مجرد مرحلة، أو حلقة وصل بين تجربة فانت وتجربة جاية، أو جسر بيعدي عليه للوصول لذاته، تاركا قلبك نهبا لكآبات الوحدة وشجون الانكسار، على أمل إنه يحس بيك في يوم، ويعوضك أيام السهر والألم والدموع والخوف والرعب من يوم يجي وهو مش معاك، أو يوم يجي وإيده في إيد حد غيرك، وإنت واقف مستخبي بعيد، بتبص له من ضهره، زي ما اتعودت طول علاقتكم!

الحب زي الموت، قرار في اتجاه واحد، مفيش فيه مفاوضات، ولا انتظار، ولا واسطة، ولا مجاملة، ولا جبران خواطر، ولا تغيير حيثيات الحكم بعد صدور القرار. يا موجود يا مش موجود.

إنت عارف كويس قوي إن مفيش أمل، مفيش سكة تانية، مفيش طرق خلفية ونوافذ متسابة مفتوحة عن طريق الخطأ، مفيش معجزات، واعترافك أو عدم

اعترافك بده، مش هيغير حاجة!

وعارف كمان إنك مش هتبطل تستناه، وتشوف نفسك بتتخلق في حضنه، وتحكي عنه للسريير والسيّارة والموبايل والكتب والشجر والبطاطس المحمرة وحنفية المطبخ! ولا هتبطل تلجأ للسما وتدعي يكون من نصيبك وإنت شرقان بالعياط، ولا هتبطل كل يوم تتكوم على سريرك لوحك في عز الليل، تبص في السقف لحد الصبح، من غير ما تدوق طعم النوم، وحكاياتك معاه بتتكرر قدامك، ذكرى ذكرى ولقطة لقطة وكلمة كلمة، وقلبك بيرجف من اللهفة والخوف والألم واللوعة والشوق والحنين والانتظار، وبتنبش بضوافرك وسنانك عن أي حاجة ممكن تغير الوضع المستحيل.. وما بتلاقيش!

وعارف أكثر إن الدائرة الجهنمية اللي بلغت دي عمرها ما هتتكسر، إلا بانكسار قلبك نفسه مليون حنة، وعدم صلاحيته مرة أخرى للاستخدام الآدمي!

()

غياب الأحباب جسديًا بالموت، رغم قسوته وصعوبته، بيقلل دايرة التخيل والاحتمالات عندك تماما، ويوقفك عند عتبة معينة ما بتتجاوزهاش أبدا، وده اللي بيساعدك مع الوقت على التحمل وربما النسيان، لكن غيابهم بالفراق، بيوقعك في إشكالية أشبه بالرمال المتحركة، اللي كل ما قاومتها أكثر، غصت فيها أكثر: هو أنا ممكن أشوفه ثاني؟ هو ممكن اللي بينا يرجع في يوم؟ هو أنا هكمل ازاى عادي كده من غيره؟ هو مين فينا اللي غلطان أصلا... ما يقودنا في النهاية للاعتراف إن الموت -في أحيان كثيرة- بيكون أكثر رحمة من الفراق!

فما تسحلش حد معاك.

عايزه؟ حابي عليه، واغنيه، وما تحوجوش لغيرك، والضم حلمك في حلمه، وعيشوا يا أخي.

مش قدّها؟ الزم مكانك، وما تموّتوش وهو حي!

القلب مش معمل العلوم بتاع ثانوي، اللي كُنا بننتهز فرصة انشغال المدرس لما ندخله ساعات، عشان نلعب ونجرب، ونحط حاجات فوق حاجات، يمكن بالصدفة تضرب معانا، ونوصل لاختراع يقلب موازين البشرية!

()

ما تحكمش على أي تصرف وإنت جوّ العلاقة إنه حلو أو وحش، غير بعد ما توصل لعتبة فارقة ونهاية مُرضية.

لأن الكويس والهائل والجميل، لو انتهى بالفراق والخذلان والتخلّي ووجع القلب، يبقى ما كانش زي ما إنت فاهم، كان لعب بقى أو تقضية وقت أو تسلية أو مصيدة... أو... أو... لكنه قطعًا ما كانش صادق ولا حقيقي.

أما إذا انتهى لصالحك بأي طريقة ممكنة، فقول شِعر براحتك فيه، وباهي بحسن اختيارك زي ما إنت عايز.

إحنا بنفرح بأقل حاجة، وما بنصدّق نضحك وننيسط، لكن مش كل الناس زيينا، فيه ناس محترفة، بترمي لنا عَصمة عشان تأخذ قصاها جَمَل، وتفضل تمد حبل الأمل المزيف لحد ما يلفّ حوالين رقابينا ويخنقنا!

وفي الوقت اللي بنتصوّر فيه إننا خلاص وصلنا البر وعدّينا، بنكتشف فجأة إننا بقينا في عرض البحر خلاص، بدون سُترة نجاة ولا حتى تليفون حد نبكي معاه على الخط وإحنا بنغرق!!

()

وإحنا جوّه التجربة بنبقى مصدّقينها قوي، ومقتنعين بيها تماما، ومعتقدين إنها تجربة العمر كله، وبنفترض تلقائيا إن الطرف الثاني زيينا بالطبط، ويمكن أكثر، وما بنفوقش من وهمنا غير لما يصدر منه تصرف مش متوقعينه أو مخالف للنسق العام اللي راسمينه للحدوتة، فنقف ثانية، ونبص من برّه ذواتنا، فنكتشف المصيبة!

(زي ما بتبقى جوا أسانسير وتيجي عليك لحظة ما تبقاش عارف هو واقف ولا بيتحرك غير لما تبص على العتبة الثابتة برّه، لكن طول ما إنت جزء منه وجواه، هتفضل الأمور ملتبسة عليك!)

بنكتشف إننا في وادي وهو في وادي ثاني، إحنا شايفينه أبد، وهو شايفنا مرحلة، معتقدين إنه دوا، وهو حمل جديد هياخد مكانه على رفوف القلب! ودايما هتلاقى عنده مبرر عظيم، وحجة ومنطق ودنيا!

وسواء عاتبنا أو ما عاتبناش، انفجرنا ودبدبنا برجلينا وخربشناه بضوافرنا أو لفّنا الصمت ونزل علينا سهم الله، فالنتيجة دايما واحدة: إحنا اتخدعنا، مشينا طريق جديد مش بيودي لأي حته! لبّسنا القلب توب حداد وهو لسه في عز شبابه! خسرنا وقت وعمر مش راجع ثاني!

ومفيش حل!

طول ما قلبنا بينبض هنجب، وطول ما إحنا ماشيين لوحدا في سكة طويلة هنشتاق، وطول ما راسنا محتاج صدر يرتاح عليه، هيفضل يلفّ حواليه لحد ما يلاقيه!

وطول ما فيه بشر.. هيفضل فيه دناءة وغش وخداع وانتهازية ودموع! وهيفضل فيه ألم.

لكن الشطارة إنك **تطلع** بالحسنة الوحيدة في القصة دي، وهي زيادة رصيدنا التراكمي من التجارب والخبرات، واللي المفروض ينعكس على جودة اختياراتنا

بعد كده ولو جزئيا، وعشان ده يتحقق لازم نبقي واعيين لنفسنا وللي حوالينا كويس قوي، ومتيقنين إننا نستاهل أفضل من اللي إحنا فيه ، ومهما كان البهرج والمظهر خداع نقدر ننفذ من خلاله ونبص على الروح، ونقرر إذا كنا هنتعارف فنأترف ولا هنتناكر فنختلف.

()

ساعات بتبقي عايز حاجة معينة من اللي قدّامك، وبالتالي أي شيء هيقدمهولك، أيا كانت قيمته عنده مش هيشبعك!

بالظبط زي ما تكون جعان جدا، وقتها مش هتقدر تركّز في جمال الطبيعة الفتن أو تصغي لصوت العصافير على الشجر، رغم إن دي حاجات جميلة طبعا في ذاتها، وفي أوقات تانية بترضيك وتخليك طاير، بس إنت -ببساطة- دلوقتي عايز تاكل الأول، وتُرضي حاجتك، وبعدين تبص حواليك بقى وتتلقت وتستمع.

عشان كده، فيه تضحيات كبيرة بتتبدل ما بنحسّش بيها، مش لأنها قليلة، أو عديمة النفع، لكن لأننا مش محتاجينها في الوقت الحالي، يعني أنا هيهمني بيايه إنك تتبرع لي بكليتك وأنا معنديش مشاكل في الكلية وكل اللي عايزه أعمل نضارة؟ في الوقت ده النضارة أم 200 جنيه، أهم عندي وأكثر قيمة من كليتك اللي ما تناقلش بالمال!

للسبب نفسه، قبل ما تكبّل حد بمعروفك، وجمالك، وتضحياتك، شوف احتياجاته الأول، عشان ما تصدمش في رد فعله من ناحية، واللي عملته يروح هدر، ومن ناحية تانية: يمكن اللي هو محتاجة منك دلوقتي، وهيمثل علامة فارقة في علاقتكم، يكون أبسط وأهون بكثير من اللي إنت عمال تفكر فيه وتعدّ له وتحسب له وشايل همه.

()

بعد ما نكتشف خيانة حبايبنا وندالتهم، بتيجي علينا لحظات نبقي عايزين نروح لهم -رغم انتهاء كل ما بينا- ونصرّخ في وشهم إننا كشفناهم وما كناش مغفلين، لكن دي حيلة من العقل الباطن، ظاهرها إننا عايزين نعرفهم قد إيه كنا واعيين قوي وما بيتضحكش علينا بسهولة وفقسناهم، فيما الحقيقة إننا بنكون بنتلكك ونتعلق بخيط واهي إنهم لما يلاقونا كشفناهم.. يحسّوا علي دمهم، ويبدأوا من جديد معانا على نضافة، ويعتذروا عن اللي فات، ويحاولوا بعوضونا وما يخونونا ثاني!

لكن التجربة بتقول إن العلاقة الفاسدة لما تنتهي، لازم تنتهي، لا عتاب بقى ولا ندم ولا ترتيب أوراق ولا هات جواباتي وخذ صورك وتبرير مواقف وهم ما يتلم.

اللي أعرفه: ضربة نافذة بسكين حامية في القلب تماما، وليحلّ الظلام على الجميع. وما عدا ذلك: نحنّة فارغة ودلع ومرقعة ومياصة ومراهقة لا تليق بالحب

وأهله ولا باحترامنا لنفسنا والله!

()

مشكلتنا إننا بنحاول نستنسخ التجارب اللي فاتت في كل علاقة جديدة، عشان نعيش نفس الأحاسيس، ونمر بنفس الخبرات، ورافضين نقتنع إن مفيش حد شبه حد ولا علاقة زي علاقة!

مع إن كل مرحلة وليها رونقها، وفيه تجارب حلاوتها في إنها انتهت في الوقت المناسب، وسابت ذكرى لطيفة، ولو كانت استمرت لحد دلوقتي، كانت دمرتنا.

دع من يمضي يمضي، ومن يفارق يفارق، سيب رجله، وفك إيدك من حوالين رقبته، وخليه يمر، الراحلون لا يملكون عناويننا الجديدة، والموتى لا يعودون إلى أرض ابتلائهم، فعش الحياة -كما يقول صديقي محترف السيارات- (نقلة ورا نقلة).

()

لو بحثنا لن نجد.

الحب كالموت يتخطفنا في موعد لا يُخلفه.

()

مَنْ أَحَبَّ لِسَبَبٍ، وَتَعَلَّقَ لَغَايَةٍ، يُوشِكُ حُبُّهُ أَنْ يَزُولَ بِغَوَاتِ السَّبَبِ، وَانْقِضَاءِ الْغَايَةِ، وَمَنْ أَحَبَّ بِلَا سَبَبٍ، زَادَتْهُ الْأَسْبَابُ كَلْفًا وَتَعَلَّقَا وَيَقِينَا.

()

سلامًا لمن طَرَقَ البابَ، فوجدَه مغلقًا، فعذرَ وأمهلَ وصبرَ ورابطَ وأبى الانصرافَ، ومكثَ غيرَ بعيدٍ،

يتحَيَّنَ فرصةً، ويترصَّدُ ثغرةً، حتَّى رأى نصفَ انفراجةٍ، فانتهزها، وجازَ وعبرَ واخترقَ ومرَّ إلى قلوبنا، فأنازَ ومنحَ وطبطبَ وأحيا وأعانَ وعوَّضَ واحتوى.

()

وأن ليس لمن أضع الطريق أن يسأل متى الوصول!

()

في علم التسويق يوجد مصطلح positioning ويعني وضع علامتك التجارية في التصنيف الملائم لها في السوق، لتخاطب جمهورك الذي تبحث عنه ويبحث عنك، فلا يصح أن تكون سلعتك كتبًا مثلاً، وتقدم نفسك على أنك صانع حُلِي ثم

تشكو أن أحدا لا يُعيرك انتباهها!

والأمر نفسه في العلاقات عموماً، لا بد أن تضع ما بينك وبين الطرف الآخر في مكانه الصحيح، وتختار له التوصيف الملائم والواقعي، وتضع إطاراً زمنياً للانتقال بين أطوار العلاقة مع ترك هامش للإخفاقات والمرونة في تغيير الوسائل والطرق للوصول للهدف النهائي، كي لا يفاجئك ما يحدث -أو ما لا يحدث- لكن مصيبتنا الكبرى وحمأقتنا الأفدح أن الـ positioning يبقى ضاربه السلك ومنيل بنيلة من الأول أساساً!

()

البُعد ما يعنّيش إننا ما بقيناش مهتمين ببعض، ولا محتاجين نتطمّن على بعض. البُعد استجابة للقدر، للظروف، للغباء، لكنه ما بينزعش الإنسانية من القلب، ولا يميّز الذكريات الحلوة حتى لو عليها رُكام القسوة والتفاصيل، ولا بينسينا قد إيه كُنّا بني آدميين وحقيقيين فعلاً وإحنا مع بعض. ويمكن بالعكس: القُرب كان عامين عن أحلى ما فينا، ولما بعدنا شُفناه، وحسينا باحتياجنا ليه، حتى لو ما عادش ينفع نبقي مع بعض ثاني!

()

بعد قليل، نبدأ في الاقتناع، أن الحبّ لم يكن -فقط- مسكة اليد في حضور قمر عفيّ على الكورنيش، ولا القُبلة المختلسة في ظلام السينما، ولا الحزن العاصر النازف حنيّاً بين سراديب "بيت الست وسيلة" في الحسين، ولا المكالمات الليلية الهائمة حتى الفجر على خلفية من شدة أم كلثوم "هل رأى الحب سكارى مثلاً"، وإنما كذلك: القدرة على معرفة اللحظة المناسبة للصمت.. للكفّ عن كلّ شيء.. لجرجرة الأحلام والانسحاب بهدوء.. دون خسائر فادحة!

()

سلاماً للذين إذا مرّوا على القلب، طبّبوا جروحه، وأناروا مصابحه، وأحيوا شوارع وطرقاته، وطرّدوا أشباح الراحلين والغادرين والخائفين والمرتعشين، وحوّلوا الخسارات مساحاتٍ لانتظار الفرص، والهزائم أقماراً في ليل الشجن الطويل.

()

إنما المحبّون من إذا مدّوا أيديهم إلى نار الله الموقدة واحترقوا، لم يلوموا اللهب ولا الحرارة ولا مشعلها، لكن أنفسهم!

()

سلاماً للأشياء التي تنتهي حين تنتهي، العابرين دون صخب ولا بصمات أصابع

على القلب، التاركين مساحات لالتقاط الأنفاس، المتحققين بالغياب، الواصلين بالانقطاع، الباقيين هناك، في مكان نجهله ويجهلونه، وقد لا يمكننا الوصول إليه أبدًا.. لكنه يبقى.. ويبقى.. رهن إيماءة.

()

يمكن مش مكتوب لنا نلعب أدوار البطولة في حياة بعض، ونفضل في الضل، لكن ساعات الضل سيكون أصدق وأكثر قدرة على التأثير.

()

وَجُلَّ ما تمنيتُ.. أن تكوني لي حالًا لا حالة.

()

كانت أمي تقول لي بابتسامة حانية (ربنا يستر قلبك).

فَأَقْبَلُ يَدَهَا ورأسها وأمضي، دون أن أفهم يقينًا ما تقصده، حتى جَرَتْ عليَّ أحوال الدنيا، وفهمتُ أنها أعظم دعوة في الوجود!

فستر القلب أن يفتح الله لكَ براحًا في كونه، فيرزُقك محبوبًا يبادلك المشاعرَ نفسَها، دون مَنٍّ ولا إحسانٍ ولا مباهاةٍ ولا طمعٍ في قضاء حاجةٍ ولا انتظارٍ مقابلٍ، يُعَشِّقُ روحَكَ في روحه، ويَكُنُّ قَلْبَكَ في قلبه، فيكون على ضعفه أمينًا، ولسره حفيظًا، ولكسره جابرًا، ولتقصيره مُعينًا، ولهله مسكنًا، ولنزواته ناصحًا، ولجنونه ساترًا، ولزلاته آويًا، ولفتوره طبيبًا، فإذا كلاكما مُكتملٌ بصاحبه، مُستغنٍ عمَّن سواه، مُؤتنسٌ بحضوره، مُكتفٍ بتجليه، فلا تقتحمكما عينٌ، ولا يذكركما لسانٌ، ولا تجري لكما سيرة، ولا تنالكما مُخيَّلة، ولا يرقى إليكما ظنٌّ، وذلك عينُ الستر والتخفي!

فله دَرْكٌ يا أمي!

على باب الخذلان

- "إنك رجل محظوظ.. تمتلك كل شيء".

- "كل شيء.. إلا أنت".

تنظر له لحظات، ثم تهزُّ يدها بقلّة حيلة، وتقول:

- "إلا أنا".

فيلم Louder than Bombs - للمخرج يواكيم تريه.

()

فيه ناس بتمنّ عليك بمعرفتها ووجودها في حياتك، وطول الوقت مستكتره نفسها عليك، وشايفة إنك لازم دائما وأبدا تعمل المستحيل عشان تفضل مستحق لنعمة معرفتها، بالتالي لما تتسجل في حاجة، أو دوامة الحياة تجرّجرك من شعرك، أو الزمن يريّح على أمّ رأسك، بيعتبروا دا اعتداء مقصود وموجّه لشخصهم الكريم، فبيتّخذوا مواقف غاية في الحدة والغشومية معاك، مهما كان العشم والعشرة والذكريات المشتركة اللي ما بينكم.

أما "التمس لأخيك سبعين عذرا" فتقلب معاهم إلى: اتلكك لأخيك على أصغر هفوة، وكمل على اللي باقي منه، وخلص أي ذنب حد ارتكبه في حقك من جتته!

فإن رأيتَ مثل هؤلاء، فاهرب منهم كما يهربُ السليمُ من الأجرَبِ!

()

مهما كان الشخص اللي اصطفيته عشان تحكي له أسرارك وتحط إيدك على مواجعك النفسية ومخازيك -وحتى لو كان في نفس محنتك- عمره ما هيقدر يتحرّر من الحكم الأخلاقي والديني عليك، وهتلاقيه في وسط ما إنت منهار أو بتتوجع يشاور بإيديه ويقول لك: ده غلط وده صح وده حلال وده حرام!

هو مش فاهم إنك عارف كل ده وبتتكوي بيه ليل نهار، وإنه مش جاي لعم الشيخ يوعظه، وحتى لو عم الشيخ وعظه هو مش في المود ده، وإذا كان بيعمل شيء غلط فمش بإرادته ولا مبسوط بيه.

في بعض مراحل الخلل النفسي والانهيار، ساعات بيُخيل إلينا إن مشينا الصح وقيمنا ومبادئنا هي اللي وصلتنا لكل الخسارات والفقد اللي بنكابده، فنقرّر نجرب الطريق الثاني.. يمكن. الموضوع بيبقى فيه جزء قهري ولا إرادي كبير جدّا حتى وإحنا واعيين إحنا بنعمل إيه، وممكن -بلا شك- يُفضي بينا لمزيد من الخسارة، لكن مع ذلك بنبقى محتاجين نجرب، ونطرق كل الأبواب المتاحة والممكنة.

ورغم إن الدين مكوّن أساسي في حياتنا، ولا مفر من الانصياع تحت لوائه في النهاية، لكن ساعات بتخرج شوية عن إطاره، بتغلط، بتعيد عن الطريق، مش عشان إنت كافر ومارق وابن كلب قدر ما هي محاولة للتخفف شوية، لعزل العوامل وتحييد الحاجات، ورؤية الدنيا بمنظور جديد والتجربة، والأکید إن كل واحد ليه حساباته وخياراته في الحياة، ومنظومته القيمية والاجتماعية، والحاجات اللي ما يقدرش يخسرّها، وبقينا ما حدش هيحاسب على مشاريب حد.

بتكلم عن الناس العادية، مش أولياء الله الصالحين، اللي بركة يحلوا كل

مشاكل الدنيا، وبسجدة يصلوا لليقين وخلاصات الأشياء، بتكلم عن ملح الأرض، المهزومين والمحيطين والخائفين والمجروحين والمطعونين والضالين، اللي بيحبوا ربنا وموقنين من رحمته لآخر المدى، وواثقين إنه مش واقف لهم على الواحدة، ولا مستني لهم غلطة عشان يخليهم رماد تذروه الرياح، لكن هيمد لهم بساط التجربة وهيصبر عليهم لحد ما يكتملوا.

ولما حد يفتح لك صدره ويفضفض لك -بعد سنين كتمان- في الغالب ما بيبقاش عايز منك غير إنك تسمعه، يعني لا تحل له حاجة ولا توعظه ولا تباهي بطهارتك في مقابل نجاسته ولا تكذب وتقول له كل شيء هيبقى كويس، فخلي بالك: الكلام اللي هتقولوه في لحظة المكاشفة بالوجع واللهجة والتون بيفرقوا جدا جدا، لأن كلمة واحدة غلط تتقال هتقفله منك للأبد، وتخليه يهرب، مع إنك يمكن تكون آخر إيد ممدودة له!

إحنا مش ملايكة ولا أنبيا ولا معصومين من الغلط، والله العظيم إحنا في منتهى منتهى الهشاشة، منتهى الضعف والاحتياج، منتهى اليأس من كل حاجة وأي حاجة، منتهى التعلق بما هو أقل من القشة، وقرار الكلام مع حد أصلا والفضفضة ليه زي الجبل على قلبنا لأننا عارفين إن مفيش حاجة هتتغير، بس بنعمله، عشان نقول لنفسنا إننا جربنا وفتحنا قلبنا للناس وحاولنا لآخر لحظة!

والقرارات اللي دايمنا ناخذها بالابتعاد عن الناس، وقفل حياتنا على روحنا، بتبقى جادة وحقيقية وممضية بالقهر والمكابدة، ما بتبقاش تهويش ولا عشان الناس تقول لنا: ما تمشوش، إنتو حلوين وكيوت وإحنا بنحبكم، لكن اللي بيخلينا نرجع ثاني كلمة افكرناها لحد فرقت معانا، ذكرى اتحفرت عميقا في القلب أو الأمل-أفيون القلوب- ابن الكلب الأمل، إن فيه حاجة هتتغير!

فما تقطعوش إيد حد اتمدت لكم، وما تحكموش على حد، إنتو -حرفيا- ما تعرفوش أي حاجة عننا، ولا ما كابدناه عشان نقف قصادكم النهارده، ولا الصراعات والوحوش والعفاريات والمواجه اللي بتلتهم روحنا ليل نهار، خليككم على الحافة، وبيننا وبينكم المودة والرحمة والونس.. بس.

()

عندما يخذلنا شخص، تشيخ كل الأزهار التي زرعها بداخلنا فجأة!

()

طول الوقت بنبعث رسائل استغاثة خفية للي حوالينا، وعلى حسب قربهم منا وإيمانهم بإننا نستحق، بيتلقوها أو بتضيع وتتبدد في الفضاء السرمدى.

الرسائل مش بس كلام؛ نظرات، ابتسامات، دموع، ستاتيوس على فيس بوك، صرخ، دبدة بالرجلين، هذيان وصوت عالي مش مفهوم، شتيمة، اتصال في

أنصاص الليالي من غير ما نقول كلمة واحدة، صورة عملنا لها لايك، طريقة معينة في عبور الشارع بلا مبالاة قدام سيل العربيات، مسكتنا للشوكة، شربنا للسجاير وإحنا بنكرهها، كتر الشطة وإحنا ما بنحبهاش، عدد علب المناديل في إيدنا!

غالبا بنبقى عايزين حد بعينه يقرانا، ويفهم، ويمد لنا إيد، حد ببقى بالنسبة لنا هو العالم والتاريخ والحقيقة المطلقة للوجود وتجلي الله الحق، بس مش قادرين نقول له، أو خايفين، أو محرجين، ومتعشمين إن تاريخنا المشترك يتحرك تحت جلده وينبهه إن فيه هنا روح -كانت تخصه في يوم- بتتحرق فعليا ومحتاجة نظرة.

بنبقى وصلنا لنهايات كل شيء؛ العشم والخذلان والصبر والانتظار والأمل والمناجاة والحلم والفتوح والتوقع، ومستنيين -للمرة الأخيرة- انفراجة، مساحة حرة لالتقاط أنفاسنا بجد، بشرى، إثبات إننا فارقين مع حد ونستحق، تواطؤ كوني في صالحنا ولو مرة، عشان نقدر نبدأ من جديد ونكمل مكابدة الحياة ونسدد فواتير الوجع!

لكن في الغالب بيكون هو الوحيد اللي ما بيغهمش الرسالة، أو بيغهمها ويطنش، أو بيغهمها وتأخده العزة بالإثم وينتهزها فرصة لتصفية الحسابات، أو بيغهمها ويدرك توحش احتياجنا بس خلاص ما بنقاش فارقين معاه، فبيسد ودانه ويكمل حياته عادي، فبنزداد انكفاء على ذواتنا، وناخد أحزاننا بالحضن، ونرجع ١٠٠ سنة لورا في سلم التطور الإنساني ونلفظ كل الناس، وما تبقاش أي حاجة فارقة معنا!

ومن الجحود للنكران للتجبر في قطع رقبة العلاقات للخذلان لاستسهال كسر القلوب للعب بمشاعر الصادقين للوحدة المهلكة لاعتقادنا المروع إننا دائما صح ونملك الحقيقة المطلقة لدقات الساعة اللي ما بتقفش، دائما بفكر: أكيد ربنا مش هيدخلنا النار في الآخرة.. نار الناس في الدنيا قامت بالواجب وزيادة، ولا يُعاقب مؤمن على الذنب نفسه مرتين أبدا.

()

إحنا ما بنحسّش بقيمة الأشخاص في حياتنا غير بعد ما بيمشوا، بنبقى أقويا جدّا وإحنا بنتلكك لهم ونفتح الباب ونقول لهم بكل جبروت: "اتفصلوا.. ما عدناش محتاجين خدماتكم"، أو نفضل نخذل فيهم لحد ما يفتحوا الباب من أنفسهم ويفوتوا!

وبعد شوية، آثار إيديهم على أرواحنا بتبان، وبتطالب بالإشباع اللي كان متحقق بوجودهم، أرواحهم الهائمة والشوارع والأغاني والأكل والضحك والمواقف والدموع والوعود والأحلام اللي جمعتنا يوم، بترفع راسها جوانا وتلومنا على الفقد من غير صوت!

بأيدينا بنزود وجعنا، ونضعف مقاومتنا، ونفتح مسارات لا حصر لها لنفاد الطاقة وتشتتها، وعشان نهرب من وجع الضمير، بنعمل عملية إحلال وإبدال، بندور على غيرهم -وغالبا يبقى فيهم شبه من بعض!- لكن مهما اكتملت الحكايات الجديدة بتاعتنا، يبقى فيها حنة ناقصة، قطعة بازل مش في مكانها، ليها علاقة بالروح والعشرة والصفاء والثقة وانبهار البدايات، ومهما لقينا بديل، عمر الحاجات ما بتبقى زي أول مرة أبدا!

والطريق الثاني إننا ننكفئ على ذواتنا، نقفل طريق أي علاقة جديدة، وندي الفرصة لوحدتنا تتوحش، وتلتهم الأخضر واليابس تماما، وتسيينا عظم بلا لحم ولا مشاعر ولا رجا!

أما الطريق الثالث فإننا نحاول نوصل اللي اتقطع، ونرمم اللي اتصدع، بس خطورته إننا لو ما كناش صادقين وجادين المرة دي، وقادرين على تحمل المسؤولية والاعتراف بتقصيرنا، فالأمر هيبقى هزلي جدا، ومش بس ملوش مستقبل لكنه كمان هيشوه حتى الماضي اللي كنا بنتسند عليه من حين لآخر!

القلوب أمانات، والمشاعر مراكب سايرة في نور الله من مرسى إلى مرسى، فما تخونوش الأمانات، ولا توقفوا المراكب السائرة!

()

ساعات كتير بنأجل حاجات نفسنا فيها قوي، وشايقين فيها خلاصنا، خوفا من إنها تطلع فشك هي كمان، فنبقى ضيعنا على نفسنا حتى الأمل!

()

الهاجس الأكبر لينا، إننا نعدّي على الدنيا بلا بصمة ولا أثر، وما نبقاش فارقين مع حد!

يمكن عشان كده بنحب ونكتب ونغني ونرسم ونمثل ونرقص ونكتب على السوشيال ميديا ونعمل مشاريع، عشان حد ياخذ باله مننا، ويلاقي صفات مشتركة معانا فيشاركنا الرحلة، ونتسند على بعض.

وللسبب نفسه بنتجنن لما نكتشف زيف اللي كنا فيه، والخذلان يبقى مضاعف، لأنه فرغ كل اللي حصل من معناه وخلاه قشرة، عيرة، عدم، وخوفنا من اللي جاي، ولخبطنا، وخلصنا مترقبين النهاية نفسها ولو بعد حين!

إحنا في منتهى الهشاشة.. منتهى الاحتياج.. منتهى الطفولة.. وفي الغالب بنرضى بحاجات عبيطة وهبلة لو كانت صادقة ومن غير ماكياج.

لكن على الجانب الآخر، بعض الناس حساباتها أكثر تعقيدا، ودخولهم حياتنا يبقى مشفوع بخطط وتوقعات ومكاسب وتطلعات وليلة كبيرة سعادتك، وللأسف ما بنكتشفش ده دائما غير بالطريقة الصعبة!

والمشكلة الأكبر مش إن الحياة صعبة، لكن إنها كان ممكن تبقى أجمل من كده بكتير، وأحلى، وأكثر حقيقية، لو حاجات بسيطة اتغيرت، وناس بعينها فضلوا معنا وكانوا قد كلامهم ووعودهم اللي ما أجبرنهمو مش عليها بالمناسبة!

ورغم إن الكل بيخسر في النهاية، حتى اللي عامل نفسه بُرم وفاهم كل حاجة ومسدد كل الخانات، ما حدش بيتعلم ولا بيستوعب الدرس، وليوم القيامة هيفضل الإنسان أغبى من إنه يدرك قد إيه الحياة تافهة وهينة ومش مستاهلة اللي بنعمله في بعض ده والله!

()

أغلب مشاكلنا نابع من إننا ما بنعرفش نختار صح: الحبيب/الصديق/التجربة/الشغل... وإننا بدل ما نصبر ونجتهد لحد ما نلاقي اللي على مقاسنا، بنرضى باللي بنلاقيه في سكتنا والسلام، ونحاول نأيف مشاعرنا عليه بأي شكل ونقنع نفسنا إن هو ده!

لكن مع أول اختبار حقيقي، وأول لحظة اختيار حرة، كل شيء ببيان، وبنكتشف الفخ اللي وقعنا فيه، وساعتها، فيه مننا اللي بيكابر ويكمل ويرضى بنصيبه ويتفرج على الحياة مش يعيشها، واللي بيلف ويرجع ثاني مهما كانت الخسائر، واللي بيعاند القدر ويحاول يغير المقدر، ويفضل يزق لقدام لحد ما يخسر الجلد والسقط!

يمكن لما نحب نفسنا بالقدر الكافي، ونتعود نسمع لها، ونفهمها، وما نقامرش بالوقت ومساحات البراح جوانا ونبطل نتعامل مع القلب على إنه كورة شراب مهما لبسناه في الحيلة هيرد لنا ثاني، ونتخلص من طاقة الغضب اللي مليانا طول الوقت، الرؤية هتتضح أكثر، وهيبقى عندنا بصر وبصيرة أكبر للي يناسبنا في المرحلة دي واللي ما يناسبناش، للي من توبنا واللي طالع شيطاني في لحظات ضعفنا واحتياجنا، للأصلي والفالصو، للي منظر بس واللي حقيقي زي وجعنا!

لكن في كل الأحوال، لكل منا نصيب مفروض من الألم والخيانة والخذلان والتخلي والبيع والاستهانة والوجع وكسرة القلب والتوهان والحيرة والدمع وغياب الهدف وضياع الطريق، فاللهم -إن لم يكن هناك مفر- عجل لنا قطنًا* قبل يوم الحساب.

*قطنًا: عذابنا، صحيفتنا، حسابنا.

()

كل يوم لما بنزل عند بوابة 2 في مدينة الإنتاج الإعلامي، بحمل همّ المشوار الطويل اللي لازم أمشيهِ عشان أوصل للقناة اللي شغال فيها.

في أيامي الأولى في المكان كنت بستحي أشاور لعربيات زملاء اللي بتمر عليا، رغم إنها كده كده هتعدى على القناة يعني ومش هكلفه بنزين زيادة بركوبي، على أمل إن حد يحس بيا ويقف لي من نفسه، والنتيجة إنني كنت بمشي تحت رحمة الحر البشع والعرق والنهجان لحد ما أوصل مقطوع النَّفس! بعد فترة، ما بقيتش قادر أتحمل، خصوصاً في نهار رمضان، فاتجرات شوية تحت وطأة الإرهاق، وبدأت أشاور بخجل، لكن للأسف، مرة ولا اتنين بس اللي عربية وقفت لي، وفي أغلب الحالات، كانوا بيمرقوا من قدامي بسرعة بدون حتى التفاته، وأنا غرقان في الحرج!

مرة ورا الثانية قرّرت بشكل نهائي ما عدتش أشاور لأي عربية، ولا أستنى أي حد، وأكمل لوحدي، مهما اتقورت من الشمس واتعميت من العرق، أنا اللي اخترت الشغل ده وكنت عارف من الأول ظروفه فلازم أسترجل وأحاسب على مشاربي للنهاية.

وده بالظبط اللي بيحصل في العلاقات فاقدة الأهلية، اللي فيها طرف بيسفّ حقوق الطرف الثاني بسيف الحياء!

في الأول، بتستحي تطالب بحقك، وباللي المفروض يحققهولك، على أمل إنه يحس على دمّه، وتفضل تتحمل تبعات كل حاجة لوحدة، وتزق العلاقة لقدام، لحد ما تتعب في النهاية، وطاقتك تنفذ، فتتجراً وتطلب بخجل، لكنه -للأسف- بيبقى اتعوّد على الأخذ بس، وما عندوش أوبشن العطاء، فمرة يدك -مضطراً- عشان يخليك متمسك بالأمل -وعشر مرات يحرملك، لحد ما تصعب عليك نفسك وتتأكد إنك بتحارب طواحين الهواء، فتقرر ما عدش تشاور له ولا تستناه أو تستنى غيره، وتمشي الطريق وحدك، مهما اتقورت من الشمس واتعميت من العرق، لأنك مش عايز تتأخر أكثر من كده عن حياتك اللي تستحقها.

فالسير من غير حمل على ضهرك، أفضل مليون مرة من إنك تمشي وشايل حد على قلبك!

()

إحنا بنظهر قدام الناس بالشكل اللي يقدرنا يستحملوه، بنهدّب الهزيمة والحزن والخذلان ونقصق ريشهم ونطبطب عليهم ونحايّلهم، عشان نقدر نبتسم، ونتعامل. اللي جوانا لو انعكس فعلا على وشوشنا، الناس هتموت من الرعب!

()

واعلم -أعزّك الله- أن الوصلَ مقطوعٌ وإن طال، واللقا منفضٌ وإن أُنِع، والتداني منبتٌ وإن تكرر، فاسكن، واقم في الحال التي أقامك الله فيها، حتى تزول إلى

غيرها، دون تدمير ولا شيكاية ولا تعجل ولا تنمر ولا تذلل ولا تطرف، فلا يعلم أحد ما خبئ له، وهل ما استقبل من أيامه أفضل أم ما استدبر.

()

أكبر خطأ ترتكبه في حياتك: إنك تتكسف، أو ما تعرفش تتكلم عن نفسك، وعن قدراتك، وتسبب الآخرين يقيموك، وإنت فإكر إنهم هينصفوك ويدوك حقك! ماحدث بينصف حد، ولا بيدّي له قدره!

الناس طول الوقت بتحكم عليك من خلال عُقدّها، وخلافاتها، ومشاكلها، ومزاجها الشخصي، وغيرها، وحقّدها، لحد ما هتلاقى نفسك فجأة بقيت واقف في منطقة رمادية، مُخرج تتكلم وتقول إنك أكبر من كده، وفي نفس الوقت مش قادر ترضى بالمكان اللي حطوك فيه، فتبدأ مرحلة عبثية جديدة من حياتك، مليئة بالصراع والنكوص ومراجعة الذات والإحساس بلا جدوى الحياة والرغبة في تحطيم كل شيء، والعودة لنقطة الصفر من جديد!

عشان كده تفضل مقولة الإمام علي هي الأعظم في مجالها: لا تدعنّ جهل الناس بك يغلب علمك بنفسك.

()

ولعلّ للإنسان أن يرى أحيانًا ما تقود إليه الخيوط، لكنه يدّعي العمى، كي لا يغيّر وضعًا اعتاده، أو يتحمّل تبعات جديدة، أو يضطر للاعتراف بما يكره، أو اتخاذ ما يخالف هوى نفسه!

إنه يحب الظلام الذي يعيش فيه، ويكره من ينيره له!

()

بتسأل ازاي هو قدر يطنّشك ويتجاهلك تمامًا كده، وما يفتحش صفحتك على فيس بوك، ولا يتابع أخبارك، ولا عاد ليك مكان في حياته من بعيد أو قريب، بعد ما كنتم -حرفيا- روح واحدة في جسمين؟

افتكر الحد اللي إنت حببته قبله -في أي مرحلة من حياتك- وفقدت شغفك بيه -لأي سبب كان- وازاي قلبك جمد من ناحيته فجأة وما بقاش فارق معاك بأي شكل من الأشكال، ولا مهتم تعرف عنه أو ما تعرفش أي حاجة!

هو كمان تجاوز شغفه بيك زي ما تجاوزت شغفك باللي قبله، لكن إحنا اللي ما بنحسش بالظلم غير لما يكون موجه لينا بس!

()

آليات التدمير الذاتي اللي بنتبعها مع نفسنا بارعة للغاية ومتنوعة طول الوقت: التدخين، الشرب، النوم فترات طويلة لتجنب مواجهة أي شيء، الدخول في

علاقات يائسة معروفة النهاية، إدمان مواقع التواصل الاجتماعي، العمل بوظائف لا بنحبها ولا بتشبعنا ولا بتضيف لنا أي جديد، وصولاً إلى استمرارنا في الدنيا بالقصور الذاتي فقط، وبلا أي خطة لأي شيء، لدرجة إننا بقينا بنتفرج على الحياة بس، مش بنعيشها!

بل إن بعضنا لو جات له الفرصة لتغيير ده، بيرفض، زي اللي عاش طول عمره في السجن وخايف يخرج لما يعرفش يتصرف!

وبعضنا بيتطرف في إيذاء نفسه، عشان يسد باب أي حل، ويكبد نفسه خسائر لا يمكن تعويضها فيفضل واقف في نقطة الولا حاجة اللي على قد وجعها فهي على مقاسه، ومفيش فيها مفاجآت أو تغيير ممكن ما يقدرش يتكيف معاه!

ومع الوقت بنتأكد إن كلنا مرضى بدرجات متفاوتة، ومحتاجين مساعدة، بس مش عارفين نروح فين، ونطلب ده من مين، فنبداً -لا إرادياً- نبعت رسائل استغاثة لكل اللي حوالينا، لكن ببصوا على ضحكنا وتمثيلنا ومداراتنا وما يصدقوش!

وفي الغالب، هنكمل كده: بحياتين، واحدة في النور وعلى السوشيال ميديا بربرق، والثانية في الضلمة: أشباح وآلام وأحلام مقصوفة الريش ووجع وفرص ضائعة وخذلان وأمنيات عارمة بالرحيل!

()

زي لما تشتري أكلة نفسك فيها وتدفع فلوس كتير، وتكتشف إنها سيئة جداً، ومع ذلك تقرر تاكلها استخساراً واستهانة بالضرر اللي ممكن يحصل لك بسببها. فيه علاقات حب كده، رغم إنك بتدفع فيها مشاعر كتير ووقت وصبر وأحلام وتوقعات، بتكتشف إنها فالصو، ومش بتاعتك، وضررها أكثر من نفعها، ومع ذلك بتكمل فيها استخساراً برضه!

بس خلي بالك: الأكل المعيوب، ليه غسيل معدة، لكن الحب المعيوب ملوش غسيل قلب!

()

لو بتبذل مجهود كبير عشان تحتفظ بالطرف الثاني في العلاقة، وبتستحمل وتصبر وتطنش مواقف كتير، يبقى فيه حاجة غلط. فيه نغمة نشاز في اللحن، رقم ناقص عشان المعادلة تتحل.

فالأصل في التواصل الإنساني: التكافؤ والندية، أقدم السبب تقدّم الحد، أرخي في موقف، ترخي في موقف، لكن لو فيه حد متمسك أكثر من الثاني، معطاء ومضحى أكثر، يبقى غالباً مضحوك عليه ويتم ابتزازه عاطفياً!

صديقة كانت بتحكي لي عن حبيبها اللي ما كانش بيخرج معاها غير أول الشهر بس ويقول لها بهزار العزومة عليك عشان تحللي المرتب، ويسيبها تحاسب

فعلا، مع إنه كان بيبقى قابض برضه!
وصديق بيحكى لي عن حبيبته اللي ما كانتش بتطبيقه يحكي لها عن مشاكله،
فيما إنها ليل نهار ما بتبطلش شكوى من طوب الأرض!
العلاقات دي شديدة السمية، وبستنزف الطاقة تماما، والأسوأ إنها ما بتنتهيش
بسهولة لأن دايمًا فيه مساحة من الشك إننا ممكن نكون ظالمينه، طب ندي له
فرصة، طب نستنى شوية، لحد ما العمر يتسرب من بين إيدنا زي قطرات
المطر!

إحنا بنحب عشان نلاقي نفسنا، عشان يبقى عندنا مبرر نصحى الصبح، عشان
نتقدم وننجز ونتحقق، عشان نضحك ونطنط من الفرحة ونرجع عيال، عشان
يبقى بالنا مرتاح وقلبنا واثق وبقينا مكتمل.
فلو ما كانتش العلاقة بتقدم لك كل ده، يبقى تقف وتقلع ملط في وسط الشارع
وتقول لهم: لا ده أنا أروح فيكم في داهية، وتقطع عرق وتسح دم وتهرب بقلبك
وعقلك وإنسانيتك من الضلال ده، وتكرتنهم وتقل عليهم في خزنة حديد بكلمة
سر، لحد ما تلاقي اللي يقدرهم صح.
القلب مش بعزقة!

()

إحنا دايمًا أجبن من إننا نحقق أحلامنا، أو ندفع تمنها ونتحمل مسؤوليتها، وفي
لحظة المواجهة هنخترع أي حجة في الدنيا عشان نفضل زي ما إحنا!
إحنا بستعذب الألم وبنفضله في أحيان كثير حتى على نوال اللي بنتمناه من
قلوبنا!

إحنا مختلين وملعونين وضعفا ونستحق عذابنا!

()

واعلم أن من البشر مَنْ لَمْ يُقَدَّرْ له -في هذه الدنيا- وِصْلٌ وَلَا حِلٌّ وَلَا وَصْلٌ،
لعنته أن يجري فقط، يُقَارَبُ فقط، يَلَامَسُ فقط، حتى إذا حَمَّ القِطَافُ، مات الزرعُ،
أو سبقه إليه سواه، أو قَصُرَتْ يداه عنه، أو قامت القيامة خَصِيصًا على رأسه..
فاسكن ولا تجزع.

()

فيه ناس لما بتنسحب من حياتهم بيقولوا بركة يا جامع، وما بيحاولوش حتى
يسألوا عن السبب، أو يتطمئنا ليكون حصل لك حاجة، أحسن ترجع!
في يوم من الأيام كنت عندهم مهم قوي وفارق ومختلف ولا غنى عنك، لكن
دلوقتي ما بقوش عارفين هم عايزين منك إيه، فبيسيبوك تنزلق من بين إيديهم
عادي، بلا ندم، ولا محاولة لاستبقائك أو تفكير في اللي عملته عشانهم، ولا
اللي كنت لسه مستعد تعمله.
هم عمليين قوي، وحسبتهم بسيطة ومباشرة: واحد بيروح وواحد بيجي،

والحياة بتستمر، ومفيش حد لا يمكن الاستغناء عنه. عكس حسبتك اللي هم كانوا ركن ركين فيها، وعدم تحضيرك ليوم يجي وهم مش في القلب من اهتماماتك.

إنت مش أهبل، ولا هم خاينين، لكن هي دي طبيعة الحياة، وكل واحد بيتعامل بأسلوبه وباللي يقدر يتحملة. مش كل الناس شبهك، ولا إنت شبه كل الناس، ولازم تتعود تتعامل مع النوعيات دي من الصفقات الخسرانة من غير أفورة ولا مظلومية ولا شحتفة.

أو زي ما كانت جدتك بتقول بتلقائية ووضوح مُطلق: الله جاب، الله خد، الله عليه العوض.

الله عليه العوض يا صاحبي.

()

لن نشفى وكل هذا الغضب داخلنا، الغضب من حماقتنا، والغضب من الفرص الضائعة، الغضب مما لم نفعل، والغضب مما فعلنا، الغضب من الماضي، والغضب من الحاضر، الغضب ممن نحب، والغضب ممن نكره. طاقة الغضب تُحرك العالم، وتصنع التاريخ، وتصنعنا، لكنها لا تنفك تحفر عميقا فينا، وتهوي بنا إلى القاع أكثر. من دون الغضب نموت ونصبح نسيا منسيا، وبالغضب نموت ونصطلي بنار الله الموقدة.. ولا خلاص!

()

تأتينا السعادة أحيانا فنزديريها، نُعطِها ظهورنا، ونُقيم في وجهها كل متاريس الواجب والعرف والمفروض. ويطرق الحب أبوابنا، فنطيع الناس فيه، ونخضع للصور الذهنية التقليدية، والأفكار المُعلبة، التي أثبتت فشلها مئات المرات، ونطأ طي لقيم مجتمع وإه، لم يُعطينا قدرَ ما أخذ منا وانتَهك خياراتنا، ونمنحه مزيدًا من السُلطة على أحلامنا، التي لا نملك سواها، حتى يساويها بالعدم!

نتصور دائما أن الفرصة ستأتي مرة واثنين، أننا مختلفون وعاقلون وحكماء، مررنا بكل شيء، ورأينا ما يكفي، لنحسن التصرف دائما، نبالغ في الركون لقوتنا الداخلية، وفرصنا مع الحياة، نتجاهل النذر والعلامات، نكبث مشاعرنا، حتى نفقد الإحساس بها في النهاية!

المجتمع الذي خلقناه من كل ما هو قبيح وناقص وديكتاتوري وضد وجود الإنسان، من مخاوفنا وهواجسنا وتقلباتنا وضعفنا وعجزنا، أصبح اليوم هو الرب، هو من يقود ويقرر، ونحن نسجد له ونسبح بحمده، ونعلق على شماعته جُبنا، وهلعنا من المغامرة والتفكير خارج الصندوق، وتأکید حقوقنا في مواجهته.

إنسان العصر الحديث. يدخل النار مرتين، مرة في الدنيا، لخدلانه نفسه، وعدم تصديق حدسه، وقهره الذين أحبوه، ورفعوا له رايات المودة، ومدوا أكفهم نحوه، يبحثون عن سند، وعن معين وعن ثقب صغير في جدار مُصمت. ومرة في الآخرة، لأنه لم يدخل جنة الدنيا، ومن لم يدخل جنة الدنيا، لم تطأ قدمه جنة الآخرة.

()

إننا نحاصرُ أنفسنا طول الوقت، ونصرُّ على الخيارات الخاسرة، وندفع بكل شيء إلى الحافة. كلما ازددنا اطلاعا علي نقاط ضعفنا، تسللنا منها، وكلما لاحَتْ لنا ثغرةٌ فينا انتهكناها. أعداؤنا ليسوا أخطر منا علينا، فهم يروننا من بعيد ويتسقطون أخبارنا بعناء، بينما نحن ننظرُ إلينا من الداخل، وننقلُ أسرارنا إلينا مباشرة، لنعرفَ أين يجبُ أن نطعنَ، وأين نقطعُ ونُسيلَ الدمَ. منذ الخذلان الأول، ونحن نجتهدُ كي نجعله دائماً وأبدياً، فيتكسر الخذلانُ على الخذلان، وتتوهج المحنة، ويقتات الوجعُ على أرواحنا. لقد هُزِمنا وطُعِنَّا ونُبِذنا، لأننا -منذ البداية- لم نعتقد أننا نستحق النجاح!

()

لما بتتجرح أول مرة، بتصبر نفسك بإنك اتطعمت خلاص وخذت حصانة، وفي وقوعك الجاي هتبقى أقوى وأكثر وعياً، لكن اللي بيحصل هو العكس تماماً، لأنك ساعة الملامسة -لا إراديا- بتستدعي الجرح القديم وتوصله بالجديد في مساحة ممتدة من الخذلان.

مفيش حصانة ضد الألم، ولا مناعة من الوحدة وآخر سلام إيد وآخر بُق في العلاقة، هزايك هتفضل دايماً هناك، في أبعد -وأقرب- نقطة من قلبك، مستنياك تقع وتركع، عشان تحقّل عليك!

()

التفاصيل الصغيرة أكثر حاجة بتجرح بعد انتهاء العلاقات، يمكن لأنها بتتجمع وتتكاثر عليك في لحظات الوهن وتذبذب اليقين والوحشة والبحث عن علامة وطريق!

ويمكن لأنها كانت عفوية ومش مترتب لها ومش منتظرين من وراها حاجة فعمرها أطول وإيدها طائلة!

ويمكن لأننا ما بناخدش بالناس منها ونفهمها غير لما يبقى عندنا وقت كبير وتقل بعد انتهاء كل شيء! ويمكن لأن تركيزنا طول الوقت بينصبّ على القرارات الكبرى والخطوات المصيرية فبتتزلج من قدام عينا وتستوطن المنطقة الضلمة في المخ في انتظار لحظتها!

التفاصيل الصغيرة ما يتنساش تارها، ولا بتفرط في حقها، بتديك كل الوقت اللي إنت عايزه عشان تهمشها وتكمل حياتك من غيرها، وتقتنع إنها أصبحت أثراً بعد عين، لحد ما الطريق يخلى لها تماماً، فتطلع من حفرة النسيان على مهل، وبتؤدة، وتكشر عن أنيابها وتنهشك!

التفاصيل الصغيرة.. هولكوست العلاقات المهزومة!

()

أحيانا تبقى فيه حاجات لو عملتها هترتاح، لكن ما بتعملهاش، تشبّعك بالألم بيخلق بينك وبينه روابط خفية، لا إرادية في أغلب الأحيان، بتببطك عن تغيير وضعك بكل الطرق، ولو أضفنا لده انعدام طاقتك، وعدم ثقتك في أي شيء، واكتفاءك من كل شيء، هتبقى المحصلة: خط طويل من اللامبالاة بالعالم، وانتظار المزيد من سخافاته بحياد، وتساوي جميع الخيارات، وانتهاء جميع الطرق إلى نتيجة واحدة مفادها: مفيش فايدة!

()

إحنا بنختار غلط طول الوقت، بنختار اللي مش هيمسك فينا ساعة ما نحتاجه، ويفكر في مصلحتنا زي ما يفكر في مصلحته، وبنبقى شايفين ده ومتأكدين منه، ومع ذلك بنكمّل، بنمشي زي المنومين، وإحنا بنطمّن نفسنا إن المعجزة هتحصل أكيد، ويحبنا زي ما بنحبه، أصل ليه لأ، وإحنا قايدين له صوابنا العشرة حب!!

لحد ما تيجي لحظة المواجهة، لحظة الدخول من الباب الضيق، فنكتشف إن زينا زيّ غيرنا بالنسبة له: مجرد سلالم، ممرّات، نفق بيعديّ منه للناحية الثانية لعبادة ذاته!

()

أكثر الحروب قسوة، تلك التي نخسرها دون أن نعرف حتى أننا دخلناها!

()

مهما قرّبت من حد، وتخيلت إن ما عايش بينكم حواجز، بتفضل واقف عند عتبة معينة، سِدْرَة منتهى ما بتخطّهاش، فمهما يتتصّر إنك فاهم الشخص ده وعاجنه وخابزه، وعارف كل حاجة عنه زي كفّ إيدك، تصوّر بكيفي خاطئ وهزلي!

عشان كده بتتفاجئ في أوقات كثير بتصرفاته وردود فعله، وبتحس إنك ما تعرفوش، لأن دي الحقيقة فعلا: إنت ما تعرفوش!

طول الوقت، كلّ واحد منا جوّاه صراعات بيحاول يواجهها، ولعنات بيحاول يهرب منها، وميخّن وانكسارات بيحاول يداويها، وجروح بيحاول يضمدها، وخيانات وخذلانات بيحاول يتخطّاها، وده مش سهل، فلما بنتقابل للحظات في مشوار الحياة: بنخلق سياق مغاير للي إحنا غرقانين فيه، بس مش منفصل تماما عنه، ولا غير قابل للتأثر بيه، والانسحاق تحته أحيانا.

فيا ريت نكون أكثر رحمة ببعض شوية، أكثر فهما وتقديرا للضعف البشري، أكثر قدرة على الطبوبة وجبران الخاطر، وما نتعالاش على بعض، أو نستغلّ بعض، أو

ننتهز الفرصة ونطلع غلنا في اللي قدامنا، أو نحاول نلبسه العمه ونخليه يحاسب على مشاربنا ويدفع تمن غلطات غيره!

قليل من الرحمة فقط ما يحتاج إليه أحدا من الآخر في محنة الحياة، ليس الفهم الكامل، ليس المعونة الكاملة، ليس الدعم الكامل، فقط قليل من الرحمة، لتصبح أوقاتنا محتملة ولو درجة واحدة أكثر مما قبل لقائنا، وإلا فلا قيمة لهذا اللقاء، وقلته أحسن!

()

أكثر حاجة بنفتقدها في اللي سابونا ومشيو: إنهم ما عادوش هيعرفوا عننا أي حاجة؛ انتصاراتنا الصغيرة، هزايمننا، دموعنا، وحدثنا، كوايسنا، وجع قلوبنا لما النور يقطع، رعشة إيدنا لما العصفور -آخر ما تبقى منهم- يموت في القفص، عيوبنا اللي عالجنها عشانهم ومخاوفنا اللي اتغلبننا عليها بسببهم، طموحاتنا الجديدة وأحلامنا لبكره، لبسنا الجديد عشان نعجبهم، الأغاني اللي بقينا نحبها بفضلهم وشوقنا الجارف ليهم اللي ما عادش من حقنا نعبر عنه!

زي ما نكون ما اتقابلناش في العالم ده، أو اتقابلنا صدفة في مواصلة من غير ما حد فينا يلفت نظر الثاني، أو اتقابلنا وعيننا جت في عين بعض بس ما حدش عرف الثاني!

كانقطاع الحبل السري بينا وبين أمهاتنا مرة واحدة وللأبد، والاضطرار لمواجهة قبح العالم بمفردنا تمامًا، وتحمل نصيبنا من المسؤولية الثقيلة، رغم عدم استعدادنا لذلك نهائيا، رغم عدم رغبتنا في هذا نهائيا، ورغم أن القلب -ذلك الهش الهش!- لم يعد قادرًا على مقارعة كل هذا الوجع!

()

ساعات بتزعل على الفراق.. مش عشان انتهاء الحكاية، لكن عشان كنت مؤدب بزيادة وإنك واخد شنطة ذكرياتك وماشي، وما هزأتش الطرف الثاني ومسحت بكرامته الأرض، وواجهته بحقيقة انتهازيته وجبنه، واستحقاقه اللعن مع كل المهوسين بالأخذ دون العطاء، وتعشيم الناس -كذبا- بالنوال دون الوفاء، واللعب -عمدا- على كل الحبال، وعدم أهليته لتحمل علاقة حقيقية.

لكن.. تدور الدوائر دائما وتتبدل الأدوار في أي لحظة، فإذا الظالم مُنتَهَكٌ مخذول، والمظلوم مجبورٌ مسرور، والله من وراء الكل حكم وقدير.

()

لم أنسك يومًا، لكن غيابك أصبح كالعاهة المستديمة، كل يوم أستيقظ صباحًا لأنظر إليها، ولا أجد شيئًا في يدي لأفعله، فأشد الغطاء على عيني.. وأنام!

()

إننا بارعون في خداع أنفسنا، وصنع عالم كامل من الأوهام والصور غير الحقيقية، أساتذة في التقمص والتلهي واصطناع الحالات والمشاعر، والدخول من الأبواب الضيقة والشوارع الخلفية، فنانون في عدم الاعتراف بالواقع، والإصرار على حبس أنفسنا في فكرة، أو لحظة، أو حالة، لا عن كراهية لذواتنا، أو رغبة في التنكيل بها، لكن طمعاً في تحقق ما نحتاج إليه بشدة، وخوفاً من تغيير أوضاع اعتدنا عليها، وفزعاً من الخروج من المألوف لعشوائية الاحتمالات، ورعباً من أكبر شبح يخيفنا جميعاً بلا استثناء، ونهرب من الاعتراف به طول الوقت: الوحدة!

()

نحن لا شيء بالنسبة لبعضهم، لدرجة أنهم يتخذوننا مَعْبَرًا ينفذون من خلاله للطرف الآخر من التجارب والخيارات، ثم لا يكلفون أنفسهم حتى النظر إلى الوراء ليروا كيف أصبحنا أو كيف سنتعامل مع حقيقة أنهم -حرفياً- استعملونا ثم تخلصوا منا دون مبالاة!

عدم الإنسانية في مثل هذه التصرفات لا يقدر فقط في هؤلاء الأشخاص، إنما في الإنسانية عموماً التي أنجبتهم وأمدتهم بأسباب البقاء والخداع حتى اللحظة التي كشفوا فيها عن وحشيتهم، ثم هي تستمر في مداراتهم ونفعهم حتى يقرّروا هم أن يكتفوا أو لا يقرّروا!

أيام شريرة!

()

عندما تجلس لتراجع دفتر الخيبات، وتقلب أوراق الهزيمة، وتحاول تحديد مساحة الجرح التي تزيد باطراد، ووضع رقعة جديدة على ثقب الروح التي تتكاثر ذاتياً، وتتساءل: هل أحبنا أحدٌ من قلبه حقاً؟ تكتشف كمّ المغالطات المُرعِب الذي بلغته سعيّداً، والمواقف والعبارات والأحوال التي كان ينبغي لك الوقوف عندها، ولم تفعل، والأوهام التي كنت تنسجها وتعيش في ظلّها، دون حساب أو مراجعة، والنّذر والعلامات والإشارات التي لم يكفّ الكونُ كله يوماً عن إرسالها لك، ولم تكفّ يوماً عن تجاهلها، لقد كنتَ أنتَ أكبرَ عدوّ لنفسك وليس الآخرين، عندما لم تقدر ذاتك حقّ قدرها، وعندما سمحتَ لمن لا يستحق أن يدخل حرمك، ويسكن قلبك، عندما عشتَ كفيفاً وأنت بصير، وأصمّ وأنت سميع، وحزيناً نافرّاً موجوعاً مستلباً وعلى هامش الحياة، وأنت خليفة الله في أرضه، فيما أكملوا هم طرّقهم وأقدارهم، وعبروك بلا لحظة تردد واحدة، كأن لم تُخلَق، أو تلتقي عيونكم ذات حبٍّ، واليوم أنت -اعترف- لا تدفع ثمن طيبة قلبك ولا حبك ولا تضحيتك ولا إيثارك، إنما ثمن غبائك.

()

أحيانا لا تكون المشكلة الكبرى في الفراق، إنما في سهولة التخلّي، وسرعة البيع، ودقة توجيه الطعنة للقلب -فلا تقوم له قائمة بعد ذلك- في هوان الأيام

الحلوة، وسرسبة الذكريات كحفنة ماء من بين أصابع مفتوحة لا مبالية، في مفاجأة الفقد دون توقع، والعودة بلا وليف على غير انتظار، والاضطرار لبدء كل شيء من جديد!

()

فيه ناس وهي طالعة من حياتك، بتثبت لك إنك كنت حمار مرتين: مرة يوم ما عرفتهم، ومرة يوم ما أدركت استحالة استمراركم مع بعض، ومع ذلك كملت، خوفاً عليهم، وعلى ذكرياتكم سوى، وعشان كان عندك أمل يحسّوا على دمهم، ويبقوا بني آدمين في الآخر!

()

اللي بيبعدوا بمزاجهم فجأة، ويحطوا حدود بينا وبينهم من غير تبرير ولا استئذان، لأجل غير مسمى، لازم يتحملوا العواقب بعد رجوعهم: ممكن نكون لسه زي ما إحنا، وممكن نكون اتغيرنا وبقينا ناس تانيين، ممكن نلاقي مساحة ليهم ونتقبلهم زي ما هم، وممكن يكون أوانهم فات وأواننا بدأ.

ما دمنا ما كناش طرف في قرارهم بالبُعد، مش من حقهم يبقوا طرف في قرارنا بالاستمرار معاهم من عدمه.

()

اللي بيسجلونا معاهم، وبيخلّونا نتمنى الموت ساعات على وضعنا معاهم - اللي هو لا أون ولا أوف!- مش شرط يكونوا بيعملوا ده بوعي وبنية مبيتة للإيذاء.

كلّنا فطرتنا اتشوّهت وما بقيناش قادرين نشوف صح ونختار صح ونقرّر صح، كلّنا بقينا عاجزين نشوف الخط المستقيم أقرب طريق بين نقطتين واتعوّدنا نلف وندور حوالين الحاجات!

وساعات بيبقى مجرّد سوء حظ إننا نقع مع حد بيئذينا غصب عنه، وهو مش فاهم ده، ومش بيعمله عمدًا ولا فاهم بيعمل كده ليه، صحيح ده ما يعفيهوش من المسؤولية ولا بيخفف الوجع طبعًا، بس معرفتنا بده، على الأقل بتحط النقط على الحروف وتهدم أسطورة المظلومية اللي عايشين فيها طول الوقت واعتقادنا الكلاسيكي بعدم أهليتنا للحب.

المشكلة أن القلب لم يعد يتسع لمزيد من الطعنات والبهايل والمجانين والمخادعين والأفاكين والقُصّر والضالين والمرضى والمترددّين والباحثين عن تجارب مسلية والمعوقين فكريا والهائمين والخاذلين!

لم يعد يتسع!

()

محتاجين نقتنع إن الحاجات مشيت ومش راجعة تاني، والأشخاص فارقوا

حقيقي ورموا جذورهم في قلوب غيرنا واتخطونا، والطرق القديمة انتهت فعليا تحت رجلينا ومهما عاندنا القدر وكملنا فيها مش هتوصلنا لأي مكان.

لكن اعتقادنا الطفولي إن كل حاجة تمام ومفيش شيء اتغير وإنها مسألة وقت بس وكله هيظبط، بتحبسنا في دايرة اللافعل للأبد، وتخسرنا مش بس اللي موجود بالفعل لكن اللي جاي بعد شوية كمان، وبرضه اللي راح مش راجع! اللي راح مش راجع.

()

(أسهل حاجة بيعملها الراحل في العلاقة اليومين دول: يهرب!

ياخد اللي فيه النصيب ويقفل تليفونه، يعمل بلوك، يختفي، من غير ما يوضح بقى، ولا يبرر، ولا يصون العيش والملح ولا يقفل الأقواس المفتوحة ولا يجاوب علامات الاستفهام.

يهرب وبس، واللي يحصل يحصل!

الراحل عموما ما بيحبش يحسم، يمكن يحتاج العلاقة دي في يوم، يمكن الظروف تتغير، يمكن يجد جديد، فيحاول تاني يوصل الود، وساعات بينجح!

والثغرة الوحيدة في الحكمة دي: ربنا اللي ما بينساش، واللي بيدبر الأمر من فوق سبع سماوات، واللي قادر في لحظة يقلب الترابيزة على دماغ اللي ظلم واستهون وباع واستندل.

ساعات بنحس بضيق وخنقة وعدم قدرة على الاستمتاع بأي شيء، وما بنبقاش عارفين ليه، لكنه في الغالب بيكون ذنب ارتكبناه ونسيناه، قلب مسالم وأليف جرحناه في عز ما كان محتاجنا، مساحة بيضا لوّناها بسواد قلوبنا بدون مبرر.

بمعنى آخر: الفواتير كلها لازم هتتسدد هتتسدد، فادفعها بنفسك وفي ميعادها، قبل ما تتسدد غصب عنك بفوائد باهظة ما تقدرش عليها.

()

أكبر غلطة بنرتكبها عموماً في العلاقات: إننا بنعرض نفسنا!

يعني بنبادر بالإعراب عن المشاعر بعفوية، ونطلب نبقي مع بعض على طول، ونقترح نشاطات مشتركة نعملها سوا، ومساحات للمودة نكون فيها مع بعض، اعتقاداً إن تقييم الطرف الثاني هيكون زي تقييمنا للموضوع بالظبط، فيلا بينا نستمتع. (أمال بنتيل نحب ليه؟!)

بس في الوقت اللي بيبقى قصدنا حاجة، بيغهم هو حاجة تانية، وبيستخف بينا وبحماسنا، وبيعتر دي علامة على إنه أصبح شخص ما نقدرش نستغني عنه في حياتنا، ما يخوّله سلطة أكبر في التعامل معانا، ويدي له صلاحيات ما

خطرش ببالنا نديها له، وصولاً لأنه ممكن يزهدنا في اللحظة التالية لما يحس إننا مدلوقين عليه كده، وإن ما يقاش فيه تحدي يخوضه عشان ينال إعجابنا!

بمعنى آخر: العفوية والتلقائية في التعبير عن المشاعر، والصدق والأريحية والطيبة، غالباً بتوّدّي في داهية، لكن الخبث والحوارات والتقل والصنعة والإيحاء بإننا مش فاضيين له طول الوقت وإن لنا عوالمنا الخاصة وحياتنا، وكرم أخلاق منا بس إننا بندي له شوية وقت منها، هيخليه مشدود زي الوتر طول الوقت ومستني منا إشارة عشان يجري يلبي احتياجاتنا وهو مبسوط وحاسس بالإنجاز!

حكمة العدد: "التظاهر" و"الادّعاء" في العلاقات -للأسف!- سيّد الأخلاق!

()

اللي ما بيعرفوش يتعاملوا مع جانبك المظلم: مرتزقة مش أحباب، بيعين بالقطعة مش تجار شاطرين التجربة علمتهم ياخدوا كل حاجة باكديج واحدة وبعدين يتصرّفوا!

()

فيه حاجات/قرارات بتفضل تهرب من إنك تعملها، أو تقرّب منها حتى، لأنها آخر حاجة متوقّعة إنها تبهجك، وتغيّر مودك، وتحرك مشاعرك، فبتفضل تأجل فيها، وتماطل، وتسوّف، وتتحجّج، لأنك خايف تعملها وبرضه ما تحسّش بحاجة، وما تلاقيش نفسك، فتفقد آخر أمل في الخلاص!

()

فيه درجة مُرعبة من الوعي المُفْرِط بما يدور حولنا، بتخلينا عاجزين أحياناً عن إصدار رد فعل على مستوى الحدث اللي بتعرض ليه!

كأن أعصابنا هي التي بتغطّي جلودنا -مش العكس- وبتستجيب لكل شاردة وواردة بأعلى درجة من الحساسية والإدراك!

وفي الوقت اللي بنبدو فيه متبلّدين أمام الآخرين أو عاجزين عن الفهم، بنكون خطفنا رجلنا للماضي وافتكرنا كل هزايمنا المماثلة، ومدّينا شوية للمستقبل وشوفنا نهايات الأشياء والمصير اللي مستنينا!

وساعة ما بنوصل لسقف الانفعال، لأعمق حنة في الخذلان، لأقصى منطقة في المكابدة، بنفقد اهتمامنا تماماً بكل شيء، وبتستوي كل الخيارات، وبتتلاقى كل الطرق، حتى الوجد والفقد والخيانة والرجوع لنقطة الصفر ودفع تمن مشاريع غيرنا والنهايات الباردة الخالية من الدسم.. بتبقى مش مهم، وعكس المتوقع، بتتكوّن طبقة من الصلب على قلوبنا، ما يقاش سهل أبداً إن أي حاجة تخترقها مستقبلاً، حتى لو صادقة، حتى لو حقيقية..

درع.. بنكسب بيها حياتنا وأيامنا اللي جاية..
لكن بنخسر قدرتنا على الحب!

()

وصولنا للنهايات الكبرى للأشياء/العلاقات/المواقف، على قد ما بيبقى مُرعب ومَهول، وبننقيطيه طول الوقت، وبنأخّره على قد ما بنقدر، على قد ما بيكشف لنا آخرتها إيه، وبيحطنا أمام أسوأ كوابيسنا على الإطلاق، وبعدها ما بيبقاش فيه حاجة نخسرها!

وساعة الذروة -عكس المتوقع- جسمنا بيبقى متورّط تمامًا في الحدث، بكل طاقته وجوارحه وكيميائه، وحريص على إصدار ردود الفعل المناسبة، فيما القلب فارغ تمامًا، مُتعالٍ عن الحدث، محلّق، كأنه في كون موازي، حاسس بالراحة الأبدية، والسلام مع الكون كله، بلا حقد ولا ضغينة ولا خوف ولا انكسار.

لأن القلب لو تورّط هو الآخر في المعمرة، هيتفتت، ومش هنلاقيه تاني، فبيعزل نفسه عمدًا، بيشغل مزيكا ويشرب شاي ويدخن سيجارة في البلكونة، على ما اللحظة العصبية تنتهي، وبعدين يستلم الزمام مرة ثانية، لما بيبقى قادر يستوعب ويواجه، ويقوم بدوره.

الثُعساء اللي قلوبهم ما بتنزلش، وبتتورّط في اللحظة بكل جنونها وشجنها، بتنصر مع الأحداث، وتموت.

وبيعيشوا عمرهم الباقي كله.. زومبي.

()

كُتر الخذلان والخطأ في الحكم على الناس والمشاعر المهدرة ونفاد الطاقة، بيخليك -مع الوقت- تعمل سور حوالين نفسك، وتعزف عن التجربة، وتبطل تغامر وتدّي فرص للي يستاهل واللي ما يستاهلش على حد سواء، بعد ما إحساسك بالأشياء انعدم وبقت المحطات كلها شبه بعض.

واللطيف إن اللي تسبب في تحولك ده ممكن يكون أول من يتهمك بالغرور والتعالي، جهلا أو حمقا أو مزايده أو اصطيادا في الماء العكر، لكن بتكون بطلت تهتم بكلام أي حد أو تتأثر بيه.

ومع الوقت بينخفض سقف أحلامك، وما بيبقاش المطلوب حد تشعر معاه بالسعادة، لكن -زي ما بيقول علي سالم- حد تشعر معاه بأقل قدر ممكن من الألم!

()

في الغالب، لم يكن لأحدٍ أن يجرحنا، لو لم نسمح له بذلك!

()

التجارب التي نتعافى منها هي التي نستطيع تحديد مُدخلاتها ومُخرجاتها بوضوح: ماذا قدّمنا وماذا أخذنا، وكيف وصلنا إلى هذه النقطة، ولماذا. الحدود فيها -وإن كانت مؤلمة- واضحة ولها مبرراتها.

أما التجارب التي نموت ونحن نزحف للخروج من بين براثنها دون جدوى، فهي تلك التي لا نملك كشف حساب لها، فلم نعرف كيف تورّطنا فيها، ولا لماذا تحمّلنا كل ما جرى لنا خلالها، ولا إن كانت قد انتهت بالفعل، أم أنها في فترة كمون عابر لن تلبث أن تنهض منه لحظة نوشك على الخروج منها لعلاقة صحية أكثر.

لكن المشكلة الحقيقية أن العمر يمضي أسرع مما نتخيل، والطاقة تتبدد، والقلب مثل القلم الجاف الذي تُفرغه كثرة التجريب والشخبطة، حتى إذا احتجنا إليه لكتابة قصة عمرنا، لم نجد به ما يكفي لتدوين سطر واحد فيها!

()

وليس أكثر بُؤساً من أن تضحك على نفسك بسعادة زائفة، قوامها نسخ الأشياء والأشخاص والحالات، كي تسدّ جوعك للونس!

()

أسوأ ما في الدنيا: الفُرص "المواربة" التي لا تأتي حتى نعرف إذا كانت فرصة فعلاً أم لا. ولا تذهب، فنُخرجها من حساباتنا، ونبدأ البحث عن غيرها!

()

أغلى الأشياء كأرخص الأشياء، تنتهي الحاجة إليها بامتلاكها.

()

لماذا أغضبُ من الذين خذلوني، إذا كنتُ أنا نفسي قد خذلتني؟!

()

يا الله.. لماذا منحتني هذا القلب الذي يحنّ أكثر مما يغضب، ويسامح أكثر مما ينتصر لكرامته، ويلين أكثر مما يقسو، ويدنو أكثر مما ينال، حتى استحوّلت حياته ركضاً من وجع إلى وجع، ومن عشم إلى عشم، فأقام في الخوف وفي البلية وفي الانتظار، وكلما انداحت أمامه الجنة حتى أوشك، والنوال حتى مد أطراف أصابعه.. حُجب!

لماذا خلقتَ الحب والفراق والبدايات والنهايات والأمل واليأس والحزن
والمسافات والعشم والخذلان؟!
لماذا خلقتني؟!

()

فإذا فُتِحَ البابُ.. تَشَاغَلْتَ، وإذا أُغْلِقَ.. هَمَمْتَ. إذا لَاحَ ثَقَبٌ يَعاْفِرُ فيه النورُ..
جَفَلْتَ، وإذا أَطْبَقَ الظلامُ.. فَزَعْتَ، إذا بَدَّتِ المحبةُ.. تَغَاْفَلْتَ، وإذا حَضَرَتِ البغضاءُ..
اشْتَقْتَ. إنه قلبك الذي لا يعرف ماذا يريد من العالم، ولا يعرف أنه لا يعرف!

()

لما تلاقى كل الناس بتضربك بالقلم.. أول واحد هيبوس خدك هتجبه ولو كان
إبليس!

()

هل أحببنا حقاً، أولئك الذين تركونا خلفهم دون تردد في اللحظة التي استطاعوا
فيها الوقوف على أقدامهم دوننا؟

الذين لم يكلّفوا خاطرهم يوماً بالتفكير فينا، وما آل إليه حالنا بعدهم، ولم يشغلوا
بالهم بأي مما شاركناهم فيه عندما كنّا نعني لهم الكثير!

الذين لم يتذكرونا عندما استمعوا إلى أغنيتنا المفضلة، أو دمعت أعينهم عندما
زاروا الشوارع التي احتضنت أقدامنا، أو أحسوا بنغزة في القلب عندما قابلوا
الناس الذين شهدوا أيامنا معاً، أو تنهدوا في أسى عندما طوّفت حولهم ذكرى
لنا!

الذين مضوا كأن لم يخلقوا، وعبروا كأن لم تتقاطع طرقنا يوماً، واختفوا كأن كانوا
حلماً تبدد إذ فتحنا أعيننا على ضوء النهار القوي!

هل؟!

()

اللهم لا تربيّنّا بالفقد، وزوال النعمة، وكشف المستور، وتغيّر الحال، وانقطاع
الأمل، وعسر المعيشة، وأعدنا إليك يا رب من باب اليقين فيك، والأنس بجلالك،
والشوق لرحماتك، وتجلي آلائك، والطمع فيما عندك، والزهد فيما عند سواك.

على باب التعافي

نحن نعرف مَنْ نحن، لكننا لا نعرف ما قد نكونه.
شكسبير

()

التعافي من العلاقات المؤذية مش معناه إنك هتطلّع نار من بقلك وتعرف سر الثقوب السوداء وتوقّع شاكيراً في غرامك وتأخذ نوبل في الكيمياء، لكن إنك تقدر تدير وجعك وتتفهمه صح، وتتعامل معاه بشكل طبيعي ورحيم وبدون مبالغة أو صعبانيات ومظلومية.

معناه إن يبقى عندك رؤية أوضح لاحتياجاتك وكيفية التعبير عنها وتدور عليها فين وعند مين، وإنك ما تنجرفش ورا أي علاقة تقابلك في الطريق والسلام.

معناه إنك تبطل تجلد روحك، وتشوه قناعاتك، وتكسر كل القيم والمبادئ اللي عشت عليها، وتتحرك من أقصى اليمين إلى أقصى اليسار دون بوصلة ولا اتجاه محدد ولا وجهة تتوقع الوصول إليها.

معناه إنك تتعلم ازاي تتخلص من طاقة الغضب اللي جواك في مساراتها الصحيحة، من غير ما تطلعها على حد ملوش ذنب، وتعيد تمثيل مأساتك، لكن بوجودك في دور البطل المرة دي مش الضحية.

معناه قدرتك على الاعتراف بأخطائك في العلاقة، مش تحميل الطرف الثاني كل حاجة، لأن إحنا دايماً بنبقى مساهمين في وجعنا، سواء بتطنيشنا العلامات، أو الانبطاح تماماً أمام الطرف الثاني، أو سوء اختيارنا من الأول خالص.

معناه إنك تقدر تفصل بين مشاعرك وشغلك، وتفضل قادر تكمل في مسارات حياتك من غير ما تخسر الجلد والسَّقط، وحتى لو تعبان أو مخنوق بتعرف تلعب لعبة ترتيب الأولويات، ولو عايز تنهار.. تنهار براحتك بس في يوم ما عندكش فيه شيفتات!

التعافي رحلة أولها أصعب من آخرها، ملهاش كتالوج ولا وصفة سحرية ولا فيها ضمانات كافية، بنكتشف فيها نفسنا من أول وجديد، وبنعيد ترتيب الأهل والصحاب والعلاقات على مقياس جديد من واحد لعشرة، فيها ارتفاعات وانخفاضات، حاجات باهرة وحاجات موجهة، ممكن تعيد خلقنا من أول وجديد وممكن توئدنا!

لكن الأكيد إن سعيينا خلالها أفضل وأرحم ألف مرة من وقوفنا مكتوفي اليدين بنتفرج على حياتنا وهي بتتسرب من إيدينا بلا حول ولا قوة، أفضل وأرحم من تسليم مشاعرنا تسليم أهالي لمن يتصورنا ملكية خاصة يفعل بها ما يشاء!

أو كما قيل إن الزعيم أحمد عرابي قال: لقد خلقنا الله أحراراً، ولن نُستعبد -يا ولاد الكلب!- بعد اليوم.

()

فكرة إننا محتاجين في حياتنا أبطال خارقين، مُثل عليا، شخصيات عظيمة، عشان لما نقع نبص لهم ونستعيد قصص كفاحهم فيتخلق عندنا مبرر يخلينا نقوم ونكمل عشان نبقى زيهـم: خرافة، مجرد وهم ونوع من الأبوية اللي غرسته في دماغنا التربية الغلط، التربية الكلاسيكية وليدة الظروف الاجتماعية العجيبة اللي سادت مصر بدءا من عبد الناصر وإنت نازل.

لكن الحقيقة إننا أبطال نفسنا جدا، إحنا أسطوريين بالفعل، كوننا قادرين نقف على رجلينا لحد دلوقتي ونتحرّك لقدم.

كوننا قادرين نكافح ضد عبث ولا معقولية اللي بيجرى حوالينا طول الوقت، ضد السلطوية والتهميش ومحاولات تحجيمنا وزرعنا في “قَصَصَات” وقوالب حديدية، ضد الموت والمحو.. بالكتابة والرقص والتمثيل والرسم والمزيكا.

بنبسط من حين لآخر رغم كل شيء، وبنحب وبنتنجوز وبنسيب شغل ونروح شغل ثاني ونعيط ونضحك ونعمل ريجيم ونبطل ونتفجع أيام ونصوم أيام والحاجات تفرقع في وشنا ونبدأ من الأول ونلعب كورة في الشارع وستميشن على القهوة ونتعلم برمجة وفوتو شوب وناخد كورسات إنجليزي في معهد القوات المسلحة ونبعت سيفهات لمؤسسات دولية ونشتغل سيلز ومديري فِرَق ونروح السخنة ونستلف عشان نكمل الشهر وناكل فول من على العربية ونتعزم على أوبن بوفيه في فندق فخم ونلبس تيشيرتات تيمبرلاند مضروبة ونجيب كوتشي أديداس أصلي ونكتب فنعتل العالم ونفوق فناخد الجميع بالحضن، لينا أصحاب وأحبة وأعداء وكارير وحياة حتى لو مش مثالية فهي موجودة ونبذل كل اللي بنقدر عليه عشان نخليها محتملة ومكتملة، لينا طموحات وأحلام، حتى لو مش عظيمة، فبتحركنا وبتخلينا قادرين نحتمل اللي بنواجهه.

إحنا العاديين اللي مش عباقرة في أي حاجة بنعملها.. ولا وحشين قوي، واقفين في النص بين الفشل والإجادة المطلقة، بنحب بس ما بنتجوزش اللي بنحبه دايمًا، بنضحك بس مش من القلب قوي ساعات، أجسامنا مش رياضية بس مش بتعوقنا عن الحركة، مهارتنا في الشغل مش هتخلينا ستيف جوبز بس مش هتقعدنا في البيت، إحنا ملح الأرض، حشو الحياة. إحنا الحقيقيين.

()

التعافي من العلاقات المؤذية لا يعني التنصل من الأخطاء اللي ارتكبتها، ولا تحميل الطرف الثاني المسؤولية وحده، لكن وضع كل حاجة في حجمها الطبيعي بلا أفورة.

وعماده الأساسي: اعترافنا بسوء الاختيار وإدراكنا إن اللي إحنا فيه ما يناسبناش، وما بيشبعش رغباتنا ولا بيرضي طموحنا، وإننا نستحق أكثر وأفضل

من اللي رضينا بيه في ظروف معينة.

ومش شرط عشان نشفى نرد الإساءة بإساءة، أو نلغي تاريخ الأفعال الطيبة للطرف الثاني أو نحصره في أدوار الشر، ولا حتى نقاطه، كل حاجة ممكن تفضل زي ما هي مع إضافة تفصيلة صغيرة ليها اسمها: أنا أريد، مش أنت تريد بس، أو الظروف تريد، أو المجتمع يريد!

مجرد تعطينا لفردانيتنا واعترافنا بحقوقنا على نفسنا وسعينا لوضعها في حيز التنفيذ، بيغير قوانين اللعبة، وبيخلق مساحات جديدة للحركة وفهم الذات ويرجع كل واحد في حياتنا لدوره الطبيعي ومنطقة الفعل والتأثير اللي يستحقها، بلا وصاية ولا أبوية ولا حاجة للتبرير والتفسير، وبيكشف طرق جديدة وزوايا للرؤية وفرص حقيقية كنا محجوبين عنها.

وعلامه التعافي الكبرى: إحساسنا بإننا نشغل حيز من الفراغ في مواجهة الآخر، وتخلصنا -التدريجي- مما يمرره -طول الوقت- لنا من رسائل مفادها إننا مقصّرين في حقه، وبنعمل أقل من اللي المفروض نعمله، وإنه كتير علينا، واللي بيقدمهولنا أكبر بكثير مما نستحق، وإنه أكثر واحد في الكون حافظنا وعارف مصلحتنا وخروجنا من تحت جناحه هيخلينا منبوزين وبلا رفقة ولا ونس!

التعافي ثورة على القوالب الحديدية اللي حطونا فيها، ومحو لفكرة محدودية قدرتنا وعجزنا عن الفعل والاستمتاع بالحياة إلا برعايتهم السامية ووجودهم الطاعي في الصورة.

التعافي رفض للحب المشروط وتنظيرة إن فيه حد من حقه يمسك لنا (مازورة) يقيس بيها تصرفاتنا وأفعالنا، ويحاسبنا عليها وفق كتالوج غامض هو لوحده اللي بيملك سره، ومش مسموح لنا غير بس بالانصياع ليه، بعد اختلاط البشري بالإلهي في صورة إنسان فاهم كل حاجة أكثر منا وبيملك في إيده مفاتيح جنتنا وجهنما!

التعافي إننا نبقى إحنا، بخيرنا وشرنا وطهارتنا وفُجرنا وشجاعتنا وحبنا وتفاؤلنا ويأسنا وجنوننا وعقلنا واتزاننا وفقداننا السيطرة ورغبتنا في عمل أشياء عظيمة وتفاهتنا المفرطة.. إننا نبقى حقيقيين وصادقين مش مانيكانات لابسة على الموضة ومسرحية وغاسلة إيديها بديتول ومحطوطة في فاترينة حد ما بيعملش غير إنه يتفرج عليها كل يوم ويبتسم ويسلم على نفسه ويهنيها على العمل الفني العظيم اللي عمله!

()

الخير المُطلق مثل الشر المطلق، مَفْسَدَةٌ، لأن دوام النعم يزيل الإحساس بها، والامتنان لوجودها في حياتك، ويفقدها جلالها وفرادتها، لذا فإن ما مررتَ به من سوء ومن خذلان وانقطاع السُّبل، إنما كان من بين أغراضه، دفعك للإحساس

بقيمة ما تملك، ولطف الله الخفي بك، وجميل ستره لك، وآلاءه عليك التي –
صدقا صدقا صدقا- لا تُعدّ ولا تُحصى!
فاسكن.

()

أهم حاجة عند الناس: أنفسهم، وعشان تبقى ند ليهم، وتتجنب المظلومية والإحساس بالفشل طول الوقت، لازم يبقى أهم حاجة عندك إنت كمان: نفسك. وسر نجاح أي علاقة في الكون: الصراحة، إنك تحدد بمنتهى الدقة والتفاصيل هتدي إيه وهتاخذ إيه، إيه الحدود والواجبات. القديسين بس اللي بيتفانوا في العطاء دون انتظار مقابل، أما إحنا كبشر ملعونين بالحياة فمحتاجين نوضح حتى الواضح ونحسبها بطريقة مكسب وخسارة، ونرسم الإطار العام والخاص للعلاقة والطرفين يمضوا ويبصموا بعلم الوصول.

وفي المطلق: ما تأديش أكثر من المطلوب منك، وما تبذلش مجهود فوق طاقتك، وما تحمّلش نفسك ما لا تحتمل، عشان طاقتك ما تخلصش بسرعة وتلاقي نفسك بتنهج وإنت لسه في ثاني دور من العلاقة. كل ما تسترخي وتتعامل بطبيعية ودون تصنع أو بطولة زائفة وفي حدود إمكانياتك الحقيقية، توصل أسرع وأعمق وأقوى.

ولما حد يعمل فيك مقلب.. عادي، ما هو بني آدم!
ولما حد يخذلك ويستغلك.. عادي، إحنا نزلنا الأرض عشان تفاحة أصلا!
يحاول ياخذ وما يديش.. عادي، الابن دلوقتي بيقتل أمه اللي أهدرت عمرها عليه
عشان ما رضيتش تديله ١٠٠ جنيه!

فما تاخذش الأمور على صدرك، وما تعيش في دور الضحية، وتعتبر أي عتبه أو موقف أو خذلان نهاية الكون، وإياك والعشم وإياك والعشم إياك والعشم.
إنت في قطر، طول الوقت ناس هتنزل وناس هتطلع، ناس هتضحك وناس هتبكيك، ناس هتبتسم في وشك وناس هتتحايل عشان تقومك من كرسيك وتقعدهي جنب الشباك، عادي برضه.

واتعود ترتب الناس -بصرامة- في دوايرهم اللي يستحقوها، ده في دايرة الصداقة، ده العيلة، ده حبيب، وده زميل، وده علاقة مصلحة. تداخل الدواير والعجز عن التصنيف والهلهلية في إسكان الناس في أي حته، بيفرقع في وشك في النهاية، ويشوش الرسائل اللي واصله ليك واللي صادرة منك، وصولا لأنك تبقى تايه حرفيا ومش عارف إنت مين وعايز إيه من حياتك!

وأهم شيء: تبقى صاحب نفسك بجد، وتعرف تبسطها، وتهون عليها، وتتقبل مصايبها، وترحم أخطاءها، وتفتح لها سكك للنور مهما الضلمة تحاوطك، وتبطل مثالية وكلام كبير وتتعلم تعيش لنفسك بكل ما تحمله الجملة من معاني.

()

وجودك على الأرض يوم إضافي وإنت عارف اللي مستنيك: شجاعة حقيقية، وقوة كبيرة ممكن ما تتوافرش ليك بعد ساعة أو نص ساعة من دلوقتي!

أخذك النَّفَس بُطولة، حركتك لقدام بُطولة، ابتسامتك وركوبك المواصلات ومرواحك الشغل وأكلك وشربك وتدخينك سيجارة في زحمة الشيفت وكلامك مع الزملا وخناقاتك والشر من البقال والفكهاني ومرواحك للدكتور.. بُطولة.

لكن ما حدش هيصقف لك، ولا هيشد على إيدك ويقول لك برافو، لأن علاقتك بالآخرين أساسها الحَجَب والخداع والجهالة، بيشوفوك في نهايات الأشياء بس، بعد ما عديت كل شيء ووصلت لهم.

ما حدش ليه "أكسس" على روحك ولعناتها وتقلباتها المروعة وأفكارك السوداء الرائعة، ووجدتك المفردة الخالية من اللون والصوت والونس. الكل عايزك على الجاهز، لبسك مكوي وشعرك متسرَّح وجزمتك متلمَّعة، بتضحك وتتكلم وتنكت، ما بتغلطش ولا بتكذب ولا بتخون ولا بتضعف ولا بتطلع منك العيبة، وتقول بابا وماما لما يدوسوا على إيدك!

ما حدش عايزك "إنسان"، لكن موبايل أو تابلت فيه أحدث الخصائص والإمكانيات، تاتش وبلوتوث وجي بي إس وصوت دولبي وأتوماتيك باك أب وسمارت أسيسانس وبطارية ٤٠٠٠ أمبير ما بتفصلش!

ولما بتضعف تحت وطأة الاحتياج، وتدخل حد -أي حد!- جوا ضلمتك، بعد إلحاح وتحايل وعود ومظاهر خادعة إنه مختلف، بيتشجّع في الأول بس شوية ويحاول يضحك، ويتظاهر باللامبالاة وأسد يله فيه إيه، ويقنعك إنه زيّك تمام، والههم واحد والجرح واحد، لكنه بعد شوية، لما بيشوف كراكيك النفسية وأصنامك وخرابك ويلمس دمك المهدور في كل مكان، بيتسرع ويصرّخ زي العيل الصغير ويتنطط عشان يهرب.. ويهرب بأبشع طريقة ممكنة!

بس جيس وات؟ ساعات الحياة بتبقى أجمل من غير اللي اتصورنا إن حياتنا هتقف من غيرهم، من غير عبء إسعادهم والحرص على مشاعرهم والمجي على نفسنا طول الوقت عشان نبان قدامهم أقويا وكبار وناضجين وقد المسؤولية، إحنا محترفي صناعة وهم وتعلق بالأشخاص والحالات الغلط، أساتذة في الانهيار أمام الأبواب المغلقة والشبابيك المسدودة بخشب قديم ومسامير مصدّية ما بتتخللوش الشمس، في حين إن الأمر أبسط من كده بكثير: كله رايح حرفيًا، مفيش أفضلية لحاجة على حاجة، ولا معنى لحاجة عن حاجة!

غيرش إحنا بس اللي غاويين دراما وأفورة ومُثل عليا وكلام كبير واستنساخ التجارب وتكرار حكايات غيرنا، في حين إننا -كلنا- أتفه -بكل ما تحمله الكلمة من معاني- من إننا نعمل فرق أو نمثل أهمية أو يكون لينا دور في أي حاجة!

الحياة محنة حقيقية، وابتلاء عظيم، ما قدرتش الجبال نفسها تتحمّله، ولبسه

الإنسان التافه الأهل المغرور، فليس أقل من إنه يحاسب على المشاريب لحد آخر نقطة دم من غير ما يكون له الحق يفتح بقه أو يعترض. وده اللي بنعمله فعليا كل يوم: بندفع التمن دمة دمة لحد ما نسدد كل اللي علينا ونمشي من هنا.

()

التظاهر درقة بتحمي أرواحنا من الخدش، وبتأخر شوية أجل مواقعتنا للحقيقة، ويوم ما بنفقد الدرقة دي.. بنبقى أعصاب حية عريانة من غير جلد ولا عضم، أي حاجة وكل حاجة بتأثر فينا!

وكل معاينة للألم، كأننا بنكتشفه من أول وجديد، لأننا ما بنقاش قادرين نصدق بسهولة إن حبايبنا هم اللي عملوا فينا كده، وإننا هُنا عليهم للدرجة دي بعد كل وعودهم اللي لسه بترن في وداننا!

لكن في النهاية بتوصل لنفس النتيجة: إنت لوحدك تماما في مهب كل حاجة، لا الوعود بتصدق، ولا الحكايات بتكمل، ولا المشاعر ليها قيمة، كل اللي كنت فيه وهم صنعه احتياجك، وغطا بتستخبي تحته من مواجهة وحدتك المفردة!

وسواء داقوا من نفس الكاس أو ما داقوش، وجعك مش هيقول، وصدمتك فيهم مش هتخفت، ومفيش حل غير إنك تمد الخطاوي وتمشي لقدام، حتى لو كل حد بيعدي بياخد حنة من القلب وهو مفارق، لحد ما القلب بيتآكل وما بيفضلش منه غير ثقب أسود ما بيعكسش أي ضوء، ما بيعكسش غير وجيعة! مد الخطاوي.. وامشي لقدام.

()

فيه ناس بيخلّونا جنبهم، مش بيحبّونا ولا بيكرهونا، هم شايفينا فرصة بتديهم أمل في نفسهم، وترضي غرورهم، فمستخسرين يضيّعوها، ومستنيين يخرعوا شكل للعلاقة ما يحملهمش مسؤولية تجاهنا وفي الوقت نفسه ما يخليهمش يخسرونا، ويبقى الحال على ما هو عليه!

الناس دي بتئذينا أكثر من أعدائنا، وبيشوّوها علاقتنا بنفسنا وبالحب وبالحياة نفسها، لأننا بنفضل في حيرة مضنية طول الوقت، بين إننا نبعد فنخسر ما نظنه فرصة للسعادة، أو نستمر في القرب فنخسر ما هو أهم وأخطر: إحساسنا، وغالبا الموقف ده بينتهي بدراما مروّعة، بانكسار أحد الطرفين! وصحيح مفيش حل سحري لإنهاء الوضع المأساوي ده، لأن التعود بيبقى أشد تأثيرا من الحب، وتغيير عاداتنا صعب جدا وأحيانا مستحيل، لكن برضه استمرارنا في النزيف بالشكل ده بيهدم إحساسنا بالحياة، لدرجة إن حتى لو أملنا اتحقق،

ممکن ما نحسش بطعمه، فلأزم -بجدعنة- نقف ونبص إحنا فین من التجربة،
وفیه طاقة نور ولا نتکل علی الله، إلا بقی لو مستمتعین بالمظلومية والألم
والعذاب والشکوی!
والضمانة الوحيدة المؤکدة إن غریزة الحياة جَوّانا -غصب عننا- أقوى مما سواها،
یعني حتی لو هنتعذب ونتعب شویة، فهنقف علی رجلینا تانی، ونکمل،
مکسورین ومخدولین، بس واقفین علی رجلینا، وفي يوم هنلاقي اللي یطّب
قلوبنا.
فخد القرار واهرب.
إنت تستحق حياة كاملة وحقیقة ومتفصلة علی مقاسک.. مش بواقی حياة حد
تانی.

()

طول الوقت بنخسر معارك، وناس، وفلوس، وعمر، ومواقف، فنتخیّل إننا فاشلین،
وما نصلحش للحياة، وده ممکن یكون صحیح بالمناسبة فی مرحلة من المراحل،
لکنه مش لعنة أبدیة، ولا حکم نهائی غیر قابل للنقض، لأننا بنتعلم مع الوقت -
غصب عننا- حاجات کثیر، وبنکبر، وبنفهم الدنيا ماشیة ازّای، وبنملك حکمة
خاصة بینا، وعلى مقاسنا.

فحتى الخسارة، بطريقة أو بأخری، بتتحول لربح علی المدى الطویل.
ومش کل خسارة، لازم نكون إحنا السبب فیها، لأن الثابت إن الحياة ملیانة فعلا
ناس زبالة، بتستغلنا وتستغل حیاننا وأدبنا وأخلاقنا، عشان توصل لأغراض
دنیئة، وتحقق مکاسب علی قفانا، ومش معنی انتصارهم إنهم علی حق أبدا،
ولا معنی سیادتهم وتمتعهم بكل شیء وإفلاتهم من العقاب لحد دلوقتی، إن
ربنا موفقهم، وإننا علی باطل.

كما أن اجتماع الکثرة علی شیء، لا یعني أبدا إنه صحیح، افکر إن قریش کلها
کانت ضد راجل واحد، وفي القرآن نفسه ربنا بیقول (ولکن أكثر الناس لا یعلمون)،
(بل أكثرهم لا یعقلون)، (فأبى أكثر الناس إلا کفورا) أي إن الأكثرية فی الغالب
بلح!

الزبالة هیفضلوا زبالة، والنضاف هیفضلوا نضاف، والكذب والخيانة والغش
والمراوغة وقلة الأصل، هیفضلوا نواقص وعیوب قاتلة، مهما أصحابهم قبّوا علی
وش الدنيا، ودانت لیهم الدنيا. ولحسن الحظ، إن الحکایة مش دنیا بس، فیها
جولة تانیة، وساحة تانیة للعدالة، هتترد فیها کل المظالم، مهما کانت قوة
وجبروت الآخذین والناهبین.

ما دام لسه فینا نفس، هنکمل، وهنقف علی رجلینا مهما وقعنا، ونحاول نوصل،
ونتخطی العقبات، لأن إرادة الحياة جَوّانا أقوى من إرادة الموت، ربنا خلقنا کده،
وهو عالم بضعفنا وباللي بیجرى لنا فی کونه، وهو لا یضیع أجر المحسنین.

()

لو عرفت امتى تسيب، وتمشي، وتفارق، وتتخلى، هتوفّر على نفسك زفت كثير!

()

لو سبيت ضرسك مسوّس، أو رحت للدكتور يخلعها، وخط لك "بنج" مضروب، في الحالين هتتألم بقسوة، لكن على الأقل في الحالة الثانية، هتبقى سعييت وقاربت وعملت اللي عليك، مش رافع إيدك لفوق ومستسلم تماما للدهس! فلما تتخط في خيارات كلها فيها ألم: اختار الألم اللي ياخدك على سكة الخلاص والتخلي والتجلى والسكون في نهايته، ولو بعد حين.

()

ما تستهونش بالتجارب اللي بتمرّ بيها، وتعتبرها تافهة أو غير ذات قيمة، عشان ما خرجتش منها بالنتائج اللي كنت متوقعها أو محتاجها. كل اللي عدّيت عليه بيتستفّ في دماغك، ويتشال لوقت عوزة، ويساعدك على الفرز والاختيار، ويفتح لك مساحات جديدة من المعرفة والقدرة على اتخاذ القرار طول الوقت.

وبتستوي في ذلك التجارب الطيبة والشريرة، المضحكة والمؤلمة، اللي علّمت على روحك واللي مرّت كآثر الفراشة دون أن تُرى!

وطول ما إنت عطشان للمعرفة، وللفهم، طول ما إنت مش لاقى نفسك، ومش حاسس إنك واقف في المربع بتاعك.. جرّب، ما تخافش، وما تكسلش، وما تهادنش، وما تقبلش آراء مُعلبة ووصاية ونصائح ناس، ولا تعرفك، ولا تعرف ظروفك، ولا تعرف الكركبة اللي جوّاك.

في التجربة زي الهرش بالطبط: ما حكّ جلدك مثل ظفرك.

()

الناس بتبص على اللي إنت وصلت له بس، وما بتفكّرش إنت جيت هنا ازاي، ولا التمن اللي دفعته من وقتك وصحتك وأحلامك. وممكن كمان تستكتره عليك!

زي الراحل اللي طلب من رسّام يرسمه، فخلّص البورتريه في 6 ساعات، وطلب مبلغ كبير، فالراحل استغرب وقال له:

- إنت رسمته في وقت قصير جدا ما يستحقش المبلغ ده!

فالرسام قال له:

- أنا قضيت من عمري 20 سنة بتعلم وبذاكر وبصرف وبحرم نفسي من حاجات

كثير، عشان أقدر أرسم الرسمة في الوقت القصير ده، فأنا باخد أجر خبرة العشرين سنة مش الست ساعات!

فملعون أبو اللي ما بيقدّرش يعني، أو بيستخف بينا، أو بيزايد علينا، أو مستهون بالمشوار الصعب اللي قطعناه، وأدينا قاعدين أهو نتفرج عليه، عشان نشوف هيبقى مارك زوكربرج في نفسه امتى!

()

بعد شوية انبهار -وقليل من اللخبطة- بأي عالم أو مجتمع جديد بتدخله، بتبدأ تتوازن وتشغل مخك وتعمل فرز وتصنيف وتختار اللي يناسبك منه، واللي ماشي مع خطك العام في الحياة، وتضيفه لمستودع قيمك، وبتفهم إنك عشان تنتمي لمجتمع ما مش لازم تحاكيه بالمللي وتبقى انعكاس كامل ليه، خالص، لكن بتاخذ منه وتديله، ولو ما تقبلش اختلافك ما يبقاش بتاعك.

والصراع بيقع لما تتصور إنك كل مرة لازم تهد وتبني من جديد وتتبرأ من الماضي عشان يبقى لك مستقبل، ولما تحاول تكون شخص غير حقيقتك.

صحيح لازم نغير ونتطور ونتكيف، لكن فيه (جوهر) بيفضل ثابت وأصلي ومطلق، ولو اتخدش أو اتشوه، عمرك ما هتحس بطعم أي حاجة في الدنيا.

فخلي بالك وإنت بتقطع الرحلة الصعبة من مكاسبك وخسايرك وجوهرك، ومن حين لآخر افتح الخريطة واتأكد إن الطريق اللي إنت ماشي فيه ده ليه نهاية.

()

مش معنى إنك تعافيت من تجربة، كلياً أو جزئياً، بعد وقت طويل أو قصير، إنك ما كنتش صادق خلالها، أو مدّعي.

مش استمرارك منهار وضايع ومش عارف تعمل إيه بحياتك هو الدليل على إنك صادق، الصدق من عدمه بيبقى ساعة التجربة، ساعة الهول الأكبر، وده اللي تتحاسب عليه، لكن بعد كده، إنت بين إيدین ربنا، ممكن تطلع بكسر في ضلع أو 24، بإعاقة ظاهرة في مشاعرك أو خفية، بخبطة مطواة في قلبك أو دعامة، وممكن ربنا يهبك النسيان أو السلوى أو السكون للحال اللي ابتليت بيها، كل شيء عنده بمقدار، وزى ما اللقا رزق، والفراق رزق، خساير ما بعد الموقعة رزق برضه، وإنت مش مدين بالاعتذار لأي حد عن وقوفك على رجلك، ولا دي حاجة محتاج تخبيها وتخجل منها، وزى ما كنت لوحدك تماماً في بير الألم، بلا أخوة يوسف، ولا حيل تتسلقه، ولا سيّارة يلتقطوك، فإنت لوحدك تماماً في الانتصار، والعبور، والتخلي، ومحاولة ترميم ما انصهر.

ما تسببش حد يبتزّك، أو يسقّه من قدرتك على الوقوف على رجلك، أو يُلزمك تفضل في قالب معين وبرواز حديد هو اللي راسمه على مقاسه، لِمَا يجب أن يكون عليه المُخلفون، والذين لفظهم أحبّائهم، وخذلّوهم، وإلا تبقى وحش وما

حببتش بجد وابن كلب!

ما حدش بينفعك وقت حزنك، فما تسيبش حد يزايد عليك وقت خروجك للشمس.

()

أصبحتُ على يقين أننا نحتاج إلى الهزيمة كي نغادر أماكننا الآمنة الضيقة ونقفز في البحر الهائج، فنرى أبعد وأعمق وأصدق.

الفوز يُبقينا بَطًّا سعيدًا مستسلما في البركة التي وُلد فيها، فيما الهزيمة وحدها تُرمم يقيننا في الأشياء، وتهبُّ القداسة للوعي المُفرط بالألم، وتتجاوز بنا إلى الشاطئ الآخر مما نستحق أن نكون عليه.

لذا أقول لكم: أحبّوا هزائمكم، باركوا سقوطكم، أحسنوا إلى من سلخوا أرواحكم، وصلّوا لأجل الذين رَوّوا حدائق الحقد في قلوبكم، لأنكم هكذا تصلون إلى مفاتيح كل شيء، من الطريق الصعب غير المعبّد، من الباب الخلفي.. تصلون وتلمسون وتعاينون، فتحيون حقًا.

()

ساعات كثير انبهارك -أو إحساسك بالنقص أو رغبتك في التغيير أو خوفك- بيخليك تقلد اللي عايشين الحياة اللي نفسك تعيشها.

والتقليد في حد ذاته مش عيب، بالعكس، ده وسيلة من وسائل التعلّم واكتساب الخبرات، بس مش كل حاجة هتليق عليك، فلما تقلد، قلد اللي متّسِق مع طبيعتك وملائم فعلا لتركيبتك النفسية والجسدية والاجتماعية، أما لو قلدت العاقل في الباطل -فطال الوقت أم قصر- هتتكشف، ومش هتقدر تكمل، وهتزوّد عقدك النفسية.

ومش شرط عشان إنت ما بتشتغلش بيقى اللي بيشغل متحقق تمامًا وما عندوش مشاكل، وعشان إنت مش خاطب بيقى اللي خاطب عايش حياته فرفشة ونعنشة، وعشان ما عندكش عربية، بيقى اللي عنده مقضيها فسح وحركات ولا في دماغه!

مظاهر الناس بتقدم 1% بس من حقيقتهم، وده ما يصلحش أساسا للحكم على نملة حضرتك، مش كائن حي مليان تفاصيل وخفايا ودروب معتمة وحكايات وتاريخ. ثم ليه الحكم أصلا على أي حد؟!

ما تسيب اللي ماشي ماشي، واللي راكب راكب، وادي اهتمام أكبر لمشاكلك إنت.

مش عيب تكون ما بتعرفش تلبس على الموضة، أو مش عارف أنواع المشروبات

اللي في منيو المطعم اللي أول مرة تدخله، أو معندكش عربية، أو ما رحتش شرم والسخنة، أو.. أو...

العيب إنك تفتكر الحاجات دي هي اللي هتخلي لك قيمة وسط الناس! إنت القيمة.

()

مش كل الناس اللي بتحبهم، هيفضلوا جنبك للنهاية، ولا هتفضل علاقتك معاهم بالقوة نفسها، ولا مشاعرك ناحيتهم بنفس درجة التوهج، ولا احتياجك ليهم بنفس السعار، الواقع أكثر تقليدية مما تتخيل، أكثر فقرا في الخيال، وأسخن العلاقات بتنتهي نهايات باردة تثير الغيظ، وأحرّ المشاعر بتنزل على فاشوش في الآخر!

طب إيه بقى؟

اهدى شوية، اهدى، ما تبقاش درامي، وما تاخدش كل حاجة على صدرك، واعتبرها رحلة يا أخي، مفيش فيها أي محطة نهائية، ولا لازم تفضل فيها غصب عنك، غير الموت.

()

كنت بحيب خضار للبيت امبارح من راجل بتعامل معاه بقى لي شهر. اشتريت الطماطم والخيار والبصل والبطاطس وفاصل الفلفل، ببص لقيته دبلان ومش سليم (وأنا ورايا في البيت جهاز الرقابة الإدارية بيحاسبني على الطمطماية حرّتك)!

أول حاجة عملها عقلي إنه أقنعني أدور في اللي موجود وأطلع منه السليم وخلص، وبدأ يرض لي أسبابه:

١. الحتة حر جدا ومش ناقصة مشي.

٢. ممكن أروح لغيره ما ألاقيش فلفل أو ألاقيه أسوأ منه.

٣. الفلفل مش أهم حاجة في الحياة، فممكن ما أجيبوش النهارده أصلا!

وفعلا استجبت لا شعوريا وبدأت أنقي من المتاح، بس بعد شوية فقت فجأة وسألت نفسي: الله! وإيه اللي جابرني يعني، طب ما أجيب من غيره! هو ماسك عليا سيديها مثلا؟!

وفعلا حاسبت على اللي خدته وطلعت اشتريت الفلفل من حد ثاني، وكان صابح وبرنس في نفسه وأمور وأرخص نص جنيه، إنت متخيل يا مان يعني إيه نص جنيه؟!

وانتبهت إن ده اللي بنعمله حرفيا في حياتنا!
بنستحمل اللي نعرفه حتى لو معطوب، ونفضل نتعامل معاه، ونلتمس له الأعذار
والحجج بالحق وبالباطل، كسلا ربما، خوفا من تجربة الجديد ربما، جبنا من
عواقب قد لا نتحملها ربما، أملا في حدوث معجزة تغيره ربما!
المهم نلبس نفسنا العمة بأي طريقة!
لكن لما بنكسر الطوق الحديدي، من شدة الألم أو الوصول لقاع اليأس، بنشوف
دنيا غير الدنيا وبتفتتح قدامنا خيارات أجمل وأكثر ملاءمة لينا!
خيارات نستحقها لأننا دفعنا تمنها بالفعل.
فما ترضاش بالفلفل أبدا إلا لو كان صاحب يا زميلي.

()

النوال ثم الترك، الوصول ثم المفارقة، الحيازة ثم فقدان، درجات سلم بنطلعها،
وكشوف وفتوح بتُتاح لينا، وتجليات بتتنزل علينا، عشان نكتمل ونرتقي، ونُكمل
قَدَرنا، ونتواصل مع ذواتنا الحقيقية، ونعرف ماهيتها، وحدود تحملها وآفاق
انطلاقها.

بمعنى آخر: هي محن ظاهرها العذاب وباطنها كامل الرحمة والوداد، أو كما قال
الإمام علي: (اطلبوا الحاجات بعزّة فإنّ الأمور تجري بمقادير).
فلا تجزع.

()

اللي حواليك بينتقدوك ويزايدوا عليك ويهاجموك ويستخسروا فيك الفرحة
والتحقق، من غير ما يعرفوا إنت عملت إيه وخسرت إيه وضحيت بإيه عشان
توصل لمكانك ده!

بيحكموا على الظاهر دون الباطن، على صور فيس بوك وإنت في كافيه مع
صحابك، أو مسافر في رحلة سريعة أو بتتكلم عن انتصاراتك الصغيرة أو بتحتفل
بانجاز ما، لكن حد بيبقى معاك بالليل وإنت ليوحدك بتبص للسقف، وتحط شاش
وقطن وطبطبة على جروحك وخذلاناتك، وترقع فراغات اللي مشيوا فجأة بدون
سبب، وتتدرب على الضحك والابتسام في وشوش اللي ملهوش ذنب يشوفوا
وشك الحقيقي؟

حد بيبقى معاك وإنت بتجز على سنانك عشان تقفل محبس الدموع غصب
وتعض في المخدة عشان تكتم الآه، وتقدر تخرج لمواجهة العالم بكل زيفه ونفاقه
وعبثيته وقبحه؟

حد بيبقى معاك وإنت هايم على وجهك في الشوارع، مش لاقى مرسى، ولا

صديق يواسي، ولا إيد تسند معاك، ولا براح خالي من ذكريات جارحة ووشوش خائنة؟

يبقى كمل طوافك حوالين ذاتك ودوس وعدّي وتجاوز. أكبر عقاب للي ما فهمكش ولا حسك ولا قراك ولا قدرك.. إنه يخسرك وما تكونش في حياته ثاني.

()

يبدأ النزيف، عندما تقاوم ما لا ينبغي مقاومته، أو تتعامل بالمنطق، مع ما لا منطق له.

استسلم للفيض، وعش اللحظة التي ربما لا تتكرر ثانية في حياتك.

ما الذي وصلت إليه عندما راعيت كل الناس إلا نفسك، وفكرت في كل شيء إلا مشاعرك؟

وهل يحدث شيء في كون الله ضد إرادته؟

الله أراد هذا فوضعك في طريقه.

الله عرف عنك ما لم تعرفه عن نفسك، فغرزك في التجربة، ولم يبق سوى أن تفهم كل هذه الإشارات، وتعبر.

فاعبر.

()

لما بتخرج من علاقة، عادةً بتيجي عليك فترة رمادية عجيبة، لا إنت قادر تنسى اللي فات، ولا قادر تتورط في حاجة جديدة! لا إنت قادر تسامح وتجاوز، ولا قادر تفضل عينك في عين الذكريات 24 ساعة!

بتحس إنك مُستهلك، تايه، وحيد، وغير صالح للاستخدام الآدمي، فيك حاجة اتعطلت وباظت للأبد، وكل شيء حواليك مهما كان تافه بيستنزفك: الصوت العالي، خناقة الأجرة في الميكروباس، صوت العيال في الشارع، خروجات أصحابك، طلبات أهلك في البيت...

والأكثر خطورة: وقت الفراغ المرعب اللي بتلاقيه بين إيديك فجأة، اللي هو: أنا كنت بقضي الوقت ده ازاى قبل ما أعرفه؟ ودي اللحظة اللي ممكن تعمل فيها حاجات غبية كتير، وتتورط في تجارب عشوائية ملهاش مستقبل، لمجرد إنك تتشغل وتهرب من التفكير.

والحل؟

خليك طبيعي، ما تمثّلش، وما تعيش في دور سوبر مان الذي لا يُقهر، ومفيش حاجة بتأثر فيه، لما تحب تعيط.. عيط، لما تحب تقفل تليفونك وتختفي وما تكلمش حد.. اقل، لما تحب ما تخرجش ولا تروح الشغل.. نقّص، ما تعملش حاجة غصب عنك أبدًا، وخذ الأمور نقلة ورا نقلة، وراقب نفسك بحذر، أول ما تلاقيك منجذب لحد، وقف كل حاجة، ده مش انجذاب، إنت في فترة نقاهة ودي

محاولة لاستعادة ثقتك في نفسك، مش جدعنة إنك تبهدل حد معاك، والأهم إن ده مش هيحل مشكلتك، بالعكس، هيزود ذيولها! التاريخ والواقع والتجربة بيقلوا إن مفيش حاجة مؤبّدة، وكل حاجة فعلا بتنتهي، لما وقتها بيحين: الفرح بيتنتهي والحزن بيتنتهي، الحلو بيتنتهي والوحش بيتنتهي، الحياة نفسها بتنتهي!

يعني كل اللي إنت فيه ده، على صعوبته وألمه وجحيمه وبشاعته: هيتنتهي. وهتفتح قدامك سكة جديدة، وعلاقة جديدة، وتحدي جديد، غريزة الحياة جواك أكبر من كل اللي بيتهدر منك ده، وفيه قدر لازم تنفذه، وحكاية لازم تكملها. والسبب الحقيقي، زي ما هتفهم بعدين، لانتها العلاقة، مش أخطاءك ولا أخطاءه، ولا إن حد فيكم وحش والثاني حلو، لكن إنكم مش نصيب بعض!

اعتبر كل اللي بتقابه في طريقك: محطات، بتزود فيها بالوقود والخبرات وتتعلم السواقة وتفادي المطبات والتغريز يمين وشمال، ولو بالطريقة الصعبة وبتمن كبير، لحد ما توصل لتجربتك الحقيقية اللي هترجع تستخدم فيها كل اللي مرّ عليك وتعلمته، بس بحرفة بقى وبمعلمة.

المهم لما اليوم ده يجي، تكون مستعد له، وتعلّمت فعلا من اللي فات، عشان ما تكرر الأخطاء نفسها، وتقفل عليك الدائرة، وتعيش مأساة إغريقية ما بتنتهش إلا عشان تبدأ!

()

مقاييس ربنا مختلفة تمامًا عن مقاييسنا، ونظرته لنا غير نظرة الناس أو حتى نظرنا إحنا لأنفسنا، لأنه الصانع الخبير بعيوب ما صنع ومميزاته، مصمم كتالوج السير وخطة الحياة، وارتكازات القوة ومهاوي الضعف وواضع برنامج التشغيل، وفي اللحظة اللي بيتعامل فيها الناس معانا بالقطعة وبالموقف وبالظن وبالتوقع، ربنا بياخدنا بالكلية وبشمول المعرفة وسبق العلم، عشان كده بننبر من عطائه، ونتعجب من ستره لنا في المعاصي، ووقوفه جنبنا في المصائب رغم ثقتنا إننا لا نستحق.

الله ليس محاسباً مهمته جعلنا ندفع الثمن بالمليم، وإنما طبيب، يسعى لاستئصال أمراضنا، وتوطين أنفسنا على حسن الاختيار، وصولاً لتحقيق الفريضة الغائبة: راحة البال وهدوء السريرة، واكتشاف سر وجودنا على الأرض، ومحاولة التماس السبيل للعودة مرة أخرى لموطننا الأول.. الجنة.

()

الفرح زي الحزن. واللذة والألم ولاد عم. والشهوة والانطفاء التام وجهان لعملية واحدة. فما تاخدش الأمور على صدرك قوي يعني!

()

فيه معلومة هتعرفها بالتجربة العملية مش لما حد يقولها لك: اللي بتجني ثمرته النهارده، غالبا مش اللي زرعتة امبارح ولا أول، لكن من سنين طويلة، لدرجة إنك

نسيته.

مفيش شغل بيروح هدر، ولا دعاء بيرجع خالي الوفاض، ولا تجربة بتصفصف على مفيش، ولا أي حركة بتأخذها ملهاش مردود، الفكرة بس إن حساباتك غير حسابات ربنا، وتقديرك للزمن غير تقديره.

واللي إنت مستعجل عليه وهتموت لو ما أخذتوش دلوقتي، ممكن يكون فيه هلاكك لو اتحقق فعلا، واللي إنت كارهه دلوقتي ومش طايقه، لو جالك في وقته ممكن يغير حياتك.

فما تشغلش بالك بالنتيجة وما تحاسبش ربنا وتقف له على الواحدة، ازرع ومد الخطوة وكمل وادعي واتشقلب وهات آخر كل الحاجات، عشان بعد كام سنة تمد إيدك بقلب جامد وتقطف.

()

إحنا فقدنا قدرتنا على الاستمتاع بالحياة يوم ما فقدنا قدرتنا على وضع أهداف طويلة المدى لوجودنا.

يعني الأكل واللبس والنوم والشغل والقُسح والعلاقات، أهداف قصيرة المدى، ومهمّة جدا، بس كده كده بتخلص وتتجدد كل فترة بأشكال مختلفة وبصيغ مغايرة. لكن إيه اللي وراها؟

بمعنى آخر: بناكل ونلبس وننام ونشتغل ونخرج، عشان نوصل لإيه في الآخر؟

إيه "الفاینال دستنيشن" اللي عايزين نروح له؟

إيه النقطة اللي هنتوقف عندها ونقول إننا أنجزنا وحققنا، ونلتقط أنفاسنا عشان نبدأ رحلة البحث عن نقطة تحقق أخرى؟

مفيش!

لما تتكلم مع حد تلاقيه مفرّغ وجوده تماما من أي قيمة.

معطل ملكاته وقدراته وميسلسل نفسه في احتياجات بيولوجية بحتة دون أي مردود آخر!

عشان كده مهما ياكل ما يشبعش، ومهما يحقق ما يكتفيش، ومهما تتوافر له أسباب السعادة، ما يلقطهاش. لأنه بيحرق بنزين كثير قوي ويجري على سرعة ضخمة جدا ويبذل مجهود مرعب، عشان بس يقطع له في النهاية مترين!

فطبيعي ما يشعرش بأي حاجة!

وطبيعي نبقى كلنا نسخ مكررة من بعض!

فاكر زمان لما كنا في الثانوية العامة، وكان هدفنا ندخل كلية من كليات القمة؟

فاكر الاحتشاد والشحن والمكابدة والصراع طول الوقت بين الالتزام والضغط على

نفسنا عشان نحقق حلمنا، أو الخروج للعب الكورة والبلاي ستيشن والصرمحة؟
صحيح عرفنا في النهاية إن كله محصّل بعضه، واتضحك علينا بشكل أو بآخر. بس
الحالة دي من الفعل من أجل النوال، والتحكم في رغباتك عشان تحقق شيء
بعينه، ومعرفة إحنا عايزين إيه بالضبط.

الحالة دي من الترقب والكفاح وتخطّي الإحباطات عشان نعمل حاجة حقيقية
لينا ولغيرنا حاسين بقيمتها.

ده اللي إحنا مفتقدينه دلوقتي!

للأسف، بقينا بنلف في دواير، إحنا اللي صنعناها، ومش قادرين نحرّر نفسنا
منها، بنضحك على نفسنا ونقول إننا عارفين بنعمل إيه كويس، ورايحين فين
وجايين منين، لكن الحقيقة إننا تايهين وبندورّ على قشّاية، وخايفين نقول كده
لحد.

بنحب وندورّ على سند، فناخد على دماغنا، نفتح الباب للأصدقاء فنلبس في
الحيط، فننكفي على ذواتنا ونعبد القرش ونصدّره على إنه الصديق وقت الضيق،
ونحاول نشترى بيه كل حاجة: المشاعر والأحاسيس والسعادة والتحقق، فننزل
على جدور رقابينا للمرة المش عارف كام!

والعمر بيجري، والفرص بتتقلص، والطاقة بتنفد، والمرارة على آخرها!

والحل؟

إننا نقف شوية، نركن على جانب الطريق، ونبطّل المحرّك حبّة، ونطلّع المانيوال
بتاعنا، ونفتحه ونراجع بشجاعة توصيلاتنا العصبية والنفسية والجسمية، ونفتش
عن الأعطال ونصلحها، ونشوف إحنا مصنوعين عشان إيه أصلا، وإيه الطريقة
الأمثل لاستخدامنا.

نشوف الضرر والتشوّه اللي حاصل، ونغيّر السلوك الضاربة، ونعالج القفلات
ونحسّن ظروف التشغيل، وبالمرة نفتح الخريطة ونشوف مكاننا فيها، ونحدّد بدقة
الحطة اللي شايفين إننا نستحق نكون فيها، وبعدين: ندورّ ونطلع على الخامس.

وإلا...

()

من الطبيعي ألا تسعنا الطُرق المفروضة علينا، لأنها لم تُخلق لنا، وليست على
مقاسنا.

طُرقنا الحقيقية نكتشفها بالمحاولة والخطأ، ونصل إليها بالدم والدموع، لكنها في
النهاية تكون ملكًا خالصًا لنا، وقادرة على استيعاب جنوننا وعنفواننا، وتعويضنا ما
بذلناه في سبيلها.

()

على فكرة ممكن واحد يكون بتاع بنات ومقطع السمكة وديلها، بس ما بيقبلش رشوة عادي، آه والله، وممكن يكون بيشر بـس عمره ما سرق ولا بيقبل يدخل بيته قرش حرام، وخذ الثقيلة بقي: ممكن يكون ما بيصلش بـس حقاني وما يرضاش بالظلم ولو على رقبتة. تخيل!

طب أبهرك أكثر: ممكن تكون واحدة بتدخن وععيشة لوحدها وبتلبس مفتوح، ومش شمال ولا حاجة، ولا بتشوف أي راجل مع مراته تنقض عليه وتخطفه منها، آه والله وتبقى محترمة عادي خالص زي بنتك ومراتك، وشايفة إن ده النمط اللي يناسبها - وهي حرة طبعاً- وما اتجوزتش عشان كل اللي جولها -لا مؤاخدة- كسر ومن عينتك كده، فقلتهم أحسن.

إحنا ليه متخيلين إن وجود خصلة سيئة في حد -مع نسبة الحسن والسيئ عموماً- معناه إنه كله على بعضه مش نافع، وإنك لو ادبته سيجارتين عشان يقتل حد، هيرحب بكل سرور، أو لو عرضت عليه يتاجر في المخدرات هيقولك ده حلم حياتي!

ليه بناخد الناس لو كشة واحدة كده، وبنحصرهم في لحظات الضعف، وبنرفض نشوف بشريتهم ومحتنهم وظروفهم ومعارفهم في الحياة عشان يتغلبوا على نقائصهم ويبقوا أحسن!

وليه مشغولين أصلاً بالفرز والتصنيف وحبس الناس في أطر وبراويز حديد! ده على اعتبار إننا برنسات في نفسنا يعني وما عندناش عيوب وفاضل لنا اتنين فقلت وننور؟

طب بعد ما صنفنا الناس وحكمنا عليهم وعرفنا إننا أحسن منهم 100 مرة وبرقية اللي خلفوهم، وبنراعي ربنا أكثر منهم، وفاهمين الدين أكثر من الصحابة أنفسهم، إيه بقي؟ إيه الأكشن اللي عملناه يعني وكسر الدنيا؟ إيه النتائج المذهلة اللي ترتبت على اكتشاف هذا الكم المذهل من الحقائق الكونية؟ ولا حاجة؟

طب افكر يا عم الكامل المتكامل إن ستر ربنا ليك مش كارت أخضر عشان تخوض فيما انكشف لك من نقص عباده، وإنه مرهون بإثبات جدارتك باستحقاقه، وما بين طرفة عين وانتباهتها، يُغيّر الله من حال إلى حال! فاحذر.

()

مش الفكرة إن اللي معاه فلوس كتير بينحرف، لكن اللي معاه فلوس كتير بيقرر يجرب في مساحات أكثر من الصبح والغلط، بحثاً عن شغفه الحقيقي، وسبب وجوده على الأرض، وهي دي الطريقة الوحيدة -من وجهة نظري- لاستخدام

الحياة على الوجه الأمثل، والوصول لقناعات مُرضية. ارفعوا وصايتكم عن الناس، وسيبوهم يغلطوا، ويتعلموا، لو كان ربنا عايز حد ما بيغلطش، كان استخلف ملائكته، أو شال منا الفضول والنزوع للمعرفة، أو خلقنا حجارة لا بنحس ولا بنفهم ولا بنشتاق.

()

ساعات حته هارد وير في الكمبيوتر ما تشتغلش، وتوقف الجهاز كله: رامة، كارت شاشة... هي سليمة وزى الفل، بس لسبب مش مفهوم، ما ولفتش مع اللي حوالها، كيمياؤهم ما طبطش مع بعض، وبمجرد ما تتشال وتتخط في جهاز ثاني، تشتغل زي الحلاوة!

كذلك البشر مش شرط يبقى فينا عيوب وولاد كلب عشان ما وقفناش على أرض مشتركة سوا، ممكن بس ما يكونش فيه توافق، والقلوب مضبوطة على موجات مختلفة، وكل واحد مع شخص ثاني يلاقي موجته وينور.

العلاقات الإنسانية معقدة جدا وملهاش كتالوج ولا إجابة نموذجية، والثابت الوحيد فيها.. إن مفيش ثابت. دور لحد ما تلاقي وليفك.

()

كل قصة فاشلة بنمر بيها، بتقشر طبقة جهل عن قلوبنا، طبقة غرور وادعاء ومثالية، وتكحت خلايا ميتة وجودها بيعوق باقي الخلايا تشوف النور، لحد ما نقدر نمد إيدنا في النهاية ونلمس جوهنا الحر.

الرحلة مؤلمة ومرعبة لكن في آخرها بنملك معلومات أكثر وتفصيل أدق عن كنه ذواتنا ورغباتنا واحتياجاتنا، وبنبقى أكثر استعدادا للانخراط في تجربتنا الحقيقية اللي كنا بنستعد ليها كل الوقت ده وإحنا فاكرين نفسنا وصلنا خلاص.

الأخطاء والسقوط والخسائر والدموع والتخبط والفراق والخديعة والخذلان بروفات ما قبل العرض الرئيسي اللي لما يبدأ هتأكد إن مفيش حاجة راحت هدر ولا حاجة اسمها صدفة وإن إنت أقوى كثير مما تظن.

فأبشِر.

()

الرزق قضية معقدة للغاية، لكن مشكلتها الأساسية إننا بنقول بلساننا بس إننا مسلمين الأمر لله، فيما القلب عايش حالة هلع حقيقي، والحسابات والاحتمالات شغالة على ودنه.

ورغم إن كل واحد فينا عنده حكايات مذهلة عن ستر ربنا ليه وفرجه اللي ما بينقطعش، فكلنا بننسى وقت الشدة، وبنسلم لليأس، ولسان حالنا بيقول مش

كل مرة تسلم الجرة أو أنا ما أستاهلش، وبنغفل عن إن حسابات ربنا غير حساباتنا، ونظرته لينا غير نظرتنا لنفسنا (إحنا شايفين امبارح ودلوقتي بس، لكن ربنا مطلع على خط السير كله) وإن الرزق تحديدًا ربنا حرره من شرط عبادته والإيمان بيه وربطه بالسعي، وإلا ما كانش رزق الكافر مثلاً أو جعل كل الكفار شحاتين.

وحتى التضيق في الرزق ليس من قبيل فرد العضلات ولا المن والأذى، إنما للتذكرة العملية بما يسهو عنه الإنسان في خضم جريه المحموم وانغرازه في الدنيا، يعني نعمة في توب نعمة.

والجميل والمطمئن إننا حتى لما بنقنط، ونحسبها بالورقة والقلم ونرفع صوتنا بالشكوى أحياناً وبنغلط، ربنا بيسامح، لأنه هو اللي ركب فينا الضعف ده اللي أحد تجلياته السيئة اليأس، لكن تجليه الأروع والأعظم رحمتنا ببعض.

وإذا كان من حكمة اتعلمتها من كل اللي فات عليا فإن السعي عموماً -وإن عزت السبل وسدت المنافذ- فرض عين وطوق نجاة، فإن لم تغز بما تسعى إليه، فزت بأجر السعي نفسه، وكله بيدخرك في النهاية، ويصرف ليك على هيئة رحمت-مش فلوس بس- بعضها صغير لا تشعر به، ولكنه ضروري بالقطع ودونه تتوقف الدنيا، وبعضها كبير وضخم تتعجب منه وتدمع عيناك فتحزن لسابق شكك وتقول بخشوع ويقين: شكرا يا رب.

()

الناس اللي بتقول لك بحرقة: "إنت بتتنطط على إيه؟" لما تاخذ قرار مش عاجبهم: تسبب شغللك/تشتغل/ترتبط/تفشكل/ تسافر/ترجع/ تاكل/تعمل ريجيم/ تلبس/تقلع.. الإجابة النموذجية عليهم، وفقاً لكتاب الوزارة، صفحة 55555، هي:

على طريقة النابلسي: أنا كده، شكلي كده، خلقتي كده!

على طريقة توفيق الدقن: أنا راجل لعين يا أخي!

على الطريقة المصرية المانعة الجامعة: وإنت مال أمك؟

إذ إن أي محاولة للرد المنطقي، أو الشرح الحقيقي لدوافعك ومنطقاتك، هتفتح باب إنت في غنى عنه، وملوش لازمة، للجدل الفارغ والحوار السفسطائي والهيئ والمئ (وإنت ماشي بعلاج أنا عارف!).

اللي بيحبك هيدعمك دايمًا في قراراتك حتى لو مش فاهمها. واللي ما بيحبكش، أو عايز يكسر مجاديفك، مش هيحوق فيه أي رد منطقي، فملعون أبوه بكرة وأصيلاً يعني.

()

رغبنا في الحاجات، كثير جدا بُلبس علينا الأمور، فنشوف الباطل حق ونبرر له، والحق باطل وندافع عنه، أغلبنا يبص من زاوية تحقق مصلحته الأول، ودفع الضرر عنه، ودي غريزة إنسانية بحتة، يمكن مش صح لكنه واقع بنشوفه كل يوم، وما بيختلفش فيها الوزير عن الغفير.

الخلاف بيكون في زاوية النظر وحساب المكسب والخسارة بس، ما يقودنا للاعتراف إن مفيش حق مطلق ولا باطل مطلق، التحديدات الصارمة للأشياء عموما استسهال وتدليس، اليقين الفج بامتلاك زمام الأمور غرور ونقص معرفي وربما خُلقي، فخلي فيه مساحة للتراجع، ما تزوقش كل حاجة للحافة، وما تصدرش قرارات نهائية بخصوص أي شيء.

وافتكّر أول مرة اتجرحت من حبيب ولعنته، وهو محملك إنت المسؤولية، وأول مرة جرحت حبيب ولعنك، وإنت محمله المسؤولية، كلاكما على خطأ وصواب في الوقت نفسه.

فحنانيك.

()

الغرض الأكبر من الابتلاء: وضعُ النقاط على الحروف، نقاطُ الربوبية على حروف البشرية، لإعادة رسم مسار العلاقة كلما انطمس، وترتيب الأولويات كلما تماهت، والتذكير بالمهمة الأساسية كلما تشوّهت، وفرز المتاحات واختبار الممكنات، وكشف ما وصلت إليه الماكينة الإنسانية من تطور وتكيف وقدرة على هضم التغيرات التي تستبدُّ بها.

الأمر أشبه بتحديثات "السوفت وير" التي تتبّع عيوب المنتج وتُصلحها، في سعي -لعله لا يُنال، لكنه يظل طموحا مشروعا- للكمال.

فمن رفض التحديث، انتهكه كلّ طارئ وجديد، ومن ضغط زر "الموافقة" أمِن إلى حين. فيما يبقى الدرس الأكبر على الإطلاق أن الحزن ينتهي والفرح ينتهي والحياة نفسها تنتهي، فمن لم ير العلامات ولم يلتفت إلى النذر ولم يقرأ طالع نفسه بنفسه ولم يتلمّس ربه تحت ملابسه.. (أولئك الذين ضل سعيهم في الحياة الدنيا وهم يحسبون أنهم يحسنون صنعا).

()

مش مؤمن إننا اتخلقنا في الدنيا دي عشان نعاني، ونكابد، ونتألم، ونعيّط. ربنا خلقنا من عَدَم ومنحنا كل النعم دي، عشان نتمتّع، ونفرح وننبسط، وبعد عمر طويل، نروح نكمّل انبساط عنده. ما هو مش هيعمل حاجة بعذابنا وغربتنا وتوهتنا وفقداننا الرغبة في أي شيء، ولا مُلكه هيزيد أو هيقُل لو فرحنا ونمنا والضحكة واكله وشنا كله!

لكن إحنا اللي مش شايفين إننا وش نعمة، فبنخون، ونخذل، ونفارق، ونتجبر،
وندبح، بندور على ثغرات الروح ونطعن منها، بنشوف مُستقر البهجة ونسلط
عليه غباءنا، مش قَادرين ننسى قابيل اللي جوانا، وطول الوقت ببص لأخوه في
الضحكة واللقمة واللّمة والابتسامة!

لكن: مَنْ لم يدخل جنة الدنيا لم يدخل جنة الآخرة. اللي مش هينجح في اختبار
السعادة هنا هيقف هناك وشّه في الحيط وإيده لفوق، اللي مش هيمد إيده
بالسلام والراحة للبشر، هيطلع فوق إيده مغلولة لرقبته بسلسلة من نار
ومحنة، اللي مش هيسمع صوت قلبه ومشاعره وهيقضيها حسابات بالورقة
والقلم، هيكون فوق منزوع القلب والروح، بدن مُصمت بلا حيثة ولا اعتبار!

إلى من يهّمه الأمر: ساعدونا نحقق قَدَرنا الحقيقي على الأرض، ردّوا لنا
مشاعرنا وحُبنا ومُتعتنا ووجودنا وإحساسنا ولحظاتنا وأرواحنا.. ردّوا لنا الحياة.

()

كل مرة بتعمل فيها مصيبة وتفلت من عواقبها زي الشعرة من العجينة، أو تتعرض
لموقف وحش قوي وربنا يجيبها جمایل، بتاخذ من رصيد الستر بتاعك، لحد ما
يخلص تماما وتلاقيك لابس في حاجة هابلة وملهاش معنى، ومع ذلك مطالب
تدفع فاتورة ثقيلة قوي!

(يعني الموضوع مش شطارتك ولا عبقريتك ولا سواد عنيك، إنما حسابات صارمة
وترتيبات ربانية محكمة)

عشان كده زي ما بتهم تحوش قرشين على جنب أو تستثمر في حته أرض،
فكر تزود رصيد سترك وتستثمر فيه.
إزاي؟

خليك في حالك، ما تزيطش في الزیطة. في الأيام الشريرة دي فليسعك بيتك،
وطلع حاجة بسيطة من دخلك مهما كان قليل، ولو عندك علم أو معرفة شاركها
مع غيرك وما تبخلش، وإذا اطلعت على عورة أخيك استرها عليه، وإياك واللعب
بمشاعر حد والمتاجرة بقلبه، وطبطب على الناس واسمعهم وداويهم ما
استطعت إلى ذلك سبيلا!

إحنا في منتهى الغلب والله، وحملنا تقيل وعلى شعرة، بس الكبر مالينا
والعنطرة الفارغة راكبة فوق دماغنا ومدلدة، ولو وقعنا ما حدش -حرفيا-
هيسمّي علينا!

()

بعد التجارب/الخدلانات/الخسارات/المعارك الكبرى في حياتك، لازم تطلع بره
السياق والفيض العام، وتقف على جنب شوية، ترتاح وتاخذ نَفَسك، وما
تحكمش على حالك بعدها مباشرة، يعني لما تلاقي نفسك تعبان، ما تقولش
إنك ما عنتش قادر على العطاء. لما تحس إنك مرهق ومش قادر تتحرك لقدام
وملكش نَفَس للشغل، ما تفتكرش إن دي آخره المشوار.

كل الحكاية إنك محتاج تزييت وتشحيم، مساحة بيضاء مفيهاش مسؤوليات من أي نوع، هدنة، وده مش عيب على فكرة. ولازم مرحلة تخلص، عشان مرحلة ثانية تبدأ، فما تبخلش على نفسك بفترة تأنتخ فيها وما تعملش أي حاجة: اجري والعب -بجد مش هزار- ونام كتير وكل بشراة واتفرج على مسلسلات وبرامج تافهة في التليفزيون، اشحن روحك ثاني شغف وحياة، ولما تحس إنك توازنت، ابدأ من جديد بثقة.

نهاية أي طريق هي بداية طريق ثاني، وانتهاء أي تجربة، معناه إنها ما عادش قادرة تديك أكثر من اللي خدته منها. انقل لليفل اللي بعد كده بيقين إن مفيش حاجة ما بتتعلمش منها، ولا تجربة بتمر من غير ما تديك قيمة أو درس هتستفيد منه في المرحلة الجاية.

()

لا معنى لادِّعاء الفضيلة ما لم تُختَبَر، ولا معنى للحُكم على الأشخاص ما لم ترتدِ حذاءهم، وما دمتَ على الأرض فلا تستبعد أن تُفتن، وتقع في المحذور، أنت لست قوياً، ولا عظيماً، ولا معصوماً، ولا أفضل من سواك، أنت فقط "مستور" حتى الآن، لكنك لا تعرف -يقيناً- متى يرفع الله الستر عنك، ويُذيقك مما تُعير به الناس. فاحذر.

()

ما تكسّلس تفرح!

()

مهما تحاول وتعافر وتبذل جهد في سبيل تقديم نفسك بصورة معينة للي حواليك، كل واحد في النهاية هيشوفك بطريقته، وعلى هواه، وزى ما هو عايز يشوفك!

وده بتحكمه منظومة معقدة من العوامل، مش دايمًا هتبقى ملم بيها، ولا قادر تتحكم فيها، فما تموتش نفسك قوي عشان تتجمل وتنال الرضا والإعجاب، اتصرف على طبيعتك تمامًا، وزى ما إنت حابب، وراسم لنفسك، حتى لو بجنو أو حماقة أو غباء،

خليهم يحسبوا حساباتهم زى ما هم عايزين، وعيش حياتك زى ما إنت عايز.

بعد فترة هتكتشف إن مكسبك الحقيقي مش كلمة إطرء منهم ولا ابتسامة رضا، لكن المتعة اللي حسيتها وإنت بتلعب اللعبة بقواعدك إنت. وفي في الآخر هي لعبة فعلا، فما تديهاش أكبر من حجمها، وما تطلعش منها خسران عشان خاطر حد.

لو هتلعب، يبقى عشان هدف واحد بس: تكسب نفسك.

()

طول الوقت هنقابل ناس مش هيعرفوا يقدرّونا، هيشوفونا معيوبين أو مش ملائمين ليهم أو أقل من إننا نفوز بيهم، وهيعتقدوا إنهم يستحقوا حد أفضل منا، ومع اعترافنا بإننا مش خاليين من العيوب فأحنا كمان مش خاليين من المميزات، وإللي مش هيفهم ده من غير ما نضطر نشرّحوه، أحسن له يروح بدري بدري، لأننا مش ناقصين تضييع وقت ومشاعر، وعشان يوسّع السكة للي هيجبنا حقيقي، ومش بس هيقدر يتقبل عيوبنا، ده كمان ممكن يشوفها مميزات.

إحنا مش عايزين شفقة من حد، ولا جبران خواطر، إحنا عايزين حد بيعرف يحس.. بس.

()

لعلّ مشكلة الذين خذلونا أنهم لم يعرفونا.

لقد رأونا وتحدثوا إلينا وعاشوا إلى جوارنا، لكنهم أبدًا لم يعرفونا، لم يلمسوا جوهنا ولم يدركوا فرادتنا ولم يضعوا أيديهم على ما يميزنا.

لقد اقتربوا قدر ما اقتربوا لكنهم ظلوا على الحافة من كل شيء، ظلوا "آخرين" حتى آخر لحظة، وعندما حان الاختبار لم يجدوا ما يثبت لهم أننا لن نتكرر وأن حياتهم بعدنا ستكون بائسة وحزينة، لم يجدوا ما يبرر لهم استكمال اللعبة، فخسر كلانا في النهاية وإن لم يدركوا ذلك حتى الآن!

()

حمل مشاعر الكراهية والغضب، تجاه شخص، أو حدث، مؤذي جدا، ويبستهلك الطاقة بشكل مرعب، والأسوأ إنه ما بيحلش حاجة، ولا بيغير وضع رافضينه.

والسكوت على المشاعر دي، بيخليها تتشيب، وتتحول لكائن حي، من لحم ودم، عايش تحت جلدك، بيتغذى على حقدك، ويرفع صوته عليك، ويتسلط على مشاريعك وقرارتك، وصولا لمسحك، وتفريغ تصرفاتك تماما من أي عقلانية أو منطق أو هدف.

لازم تتقبل إن البشر بيغلطوا عادي وبيكذبوا ويخونوا ويخذلوا ويرجعوا في كلامهم ومشاعرهم بتتغير، وإن الحاجات دي ممكن تحصل لك، مش بس بتحصل للناس التانيين، وتدرّب نفسك ازاى تتعامل مع النقص ده وما تتخضش أو تقفش أو تخاف، ومع الوقت هتعرف إنهم ما يستحقوش الكراهية، وحرقة الدم، والوعيد، والانتقام، إنما الشفقة!

()

الناس تفضل تسقّف لك ما دامت وجهة نظرك موافقة ليهم، وماشية مع اختياراتهم في الحياة، لكن أول ما تقول حاجة مش على هواهم، يرفضوك،

ويبقوا أعداءك، وفيه منهم اللي بيُفجر وينصّب نفسه قيّم على العالم، ويبدأ يوزّع صكوك الغفران أو الإدانة على البشر!

مع إنك في الأول وفي الآخر، ما قلتش إن كلامك منزل من السما، ولا إنك معصوم، وما أجبرتش حد على اعتناقه، ولا بتروح للناس صفحاتهم تقنع فيهم بالعافية، وتحشر كلامك على ألسنتهم، لكن كل ده مش مبرّر إنك تعبّر عن وجهة نظرك، وعن اللي إنت مؤمن بيه.

إنت حر.. تعبّر عن وجهة نظرهم بس، حرّ.. تناقش القضايا اللي تهمهم بس، وبلغتهم هم وأسلوبهم، وغير كده تبقى ابن كلب!

نزار قباني لخص الحكاية لما قال "لبسنا قشرة الحضارة.. والروح جاهلية".
إحنا فعلا جاهليين.

()

حسابات قُرب البشر من بعض، وتحديد تفضيلاتهم، واحتياجاتهم، في أوقات مختلفة من حياتهم، عجيبة جدّا، ومش متوقّعة، وغالبًا ملهاش خريطة ولا قاعدة عامة ولا كتالوج تقدر ترجع له، وبتتغيّر في ثانية، من النقيض للنقيض.

فيه ناس تتآلف مع ناس عكسها على طول الخط، وناس لازم تبقى مع بعض.. بتبعد، وناس ما ينفعش يبقوا مع بعض.. بيمشوا في سكك واحدة، واللي ما كانش ينفع امبارح ممكن ينفع بكره، واللي شغال زي الفل دلوقتي، ممكن يعطل في ثانية ويفرقق في وشنا. فيه ناس تقرب منا لحد ما نحسّ إنهم عمرهم ما هيبعدوا، وناس بتبعد لحد ما نتصوّر إن خلاص السكك اتقطعت بينا، وما عادش فيه بينا أي رابط، وفجأة تلاقيهم في وشك.

الأكيد الوحيد وسط شبكة الاحتمالات المرعبة دي: إن صورتنا عن نفسنا مش هي دايماً اللي الناس وخداها عنّا، إحنا لينا 100 وش و100 شكل و100 تجلّي، بعدد اللي يعرفونا تقريبًا، ومن هنا بتحصل الصدمة -بالإيجاب أو بالسلب- لما بتيجي فرصة، ونشوف نفسنا في مرايا الآخرين، إحنا مش إحنا ولا هم هم، ولا أي حاجة زي ما بتظهر لنا.

وأهمّ درس اتعلمته في النهاية، بالدّم وبالدموع: ما تروحش لحد، ما تعرضش نفسك، ما تطلبش، ما تتطلعش، ما تتطوّعش، ما تتذلّش، ما تستجديش، امشي في مسارك اللي إنت -إنت بس- شايفه ملائم ليك، وهيخليك تقدر تستغل كامل طاقتك، لحد ما تنور، وتبقى اللي شايف إنك تقدر تكونه، ولما تتحقّق، اللي فاهمك ومحتاجك ومقدّرك هيجيلك، وهتلاقى طرّقكم.

كفاية زيف وخداع وتعلّق وطواف في مسارات مُغلقة، وأمل وأحلام وأمنيات وخطب ود ناس مش شايفين فيك غير فرصة، أو مصلحة، أو شقة إيجار قديم، أو مشروب طاقة، أو واحة يرتاحوا تحتها شوية، وبعدين يكملوا طريقهم من غيرك، من غير ما يبصوا عليك بصة واحدة!

بُص إنت على نفسك.. وراعيها.

()

إن استعنتَ بنفسك في قضاء حاجة: أَلقيتَ حملا على محمولٍ، وسألتَ سائلا، ولجأتَ إلى لاجئ، وطمعتَ في مُفلس، وخرجتَ من قصر منيف إلى غرفة فوق السطوح، فخذلت.

وإذا استعنتَ بالله، أَلقيتَ حملك على حمّال، وسألتَ معطاءً، ولجأتَ إلى جابر، وطمعتَ في سخي، وتسَلَّلتَ من ثقب إبرة إلى براح قصر، فوصلتَ حبلَك بالمصدر، وطلبتك بصانع قانونها، ورجاءك بمنبعه، فنُصِرت.

()

بص، إنت لازم تعمل كل اللي عليك فعليا، وكل اللي ممكن يتعمل، في أي حاجة بين إيديك، مش عشان تنجح فيها، ولا عشان ما تقولش يا ريتني حتى، لكن عشان إنت فعليا مش عارف منين بيودي على فين، وممكن وإنت في نص طريق ما، يتفتح لك طريق ثاني ما كنتش تعرف عنه أي حاجة، زي طريق ضلّمة، كل ما بتتقدم فيه بيتكشف قدامك، لكن لو رجعت، أو بطلت، عمرك ما هتعرف إيه اللي بعد كده، والعمر قصير، والطاقة بتنفد، واللي مش هتعمله دلوقتي، فرصك في إنك تعمله بكرة، هتكون أقل.

وفي النهاية إنت مجموع ما تفعل، مش اللي كنت تتمنى تعمله وما عملتوش.

()

ومن طلاقة القدرة: تنوّع النِّعم، وتماهيهها مع حاجتك، بمقدار مضبوط، لا أقل ولا أكثر، لا قبل ولا بعد، فإن احتجتَ مالا إضافيًّا -مثلا- لطارئ، فتح الله عليك أبوابَ رزق لم تظنّها أبداً موجودة، فإذا انقضت المحنة أغلقت، وإن احتجتَ طاقة إضافية في جسمك، لإنهاء مهمّة ما، أو الخروج من خطر مُحدق، أعطيتّها، حتّى إذا فرغتَ حاجتُك، عدتَ محدودًا، وإذا أهَمَّك أمرٌ لا ينفكُّ إلا بدعاءٍ وقُربٍ ووصل -وَأنتَ مقصّر- شحذَ همّةَ عبادتك، فأشرقَت طاعةٌ، واتّقدتَ إيمانًا، حتّى إذا أجابك، فترتَ قليلا، وعدتَ إلى صفوف العباد العاديين، فنيعمُهُ دواءٌ وصلهُ رحمٌ بين خالقٍ قادرٍ مُتجلٍّ، ومخلوقٍ ضعيفٍ جاهلٍ بنفسه مُتطلع، لكنّ كثرتها تُميت القلب، وتُورث التواكل، وتقذح في السعوي، وتعودُ الْآنانية، وتُفتح أبوابَ الشيطان، فإن حُرِمْتَها، فاشكر الله أن نجّاك، وإن أعطيتّها، فاشكر الله أن اصطفّاك.

()

الله ليس بشرياً ليَقِفَ لك "على الواحدة" وينتظر أن تخطئ فيخسف بك الأرض ويرسل عليك طيراً أبابيل.

ليس مديراً ينتظرك ممسكاً ساعته على باب الشركة ليخضم لك إذا تأخّرت. ليس موظفاً في شركة الكهرباء يتربّع تعثّر في السداد، ليقطع عنك النور ويُقيمك في الظلام.

ليس محاسباً في بنك يُغريك بميزات القروض، ثم ينتهز أول تقصير منك ليخرب بيتك.

إِلَهُ أَكْرَمُ مما نتجراً به عليه، ومما نُفَرِّط فيه من حقه، ومما نُعْطِي لأنفسنا من أَرْحِيَةِ في عَصِيَانِهِ، ومما ننافقه به، ومما نبخل به عليه، وممن يستغلون اسمه، وَمَنْ يُنْصِبُونَ أَنْفُسَهُمْ مكانه، من ضعفنا وجبننا واستسهالنا وبشريّتنا ووحلنا، من تخيلاتنا عنه، وآمالنا فيه، وتصورنا له، من تأخرنا في الرجوع، وإسرافنا في النوال، وبخلنا في الوداد.

الله -ببساطة- هو الله

()

ساعات بتلوي عنق احتياجاتك، وترق نفسك تجاه خيار بعينه، هو مش أصلح حاجة فعلياً، لكنه المتاح دلوقتي، فبتدوس وانت بتراهن على إن الوقت في صالحك والدنيا هتظبط بعد شوية، وممكن تظبط فعلاً، لكن في أغلب الأحيان.. لحظة صراحة واحدة بتهد كل حاجة فوق دماغك!

لأن الإنسان مش مفطور على الجبر والإكراه، ولا الانحيازات النص نص وعلى ما تُفرج، ولأن حتى لو كان جسمه أسير احتياجاته، فروحه حرة وبتبص على المشهد كله من فوق، من عتبة فارقة بره الزمان، فبتقدر تقدّر الوزن النوعي لكل انحياز على حدة، وتحدد -يقينا وحقا- مستقبل كل واحد فيها.

ولو تمرّد الجسم على الروح ومشى ضد إرادتها بالعافية.. بتعاقبه بالنبذ والتعالى عليه والحرمان من أبدية اللحظات واستمرار طعمها في البق، وبتلعنه بالاعتیاد وسرسة الأحاسيس من بين إيديه بمجرد انتهائها، لحد ما توصل له الرسالة المرعبة الحاسمة: أنا الأهم، أنا رئيس مجلس إدارة عالمك يا حيوان!

واللي بيحب نفسه لازم يفرض شروطه، ويختار الملائم مش المتاح، ويسيب اللي ما يستحقش يعدي، عشان يوسع الطريق للي يستحق، ولما الدنيا كلها تبقى ضده وبتشكك فيه، يسحب كرسي ويقعد يتفرج بابتسامة محايدة.

وفي الوقت اللي بيتصوروا فيه إننا محلك سر وكل اللي حوالينا سابقينا بخطوة، عشان مش بننحاز لحاجة أو حد ولا بنتورط أو بنجوز أو بننتمي.. كل خيار بنرفضه بيرفع رصيدنا من التطور والوعي بنفسنا وبالعالم، وفهم احتياجاتنا الحقيقية، وتقديرنا لذواتنا، ورؤيتنا لأعماقنا وفق كتالوجنا الخاص مش كتالوج المجتمع العويل.

ودي اللحظة اللي فعليا بنتحرر فيها من ربة الاحتياج وسعار الشهوة ونير العادية والنسخ والتقليد، ونفرد الجناح ونخلق باتجاه سماء خاصة بينا لا تشبه -ولن تشبه- سماوات الآخرين.

()

ما عندكم ينفد (المال والصحة والمشاعر والدعم والتفهم والاحتواء والعذر والمواساة والحب وصلب العود وسعة الحيلة والحلم والأيام الحلوة والطبوبة والرحمة والمودة والإيثار والتروى.. والحياة نفسها) وما عند الله باق.

()

فعل الطلوع لقدام ومفارقة نقاط الخذلان والعلاقات المؤذية والولادات الجديدة ومعرفة قيمة أنفسنا والتعافي بيعتمد -بشكل أساسي- على قانون الفرز والاستبعاد: في العلاقات والشارع والسوبر ماركت والصحاب والكتب والشغل والأكل والرياضة والحب والهدوم؛ ده يناسبني وهيفضل في حياتي، وده وحش ما يناسبنيش، أو ده كويس والله، بس مش لوني، موجته مش متوافقة مع موجتي، مش مولفين مع بعض.

واللي بيخلي القانون ده يشتغل بفاعلية وفي صالحك تماما: التوقيت، امتى نفرز وننحاز أو نستبعد.

إذ إنه من الطبيعي الناس تبقى حواليك وإنت ناجح أو مشهور أو معاك فلوس أو صحتك حلوة أو دمك خفيف أو شاطر في شغلك أو بتخدمهم وتروح وتيجي في مصالحتهم..

لكن شوف مين هيبقى في ضهرك وإنت تعبان أو مفلس أو مش لاقى شغل أو خايف أو مخدول أو محتاج توصيلة في عز الحر أو مكتئب أو مش عايز تخرج من سريرك أو مجروح أو عايز تنزل تجري في الشارع نص الليل أو بتتصرف غلط أو رايح تتخانق أو تكشف أو بتفكر تنتحر..

اعمل لسته وخط كل واحد في مكانه ورتبته اللي يستحقها، واديله درجة من واحد لعشرة، وما تعاملش الصديق على إنه حبيب ولا الحبيب على إنه صديق، ولا اللي يستاهل على إنه ما يستاهلش ولا اللي ما يستاهلش على إنه يستاهل، احسم الاختلاف بالاختبارات والمواقف واكشف الغموض وفك الالتباس في أشكال العلاقات وما تخضعش للابتزاز العاطفي والصعابيات والألوان البراقة والصوت العالي، لأن الرحلة شاقة ومتعبة وبعيدة.. ومش هيكمل فيها غير

الصادقين.

()

ما تتسندش على إيد مش موصولة بجسمك.

()

كلّنا -بلا استثناء- بنمرّ بمشاكل وأزمات طاحنة وغُربة وفقدان هُويّة ويأس وإحباط ونفاد طاقة.

الفرق بين حد فاهم ده وحد مش فاهم، إن الأول عنده استشراف وقدرة على التنبؤ بما يسوؤه -ربما قبل حدوثه- وتقبّله باعتباره الوجه الآخر للحياة عمومًا، والتمنّ اللي لازم يدفعه للاستمرار في الانتفاع بمباهج الدنيا، وأول ما ده بيحصل، بيتبع بعض التكنيكات اللي من شأنها التخفيف عنه: يخرج خروجة حلوة، ياكل أكلة بيحبها، يفضفض مع صديق، يسافر، يعتكف، يقرأ قرآن، يصلي، يعيط، يصرخ، يكتب...

لكن الثاني عايش طول الوقت حالة إنكار كاملة، وعدم تصديق إن الحاجات بتحصل له هو بالذات، وإن أكيد فيه حاجة غلط ودفة الكون هتتعديل حالا أهو عشان خاطر عيونه، عشان كده الوقت لا يزيده إلا خسارًا!

يمكن التجربة والنضج والثقافة بيبقى لهم عامل كبير في تحضيرنا لقبول ما لا بدّ من قبوله، لكن دي مش ضمانة أكيدة لو ما كناش إحنا عايزين نكبر فعلا ونفهم الدنيا ماشية ازاي، وعايزين نبقي أحسن.

واللي لازم نفهمه: إن مفيش حد مضطهدنا، ولا بيشتغل ضدنا فوق، مفيش حد مستقصدنا، ومستني لنا غلطة، الموضوع أبسط من كده، وإحنا مش بالأهمية الكبرى دي عشان الكون كله يحتشد لمضايقتنا! بل إن اللي بيحصل لنا ممكن يكون أقل بكثير من اللي حصل لغيرنا، لكن إحساسنا بتضخم ذواتنا هو اللي مصوّر لنا إنه مصيبة لم يُرزء بها أحد في العالمين، ورغبنا في عيش دور المظلوم هي اللي مبهدلانا وموقفانا في طريق غلط مش راضيين نتتعطع منه!

حكمة العدد: عيشها بحلوها ومرّها، وتقبّل ما جرت به المقادير، ما تعاندش لكن ناضل وقاتل، غير اللي تقدر تغيّره، واقبل اللي مفيش منه مفر، وبص لبعيد، وخط أهداف وقتية وأخرى بعيدة المدى، وجرب وخوض واقع وقوم واتعوّر وخف وجرب ثاني ومليون واتشقلب وهاتها من شرقها لغربها وما تخافش، ولحد آخر لحظة في حياتك.. عافر.

()

من حقنا لما نزعّل ناخذ جنب، وما حدش يسألنا مالنا ولا بينا إيه ولا يتقمص لو ما جاوبناش -إحنا عارفين إن السؤال تقضية واجب ومن ورا القلب عمومًا- يدنا وقتنا تمامًا لحد ما نتخفف ونفك، ونقرر ازاي هنواجه العالم ثاني، وبأي وش.

ساعات الطاقة تبقى نافذة للدرجة دي فعلا والواحد مش ناقص حتى حد يقول له سلامو عليكم.

بك بإننا مش ملزمين أصلا نفضل نضحك في وشكم ٢٤/٧ ولا نرضي فضولكم طول الوقت ونحقق أحلامكم في معرفة كل صغيرة وكبيرة في حياتنا، ولا نكتم أحزاننا وصراعتنا وإحباطنا ويأسنا عشان تقضوا وقت لطيف معنا.

في الواقع إحنا مش مطالبين بأي حاجة خالص، ولا إنتم كمان، فبلاش نعسف بعض ونبقى حمل وبلية!

أوزي ما قال المثل: خنفسة شافت ولادها ع الحيط.. ويا بخت من زار وخفف!

()

فأقم في الحال التي أقامك الله فيها وإن ساءتْك وخالفتْ مراد نفسك، وضافتْ عليك الأرض بما رحبت، وبلغت الروح الحلقوم، فلعلك إن جزعتْ ونفرتْ، ورأيتْ لنفسك غير ما يرى، فطلبتْ غيرها، واستخدمتْ أسلحة مشروعة كالدعاء والإلحاح على المولى، ولزوم باب الرجاء، استجاب، وأقامك في الحال التي طلبتْ، ثم مُنعتْ الراحة فيها، ورزقتْ الشقاء والمكابدة!

فالاختيار موجبٌ لتحمل تبعاته، وفرط التسليم، موجب لنوال نفحاته.

()

أحيانا تجد منحة من الله، دون تعب أو سعي من جانبك، هذه ليست مصادفة ولا عبثا، إنما مكافأة تعب وسعي سابقين، لم يسفرا عن شيء ساعتها، أو على الأقل هذا ما ظننته وقتها، فالله لا يضيع أجر من أحسن عملا، ولا يحرم الناس ثمرة عنائهم، ولا يرد دعاء محتاج، هو فقط -سبحانه- يتخير الوقت المناسب للاستجابة لك، كي لا يفتنك، ولا يعطيك الغث فيما يدخر لك الثمين، فيؤخرك حتى تنغرك نفسك، وتظن به الظنون، وحتى تضيق عليك الأرض بما رحبت، ثم يرفع عن مطلوبك الحجاب، ويكشف عنك غطاءك، فإذا بصرك اليوم حديد، وعيونك ممتلئة دموع شكر ويقين ومحبة وتفهم وعبودية وامتنان وتسليم بالروح والجسد والفؤاد لمن بيده جماع كل شيء، وإليه المال والمستقر.

()

الصبرُ صبران: صبرُ المُضطرِّ المُكرِه القانط رافض الحكم المُعترض علي القضاء، وصبرُ البصير المطلع المُدرك للحكمة وإن خفيت، الواثق برحمة ربّه وإن تأخرتْ.

فأما الأوّل فيُحصل ثمرة الصبر، وأما الثاني فيُحصل ثمرة الصبر، وثمره الرضا، وثمره اليقين، وثمره التوكل، وثمره التسليم، وثمره الأمن في كنف الله، فلا يُضام له قلبٌ، ولا تجزع له روحٌ بعدها أبداً.

()

من أكبر أسباب الزلازل والبراكين في العلاقات، إن أحد الطرفين يمرّ بتجارب كثير قوي وضغوط واختبارات -مش كلها اختيارية!- تغير حمضه النووي وطريقة تفكيره وانحيازاته وتعاطيه لكل القضايا، فيما الطرف الثاني -خصوصا لو قاعد في البيت أو ما يحبش التجريب واكتساب الخبرات أو منغلق ومنطوي- يوقف عند مرحلة معينة ويكتفي بيها، وبیشوف إنه ليس في الإمكان أبدع مما كان وأهي أيام وبتعدّي، وهنا بيبقى حرفيا: فيه فرق في السرعات سيدي الرئيس!

وفي الوقت اللي بنتصّر فيه إننا بنجري في التراك نفسه وهنوصل للنقطة عينها مع بعض، بنبص ورا نلاقينا لوحدا تماما، وكل افتراضاتنا إنه جاي أهو، مسافة السكة بس، بتروح هدّر، لأننا قيّمناه غلط، أو حملناه فوق طاقته، أو ما فتحناش له الباب اللي اتفتح لنا، أو كنا أنانيين وفكرنا في نفسنا بس وما بذلناش مجهود إضافي عشانه!

الطرف الأنضج بيقيس بمقاييس ثانية وأدوات عملية أكثر ومساحة خبرات أكبر ونهم للمعرفة والاكتشاف، الطرف الثاني ما يعرفش عنها حاجة ولا مؤمن بجدواها ونتيجتها فمش بيعترف بيها، وبدل ما يعتبرها علامة على اتساع الرؤية بيتوجس منها خيفة ويحطها في بند التغيير السلبي اللي جاي ياخذ منه مكتسباته أو يعيد صياغة وضع اتعود عليه لسنين، فيقاوم بضراوة -وأحيانا بغباء- عشان يرجّع الأمور لما كانت عليه من ١٠ سنين مثلا!

التطور والتكيف والتأثير والتأثر؛ سُنّة بشرية، واللي ما بيتطورش: الجماد والميت بس (حتى النبات والحيوان بيطور أساليبه للتكيف مع مختلف البيئات)، أما الحي فلازم كل شوية يراجع اللي وصل له، ويفكر نفسه باللي محتاج يحققه، وازاي، ويحط نفسه تحت ضغط، ويختبر مهارات جديدة، ويضع خطة -مرنة- تستلهم كل المستجدات وتراعي -في الوقت نفسه- بشريته وضعفه وهشاشته اللي مش خافية على حد.

والطريق لإصلاح العلاقات عموما بيبدأ من الاعتراف بوجود خلل ما: إحنا مش مبسوطين مع بعض، بقينا بنأدي واجب ومش حاسين إننا مكفيين بعض، إحنا مشغولين بالعيال طول الوقت ونسينا إننا نفسنا لسه أصلا عيال وعازين نجري وبتنطط ونجرب حاجات جديدة، إحنا ما عدناش شايفين بُكره ولا منتظرينه وأهي أيام وبتعدّي!

الخطوة الثانية إننا نفتح المجالات قدام بعض، نشارك حباينا في التفاصيل والخبايا والمخاوف والهموم والرغبات، ونحاول -بجهد حقيقي- نصنع أرض مشتركة من أول وجديد، بدل اللي باشت بفعل السنين والروتين والقرب الشديد لدرجة إننا حفظنا بعض بالحرف!

الخطوة الثالثة: الصبر، الصبر، الصبر، مفيش حاجة بتحصل بين يوم وليلة، وإحنا مش بنأدي واجب هنا، إحنا بنخلق الحياة في جوفنا، وبتعيد ترتيب العالم حوالينا، فزي ما صبرنا سنين على التجارب الفاشلة والعلاقات المؤذية والناس

اللي ما تستاهلش، نصبر شوية كمان على الحاجات الحقيقية اللي بإيدها تهبنا الخلاص والسكن وتوقفنا على بداية طريق حقيقي ليه ثمرة ونهاية محددة ومعروفة!

التجديد عموما والانفتاح بوابة إحياء العلاقات الموشكة على الموت، مع الوضع في الاعتبار إن هيبقى فيه إخفاقات من حين لآخر، وعدم توافق ساعات، وأعراض انسحاب، وصدمة، وغضب، ومقاومة للتغيير، وحينئذ.. لأن الإنسان عبد لما ألقه، وأتقل حاجة على نفسه يجرب حاجة تحتمل الفشل والنجاح وتضعه على المحك، مع ذلك الجائزة كبيرة: إنك تلاقى السعادة الحقيقية اللي يمكن بتدور عليها برّه وهي قدام عينيك طول الوقت، وإنك تعرف نفسك على ضوء جديد، وتستجيب لأمر الله فيك بالخلافة في الأرض بدل تيه بني إسرائيل ده اللي عايشين فيه من يوم ما اتولدنا!

السعادة قطوفها دانية حقًا، لكن مفيش حاجة من غير تمن، والمحرومين هم اللي اقتنعوا إنها قدر ما بيتغيرش، فيما هي قرار، بناخده ونتحمل نتيجته للآخر، وإلا بنفلته من بين أيدينا في لحظة حاسمة فيبقى ملك للظروف، فتبيع وتشترى فينا براحتها!

()

خيارات الإنسان غالبًا ما تكون محدودةً بقصور رؤيته وقلّة نظره، لا في نفسها، ومن استخدم غير نفسه في النظر إلى الأشياء، رأى فيها جواهرها ونفذ إلى حقائقها ولمس عظمها دون لحمها، فأتسعت الرؤية وضاعت العبارة وانبسطت مساحات الفعل.

()

مبالغتك في الإحساس بالسعادة لما تسعد الآخرين، وعدم القدرة على الإحساس بده لوحدك، مش عطاء ولا إثارة ولا تضحية.. إنما انسحاق. إنت هتش لدرجة إنك خايف تفرح لوحدك فيكون ده تقصير منك في واجباتك، أو عندك يقين إنك لا تستحق السعادة أصلاً، فبتسعد اللي حواليك وتختلس لك حنة في الزحمة!

إحنا نستحق السعادة على فكرة، والله العظيم نستحقها عن جدارة ويقين وسبق الإصرار والترصد، ولو ما فهمناش ده قبل فوات الأوان، مفيش حاجة هتفرق معنا بعد كده!

الحق اللي باقي من روحك قبل ما يتشوه ويتبدد، واتعلم تسعد نفسك ثم الآخرين.
نفسك ثم الآخرين.
أرجوك.

()

ولو منع الله المدد عن عبده، بتقصيره في العبادة، ونكوصه عن الطريق، ومخالفته الدستور والعهد، لما كان ربا وإنما تاجر، يمنح مقابل ما يأخذ، ويبسر على قدر ما يستفيد، ويقايض النعمة بالطاعة، لكن الله يمنح العاصي والعابد، المقرب والنافر، المؤمن والجاحد، المنتبه والغافل، لأنه لا يبحث فينا عن طاعة المساق والمضطر والمأزوم وذو الحاجة والمكره ومن لا حيلة له، إنما طاعة الراغب الحر المدرك القانت الساعي الشغوف المرید المحب.

()

اللي خذلك وباعك، هيعيش من غيرك مبسوط عادي على فكرة، هيضحك ويغني ويرقص ويجب لبس على الموضة ويجب ويتحب ويتجوز ويخلف، ولا هيفتكرك ساعات، والحنين ياخده، وعينه تدمع، ولا ضميره هيوجعه ويسهره طول الليل، ولا ربنا هينتقم منه ويوريك فيه يوم، كل دي كلاسيكيات يا جماعة من زمن الأبيض وأسود ويوسف بك وهبي ومحمد عبد الحليم عبد الله، اكبروا بقى، واعملوا زيهم، سيبوا الحاجات تمشي وتمر، ارخوا إيديكم عن الوجع وخلوه يفارق، بطلوا تتابعوا أخبارهم وتتورطوا في تفاصيل حياتهم، هم مش صغيرين ولا هبل ولا اتضحك عليهم، هم عارفين كويس قوي هم اختاروا إيه، وليه، وكسبوا إيه وخسروا إيه، الدور عليكم بقى، تتعلموا الدرس، وتنحازوا لمصلحتكم، وتواربوا أبواب القلب شوية، وتختاروا مرة واحدة في حياتكم صح!

آه والله، مرة واحدة بس صح!

()

بفتكر مواقف كتير كنت ببقى مضطر فيها أخرج عن طبيعتي الهادية الخالية من الخبث والتنمر وتسقط الأخطاء، والبعيدة كل البعد عن الروح القتالية، وأتحول لناب وسكين، إذا ضرب فعشان يوجع، وإذا عض فعشان يغور في اللحم ويعور، ويمنع الكلاب من الولوغ في حقه أو تهيمشه أو الاستهانة بمجهوده ومشروعه.

ما كانش التحول سهل أو بيتم بسلاسة دايماً، بس كان بيبقى ضروري لأن البديل: تعب نفسي مهول وهدر مجهود ووقت وإحساس بالدونية ممكن يخلي الواحد يقرر -بمنتهى البساطة- ينهي مشواره حالا ويقعد في البيت تاركاً الساحة لمعدومي الموهبة والحيثية والضباع والقردة والخنازير والقمل والبق عشان ياكلوا الجبنة لوحدهم!

والدرس الأهم اللي خرجت بيه من كل ده: إحنا حلوين قوي وجامدين وكفاءة وزى الفل، والظروف المقندلة والبشر الكسر ما يقدحوش في مشوارنا، ولا يقللوا من جدارتنا وأهليتنا للتصدر قيد أنملة، ومهما كان الموج عالي ومش باين لها مرسى -دلوقتي- فالمرسى مش هيمشي ويسيبنا، هيفضل هناك برضه مستنينا ومشتاق لخطوتنا عليه.

إحنا صح.

()

ورغم أن أمره إذا أراد شيئا أن يقول له كن فيكون.. بيدي لك الله الأسباب، ويكشف لك علة الأحداث، كي لا تشغل بالفعل عن الفاعل، وبالنتيجة عن الآلية، فتفوتك الحكمة، وتتعلق بالظاهر دون الباطن، وتعتقد في ذاتك قوة لا تملكها، وتنسب الفضل لغير أهله، فتهمل التوكل، ويضلّ سعيك في الحياة الدنيا وأنت تحسب أنك تُحسن صنعا!

()

لما بتتحرك مشاعرنا تجاه حد، فالحد ده بيتحمل جزء كبير منها، حتى لو كنا موهومين، فهو سبب كبير في الوهم ده، سواء بقى عن سبق إصرار وترصد أو جهل أو غباء أو لعب أو هزار أو قلة خبرة أو غشومية، المهم إنه مش ملاك يعني! وعشان نرجع بني آدمين ثاني، ولو بنسبة ضئيلة، لازم ننهي العلاقات المؤذية في حياتنا، الماسة للطاقة والمحبة واللي ملهاش إطار ولا جدول زمني ولا خطة ولا نقطة نهاية باينة على مد البصر، ونقول للي غلطوا فينا إنهم غلطوا فينا وأذونا وانتهكونا ونزعوا من قلوبنا الإحساس والرضا باللي جاي، وإن أيا كانت المنافع اللي حصلوها منّا، فحياتنا المفروض كانت تبقى أهم، ومشاعرنا أولى إنهم يحافظوا عليها ويحترموها.

لأن كل يوم بيعدي وإحنا ساكتين وعاملين فيها متحضرين، وكاتمين رغباتنا وبندعي إنه كله تمام، هيفضل الصديد ينز في قلوبنا، والكلام اللي ما قلناهوش والمواقف اللي ما خدناهاش تهدم أماننا النفسي وتنحر فرصنا في حياة سوية. قولوا لهم إنهم خذلوكم، وهزموا تضحياتكم عشانهم، وطمسوا سنين كتير جاية من عمركم، وقابلوا المودة والرحمة بذهنيات قتلة محترفين، ما عادش بيأثر فيهم مرأى الموت والدم. وإنكم كنتم تستحقوا نهايات أكثر رحمة من كده.

قولوا لهم إنكم هتتخطوهم لأنهم ما يستاهلوش ياخدوا من عمركم أكثر من اللي خدوه، لكن مش هتنسوا وضاعتهم، وإن الدائرة بتلف دلوقتي، والسهم اللي اغتال أحلامكم على خوانة بيتجهز عشان يشق طريقه لحبة قلوبهم، بس المرة دي لا هتجروا عليهم ولا هتشيلوا عنهم ولا هتسندوهم وهم بيقعوا في أسفل سافلين.

()

عندما تحب أحدا تقول له "إنت في عينيا"، إي إنك ستكون دائم المراقبة له، والعون، وتفريج همّه ما استطعت، ومراعاة ما يحتاج إليه، ومؤازرته في كل حين، فما أمام العين لا يغيب عن القلب، وما في القلب لا تغفل عنه العين.

لذا يرتجف قلبي كلما قرأت قوله تعالى (واصبر لحكم ربك فإنك بأعيننا)، فغاية سعي أغلبنا أن يكون بعين أحد، ليملك الدنيا، ويحوز متعتها المطلقة، ويتحقق

ويعبر للصفة الأخرى من السعادة، وذلك جهد الأغيار، وبَشَر الحياة الواحدة، جهد المحرومين والمنقطعين والخائفين، أما الطامعون في الملكوت، ونوال جميع الحيات، الرابضون تحت عرش القدرة، الراكبون أجسادهم سفينة، وقلوبهم مطية، فلا تشغلهم سوى عيون الله.

()

إبليس خالف الرضا الإلهي بعصيانه -فالله ليس راضيًا عن تمرده، ولا سعيدًا به- لكنه لم يخالف المشيئة الإلهية -فلو شاء الله له السجود، لسجد جبرًا- وكذلك نحن عندما نخطئ، نخالف الرضا الإلهي، لكننا لا نتجاوز سياج المشيئة وجولها وقوتها، إنما -في أعماق نقطة بأرواحنا- نتعلق بها أن تنتشلنا، وتُقيمنا مرة أخرى على طريق الرضا، عندما يأذن صاحبها، ويفتح الباب.

()

ولعل النعمة تأتيك في ثوب النعمة، فإن تعلّقت بالظاهر وغفل قلبك عن الباطن، حقّ عليك الظاهر، وإن فوّضت، وارتضيت، وخرجت منك إليه، سرتَ بقدميه، ورأيتَ بعينه، وانكشف لك الباطن، فحقّ عليك الباطن.

()

المحنة قدرٌ، ينضج القلبُ فيها بالمكابدة، ويصمد بالتفويض، وينجو بالتسليم، ويخرج باليقين، ويستقيم على الطريقة برؤية الرحمة في باطن العذاب، والجمال في عمق القبح، والنوال في عين المنع، لأن الأسباب كلها وإن اختلف ظاهرها، باطنها الله.

()

معنى (ألا بذكر الله تطمئن القلوب) أنك إذا ذكرته في خلوة أو ملأ، في شدة أو رخاء، طمعا أو رهبا، ذكرك سبحانه بأحسن مما ذكرته، وأثنى عليك بخير مما أثبت عليه، ثم وضع لك القبول في قلوب عباده، وأجرى محبتك بينهم، فهمّوا في قضاء حاجتك، وتفريج همك، فيطمئن قلبك.

()

المشاعر -كل المشاعر- بتقلّب وتتغيّر -لأسباب تافهة وأسباب عظيمة!- ولو ما حرسناها صحت، وخلينا بالنا منها طول الوقت، ومدّيناها بأسباب البقاء، اعتى الأحاسيس وأشدّها اشتعالا هيخمد ويموء، ويمكن يتحوّل للنقيض بشكل غير مفهوم ومفاجئ تماما.

مش شرط تقصّر، مش شرط تغلط، بالعكس ممكن تكون بتعمل كل اللي عليك فعلا، لكن هي دي سنّة الحياة، القلوب اللي بين أصبعين من أصابع الرحمن، الابتلاء والمحنة، الصقل والبّري اللي بيحضرك لمرحلة تانية، ممكن تكون مهمة جدا وممكن تكون تافهة جدا!

في كل الحالات، لازم تكملّ، التوقف ترف لا نملكه، الانسحاب حلم لا يمكن تحقيقه، لا بدّ أن يظلّ (الموتور) دائراً وإطارات السيارة تنهب الطريق الطويل الذي يمتد على المدى دون أن نعرف متى يمكن أن نتوقف وأين وكيف!

()

في العادة، الأزمات -حرفياً- بتبهدلك وتخليك تحس بعدم الأمان، والحيرة، والتردد، والألم، والتوهان، واللاجدوى، وطول المسير، والقرق من كل حاجة، حتى إنجازاتك اللي تعبت وشقيت عشانها، لكن بعد انتهائها -وكده كده هتنتهي- بتكتشف إنها خدتك لمناطق ما كنتش متصور إنك ممكن توصل لها، وخرّجت منك إنسان جديد، يمكن تستغربه، لكن هتجبه، وهتعود تعتمد عليه بعد كده على طول، ولما تيجي الأزمة الثانية، هتبقى كبرت شوية، ورجليك ثبتت أكثر على الأرض، وقادر تشوف أفضل وأبعد.

حبّوا أزماتكم، لأنها أكثر حاجة بتخدمكم في الدنيا دي كلها.

()

معظم أحلامنا بتموت، عشان الناس هتقول علينا إيه، وعشان ما يصحّش، وعشان عيب وحرام، وعشان ماما ممكن تزعل وبابا يقفش وطنط تاخذ موقف!

وعشان اتربينا نفكر في الخطوة، وخطوة الخطوة، وخطوة خطوة الخطوة، قبل ما نعملها، وعشان عايزين نكسب بس، ومش مستعدين نتحمّل الخسارة، وعشان بنحب الأمان وبنكره الخطر، حتى لو كان هو الوسيلة الوحيدة للوصول للي إحنا عايزينه!

وعشان اتعلّمنا نتفرّج على الحياة بس مش نعيشها، مع إننا في النهاية بشر مش ملايكة ولا قديسين ولا سوبر هيروز، بنضعف، ونشتهي، ونخون، ونكذب، وننافق، وقلبنا بيتصرّف ضد إرادتنا ساعات، وغريزة البقاء جوانا بتتغلب على القيم والمثل العليا أحياناً.

لو ربنا كان عايز ناس ما بتغلطش، وما بتقومش من على سجادة الصلاة، ناس أنقى ومثاليين زي الكتاب ما بيقول، كان خلقهم، ربنا منزلنا بالأوبشن ده، عشان عايزه فينا، وحابين كده، وعشان تفضل العلاقة بينا وبينه، رايح جاي، خطأ ومغفرة، ثواب وعقاب، وصل وانقطاع، ربنا مش زعلان منا، ولا واقف لنا على الواحدة، قد ما البشر اللي حوالينا زعلانين منا، ومستنيين لنا غلطة!

()

أزمات الحياة -عمومًا- فرصة مثالية جدّا للنضج وتطوير استجاباتنا، واختبار مكتسباتنا، وإعادة فرز خياراتنا، ومغادرة بُرج العشم العاجي والنزول إلى أرض

الواقع، ومعرفة مدى ما وصلنا إليه من قوة أو ضعف، من تكيف أو انزواء ووحشة، وإيه اللي محتاجين نشتغل عليه أكثر الفترة الجاية.

مؤسس علم النفس التحليلي، السويسري كارل يونج، يقول إننا جميعا لدينا ما يُسمّى بـ"الظل"، وهو أفكارنا ومشاعرنا ومفاهيمنا المكبوتة اللي مش قادرين -أو مش عايزين- نعترف بيها ونتعامل معاها، لحد ما بتيجي الأزمات عشان تخلينا مضطرين- نواجهها، ونتعرف عن قرب إلى هذا الظل الخفي.

وده من شأنه إنه يجعلنا أكثر إنسانية ونضجًا في إدراك ما نتشارك فيه جميعا في هذا العالم، ويمدّنا بتفاسير ربما ما خطرتش على بالنا قبل كده للعديد من الأشياء.

الجانب السلبي الأكثر وجعًا للأزمات إنها بتوقّع ناس كثير من نظرك، وبتضطرّك تغيير خارطة تعاملاتك، وترتيب الناس -على مقياس من واحد لألف- في قلبك، والبدء من جديد في كثير من الطرق والعلاقات اللي كنت فاكّر أمرها محسوم، لكنها سلبية إيجابية إن جاز التعبير، لأنها بتخليك تشيل من على قلبك وتفزز وتنحاز وتقيم على نور.

أهم شيء، خلال أي أزمة تمر بيها، أو محنة، أو ابتلاء، إن يبقى لك ثقبك الخاص، شبّاكك اللي بتطلع تبصّ منه على كل شيء من فوق، فتتعالى على الحدث الجاري وما تتورطش فيه كليًا ويستلبك ويخليك عنصر من عناصره.

وفي كلِّ، قُل الحمد لله.

()

كل ما علاقة في حياتي تنتهي على غير توقع، أو شخص يخذل دون انتظار، أتذكر قول الله لسيدنا نوح عن ابنه (إنه عمل غير صالح)، وأقول في نفسي: إنه شخص/علاقة غير صالح/غير صالحة، ولعل الاستمرار فيها كان قد أورثني الكفر بكل شيء، وسلب مني أكثر مما أفاء عليّ، فالحمد لله على ما أعطى والحمد لله على ما أخذ.

()

من التقنيات النفسية الناجعة في تخفيف هزائم الماضي وذكرياته السيئة: إضفاء معنى جديد عليها، ووضعها في سياق مختلف، وربطها بملامح أكثر إيجابية، ورؤية النعمة اللي اختفت بين طيات النعمة فيها.

فتجربة الحب الفاشل اللي مريت بيها مثلا، رغم وجعها.. أثبتت لك قدرتك على الحب، والعطاء، والفناء في الآخر وإنكار ذاتك لإسعاد الطرف الثاني، ومنحتك أيام طيبة وحنينة، وانتهاءها -بصرف النظر عن التفاصيل- حرّرك من قيود المسؤولية،

ومنحك فرصة جديدة للانطلاق ودخول تجارب ثانية ممكن تكون أكثر مناسبة ليك، وتوافقا مع ظروفك.

والوظيفة التي اضطررت تسببها غصب عنك، رغم قسوة التجربة.. خلتك تدرك قدرتك على تحمل المسؤولية والعمل ضمن فريق ووضع أهداف قابلة للقياس والتحقيق، ودلوقتي عندك فرصة للبدء من جديد مستفيدا من كل الخبرات اللي حصلتها واللي هتفرق معاك جدا في اللي جاي، وهتبقى مساحاتك مفتوحة أكثر وشهيتك أكبر للمخاطرة وتجربة حاجات يمكن ما كنتش واخذ بالك منها وإنت آمن في شغلانتك قبل كده.

والشخص اللي خذلك، كشف لك في الوقت نفسه قدرتك على تحمل الألم، واجتياز المحنة، واختبار مسلماتك ومنظومتك القيمية، والبحث عن بدائل ومحطات ثانية لتجاوز العوز والوحدة، وإعادة تعديل بروتوكولاتك لتحديد اللي يستحق دخول حياتك من عدمه، وأغلق دائرة الشك والإحساس بالذنب اللي كنت عايشها وحالة التشوش بخصوص قدرتك في الحكم على الأشخاص.

وبالطريقة نفسها: أي تجربة نمرّ بها مهما كانت مأساوية وغير متوقعة أو قابلة للتصديق، بتحمل في أعماقها عبرة أو درس أو علامة ما أو بداية طريق مختلف، وباكتشاف الحقيقة دي والإيمان بيها، هتتغير الصورة الذهنية للماضي في أعماقنا رويدا، وتُعاد برمجة أدمغتنا بالكود الجديد اللي وضعناه للحدث بعد تحليله منطقيا واستبعاد الصعابيات والجوانب السلبية منه وتقشير صورة الضحية اللي بلا حول ولا قوة اللي بيحلو لأغلبنا ارتداءها، وصولا لتحويل الماضي من إيد ذات مخالب متبته في هدومنا وبتشدنا لورا بكل قوة، وتزدرى محاولتنا المستقبلية للقفز فوق الألم.. إلى لحظة تنوير فارقة في السيناريو، ومخزن خبرات لبكره، وإضاءة مركزة على جوهر شخصياتنا وحقيقة معادنا الداخلية وطاقاتنا الكامنة.

()

- "لا تحسبنّ رقصي بينكم طربا.. فالطيرُ يرقص مذبوحا من الألم!"

- وليه يرقص أصلا يا حبيبي ساعة الألم؟! ما يقول آه، يصرخ، يخرّبش، يعض إيد اللي بيدبّحه، يزق بجناحه لقدام يمكن يفلت!

لكن رقصه ده اللي مطمع الناس فيه طول الوقت، ومخليهم يدبّحوه عشان يتفرجوا عليه، ويطفّوا السجاير في جسمه عشان يتسلوا ويقضوا وقت لطيف ومرح، لكن لو قام لطش للكل، دخل ريشه في عنينهم، وقرمهم بمنقاره في حية قلبهم، ومسك السكينة مرة ودبح حد فيهم أو عوّره حتى، هيبتلوا ضحك والله العظيم وطرب وفرجة عليه وإفيها، وهيعللوا له ألف حساب ويقفوا له انتباه لما يعدي قدامهم.

()

إحنا بنجيب آخرنا بسرعة، عشان بنحمل نفسنا فوق طاقتها: نضحك في وشّ اللي بنكرهه، نخرج مع اللي ما بنحبّوش، نشغل في مكان مش طايقينه، نكمل في قصة عارفين نهايتها كويس، نعرف بني آدمين مؤذيين لينا بجد ويببخوا طاقة سلبية في وشوشنا، نأجل عمل اللي بنحبّه لحد ما يبوط ومايقالوش طعم، ندي اللي حوالينا الحق في انتقادنا وتبكيّتنا، نعلق نفسنا بأشخاص/ حاجات/ علاقات واثقين تماما إنها مش لينا، وبعدين نشتكى: ليه يا رب عملت فينا كده؟! مش ربنا اللي عمل حضرتك، ده غباءنا وغرورنا اللي بيخلينا نعمل نفس الحاجات كل مرة، ونتوقع نهايات مختلفة!

اكسر دائرة المعتاد، واعمل اللي إنت عايزه دلوقتي حالا. أرجوك.

()

لو عندك كوباية مليانة مية آسنة، هتفضل ريحتها وطعمها في منتهى السوء، لحد ما تصبّ فيها مية جارية من جديد، فتحصل عملية إزاحة وإحلال وتبديل؛ المية العطنة تروح وتفضل المية الحلوة اللي تصلح للشرب والريّ.

قلبك هو الكوباية، والمية الآسنة: التجارب المؤذية والناس الغلط اللي بتصر تحتفظ بيهم في نطاقك، لحد ما عمرك كله يعطن، وتتوقف عن الرغبة في الحياة! والحلّ هوّ هوّ: الإزاحة والإحلال والإبدال.

افتح صوابك وخلي اللي لازم يمشي يمشي، ما تتشبث بهوا وما تعبدش خيال مآة، اعرف ناس حقيقية، ادخل تجارب بجد، تليق بيك وتليق بيها، ما تخافش من الوحدة ومن الفراق، وخاف من استعذاب الدموع والثبات على الوجع.

عافر وعافر وعافر لحد ما تملا كوبايتك مية إفيان.

()

كلّما فكّرتُ في كل الفرص التي أضعتها، لأنني كنت أنتظر ما هو أروع منها! كل الأشخاص الذين فارقتهم لأنني كنت أومن بأحقيتي فيمن هو أفضل! كل الساعات التي أنفقتها في القلق، لأنني كنت أتوقع أن يحدث فيها ما يكدر عيشي..

أتأكد أن الإنسان أكبر عدو لنفسه؛ يصنع الأوهام ويسجد لها، يحفر الحفرة بيديه ويسقط فيها، يرى سُبُل النجاة ويتغافل عنها، يريد السعادة والتحقق ظاهرياً، فيما أنّه في أعماقه يعشق المظلومية ويتمنى أن يظل ضحية للأبد!

()

إنت مش نكدي، إنت بس عايز اللي يكتشف طريقتك في الفرح.

()

فيه مشاكل مش محتاجة دكتور نفسي أو مساعدة صديق أو قريب لحلها، مع ذلك بنجري عليهم ونفوضهم في أخذ الخطوة دي، لمجرد إننا ما نتحملش مسؤولية حاجة، ولا ندفع تمن قرار خدناه بنفسنا، ولو فشلنا نلاقي شماعه جاهزة نعلق عليها اللي حصل!

وغالبا بتبقى هي دي المشكلة الرئيسية اللي عايزة حل مش الحاجة اللي دفعتنا للاستعانة بالغير!

النفس البشرية مراوغة، وبتخاف من تغيير وضعها ومفارقة اللي اتعودت عليه - حتى لو مضر!- عشان كده طول الوقت بتستخبي ورا أقنعة، وتطلع حاجات هامشية وأقل أهمية في الواجهة، عشان نتشغل بيها ونفرح لما نتعامل معاها وما نسعاش للتغيير الجذري.

وهنا بيبرز دور الوعي، وعينا بطبيعة مشكلتنا، وتعبنا من شيلها فوق ظهرنا، ورغبتنا في مواجهتها والتخفف منها، وحجم الألم والانكسار اللي عايناه منه، وده -حرفيا- نص العلاج، واللي باقي هيبقى مجرد اتباع بروتوكولات معينة ومعروفة للوصول من النقطة أ للنقطة ب.

الصحة النفسية لا تعوض بثمن، وراحة البال والسعادة والنفس المطمئنة كنز يستحق السعي لنواله، مهما كانت الصعوبات والتحديات المطلوبة. لما توصل هناك، هتعرف قيمة اللي عملته، وقد إيه كنت مضيع على نفسك فرص مستحقة للسعادة، بسبب أوهام ملهأش وجود غير في مخك. نفسك تستحق.

()

ما تجيش على نفسك طول الوقت عشان حد مش حاسس بيك، على أمل إنه يحس، مش هيحس!

ما تحاسبش على مشاريب حد بيص لك على إنك مرحلة في حياته مش مُستقر، يمكن يغير وجهة نظره فيك، مش هيغير!

ما تشيلش القفة أم ودينين مع حد مش هيعرفالك تاني بعدها، يمكن يقدر، مش هيقدر!

هي حياة واحدة بس فمفيش أي داعي تبقشش بيها على حد غير نفسك.

()

التغيرات الكبيرة في شخصيتك/الانقلاب العنيف في عالمك وتصرفاتك وطباعك/ كسر الحدود والعادات والتقاليد اللي بيحصل من حين لآخر، بسبب صدمة/ تجربة مريرة/ نضج/ ضغط مجتمعي/ احتياج يبدو لمن حولك أحيانًا مخيف وغير عادل

وْمُهَدِّد لَأَمَانِهِمُ الشَّخْصِي وَمُنْذِر بِتَقْلِيدِهِ مِنْ ذَوِيهِمْ، وَبِنَاءٍ عَلَيْهِ مُمْكِنٌ يَعِيدُوا تَرْتِيبَ وَجُودِكَ -أَوْ عَدَمِهِ- فِي حَيَاتِهِمْ عَلَى خَطِّ الْأَهْمِيَّةِ مِنْ أَوَّلٍ وَجَدِيدًا!

لَكِنْ أَيْمَا كَانَتْ الْخَسَايِرُ الْمُبْدِئِيَّةُ، وَالضُّغُوطُ الَّتِي بَتْمَارَسَ عَلَيْكَ عِشَانُ تَفْضُلٍ سَادَرَتْ مَعَ الْقَطِيعِ، وَالنِّعَمُ الَّتِي يُبْلَوُّ بِالْحَرَمَانِ مِنْهَا: كَمَلَّ وَهَتَبَقَى -يَقِينًا- أَحْسَنَ، لِأَنَّكَ -حَتَّى لَوْ خَافَ وَمَتَلَخَبَطَ وَمَشَّ وَاثَقَ تَمَامًا مِنْ خَطُوتِكَ الَّتِي جَايَةً دَلُوقَتِي- بَتَكُونُ أَقْرَبَ لِنَفْسِكَ الْحَقِيقِيَّةِ الَّتِي كَانَتْ تَايِهَةً مِنْكَ، وَكُلَّ شَوِيَّةٍ/ضَرْبَةٍ/ تَجْرِبَةٍ هَتَلَاقِي الْمَزِيدَ مِنْ نَفْسِكَ الْأَصْلِيَّةِ، زِي الْبَازِلِ كَدَهُ، لِحَدِّ مَا تَجْمَعُ نَفْسُكَ كُلِّهَا فِي حَضْنِكَ فِي النِّهَايَةِ، وَتَكْمَلُ مَعَهَا عَنْ اقْتِنَاعٍ.

()

السَّيِّدُ الْمَسِيحُ يَقُولُ: (كُنْ فِي هَذَا الْعَالَمِ وَلَكِنْ لَيْسَ مِنْهُ)، وَالْإِمَامُ عَلِيٌّ يَقُولُ: (كُنْ فِي الدُّنْيَا كَعَابِرِ سَبِيلٍ).. يَعْنِي اسْتَمْتَعْ بِالأَشْيَاءِ لَكِنْ مَا تَتَوَرَّطُ فِيهَا لِدَرَجَةٍ إِنْ غِيَابُهَا يُوْجَعُكَ، وَيَقْلِلُ سَعَادَتَكَ، وَيُوقِفُكَ، وَيُغَيِّرُ وَجْهَةَ نَظَرِكَ فِي الْحَيَاةِ.

عِيشْ بِسَ مَا تَتَغَمَّسُشْ، مَا تَدَوَّرْشْ عَلَى الْكَمَالِ أَوْ الْأَبَدِ أَوْ الْقِيَمَةِ الْمَطْلُوقَةِ، أَتَقْنِ الْمَشَارَكَةَ لَا الْحَيَاةَ، الْوُقُوفَ عَلَى الْحَافَةِ لَا السَّقُوطَ فِي قَرَارَةِ الْبُئْرِ.

فِي النِّهَايَةِ، كُلُّنَا مَرَا حِلَّ فِي حَيَاةٍ بَعْضُ، وَالدُّنْيَا نَفْسُهَا مَرَحَلَةٌ فِي رَحْلَةٍ الدَّيْمُومَةِ، وَلَوْ دَامَ شَيْءٌ لَلِي قَبْلُنَا مَا كَانَشْ وَصَلَ لَنَا، فَاسْكُنْ.

()

تَدْلِيلُ الذَّاتِ وَمُكَافَأَتُهَا.. ثَقَافَةٌ غَايِبَةٌ عَنْ أَغْلَبِ الْمَصْرِيِّينَ الْمَرْبُوطِينَ فِي سَاقِيَةِ الْحَيَاةِ الْيَوْمِيَّةِ مِنْ صَبَاحِيَّةٍ رَبَّنَا لِحَدِّ آخِرِ اللَّيْلِ، عِشَانُ كَدَهُ طَاقَتِهِمْ بَتَنْفَدُ سَرِيعًا، وَبَتِيحِي عَلَيْهِمْ لِحِظَةٍ يَقْعُوا وَمَا يَقْدَرُوشْ يَكْمَلُوا!

فِي حِينٍ إِنْ حَاجَاتُ بَسِيطَةٍ جَدَا مُمْكِنٌ تَشْحَنُ الْبَطَارِيَّةُ مِنْ تَانِي وَتَرْوُقُنَا كَامَ مَتَرٍ لِقَدَامِ: جَلِيسَةِ مَسَاجٍ، خُرُوجَةٍ عَلَى ضَهْرِ مَرْكَبٍ أَوْ فِي حَضْرَةِ الطَّبِيعَةِ الْبَكْرِ، عِشَا لَوْحَدِكَ فِي مَكَانٍ بَتَحْبُهُ مَعَ شَوِيَّةٍ مَزِيكَا، دُخُولِ السِّيْمَا، سَشْنُ يُوْجَا، طَبَقِ فُولٍ بِالزَّيْتِ الْحَارِّ مِنْ عَلَى الْعَرَبِيَّةِ وَتَحْبِسُ بِكُوْپَايَةِ شَايٍ بِالنِّعْنَاعِ، شَرَا طَقْمٍ عَاجِبِكَ، التَّمَشُّيَّةَ عَلَى النَّيْلِ، حَفْلَةٍ غَنَا أَوْ زِيَارَةِ الْأَوْبَرَا وَالْمَتَاحِفِ الَّتِي فِي كُلِّ شَبْرٍ فِي مِصْرٍ، رَحْلَةٍ لِدَهَبٍ، تَسْلُقُ جَبَلَ مُوسَى، سَنُورَكْلِينَجْ..

لَوْ بَصِيتَ لَهَا، هَتَلَاقِيهَا حَاجَاتُ بَسِيطَةٍ، مَشَّ هَتَضْلَعُكَ قَوِيَّ يَعْنِي وَلَا هَتَخْلِيكَ تَشَحَّتْ لَوْ حَطِيطَتُهَا فِي الْإِعْتِبَارِ وَعَمَلَتُهَا مَرَّةً كُلَّ شَهْرٍ أَوْ شَهْرَيْنِ، وَمَعَ ذَلِكَ فَآثَرُهَا حَقِيقِي هَايِلٌ وَعَظِيمٌ وَمُجَدِّدٌ!

اعْتَبِرْ نَفْسُكَ صَدِيقَ عَزِيزٍ طَالِبٍ مِنْكَ خِدْمَةٍ يَا أَخِي، أَوْ حَبِيبٍ قَاصِدِكَ فِي مَصْلَحَةٍ، وَاسْتَجِيبْ لِيهَا مِنْ حِينٍ لِآخِرٍ، اِتَّجَنِّ، اِفْقَدْ السَّيْطَرَةَ، غَامِرٌ، جَدِّدْ خَلَائِيكَ وَافْتَحْ مَسَاحَاتَ تَخْرُجُ الطَّاقَةُ السَّلْبِيَّةُ وَتَهْبِكُ السَّلَامُ النَّفْسِي.

طَوَّلِ الْإِحْتِكَاكَ بِالْحَيَاةِ، وَالْكَبَدَ وَالْجَرِيَّ بِالْمَشْوَارِ وَشَيْلِ الْهَمِّ وَالتَّفَكُّيرِ ٢٤/٧ بِيَفْكَكَ

المدة اللاصقة اللي بتلضم جسمك بروحك بطاقتك بحيويتك، وبيفرغك فجأة من الرغبة في التحرك خطوة واحدة لقدام!

إحنا عمر ما كانت مشكلتنا الأساسية قلة الفلوس -مع إنها مشكلة كبيرة طبعا- لكن إننا ما بنعرفش نفصل، ما بنعرفش نبسط، حتى لما بتجيلنا الفرصة!

()

مش مستحيل الوصول للسعادة على فكرة، وماهياش مكتوبة بالحبر السري ولا باسم ناس عن ناس، ولا لازم نبذل مجهود خرافي عشان تبقى من نصيبنا، السر ممكن تلخيصه في كلمة واحدة بس: الرضا.

الرضا باللي اتحقق من الرحلة -أيا كان- والرضا باللي جاي، أيا كان برضه، والتسليم بإننا نستحق اللي وصلنا له.

بمعنى إنك تقبل اللي صار، مش ما تبقاش طموح، لا، اتشقلب وكافح وذاكر واشتغل واتعب وحاول تطول النجوم، لكن أيا كان اللي هترسى عليه في النهاية: ارضى بيه، وابدأ من ثاني عافر مع حلم جديد.. وهكذا.

وبعيد عن غرورنا الشخصي إننا برنسات وما بنغلطش وأحسن ناس في الكوكب وإن الآخرين هم اللي أغبيا وما يستحقوناش، وإننا جينا الزمن ده غلط وخسارة في مجرة درب التبانة؛ فيه مساحة واهية جدا من الصدق مع الذات بتقول إننا عارفين كويس إحنا عملنا إيه، وإيه أخطاءنا وإيه اللي ما كانش يصح، وإيه اللي ما كانش لازم نعمله عشان ما نوصلش للنقطة دي!

ومناطق كل شيء، واستعادة ذكريات الهزيمة كل شوية، والضيق والخنقة والخناق مع نفسنا ومع الكون، ومحاولة إحياء الموتى والعلاقات منتهية الصلاحية، أو أخذ جنب ورفع إيدنا عن الحياة والانعزال التام، مش هيوصلنا لأي حاجة ولا هيغير شيء، إنما النظر بعين الرضا والتسليم لكل اللي فات.. هيجير، لأنك بكده بتقر بالمسؤولية وتعتزف بالتقصير وتخط عتبة ثابتة تحت رجلك تبدأ من عليها، نقطة ومن أول السطر.

وفي السطر الجديد، ما تكرررش أخطاءك، ما تمشييش نفس الخطوات وتتوقع نهايات مختلفة، ما تمسكش في نفس الأشخاص الغلط، ما تفتحش الباب للتجارب نفسها اللي قصمت ضهرك، ما تفضلش حد ما يستحقش على نفسك، ما تعملش حاجة مش مقتنع بيها، وبطل تتفرج على الحياة وبينك وبينها لوح إزاز ضخم من خيالاتك وأوهامك وأمنياتك.. وعيش.

عيش بقى يا أخي أبوس أي حته فيك.. عيش!

()

دائماً خلّي بينك وبين الحياة طبقة عازلة، عشان تقلل الاحتكاك اللي بيؤدي للتآكل: أصحابك، المزيكا اللي بتحبها، مشروعك، حلمك، كتابتك. اوعى تفكر تواجهها راجل لراجل، الحياة مش راجل ولا ست، الحياة قوادة!

()

عادةً ما بنحسّش بالفانلة الداخلية، غير وإحنا بنلبسها أو بنقلعها بس، لكن غير كده: جسمك بيتعوّد على ملمسها، ويألفها، فما بيحسّش بيها، وبيتجاهلها، زي ما قال مصطفى محمود.

ونفس الحكاية مع الناس: طول مُقامك بينهم، وإتاحتك على طول، ووجودك تحت الطلب، بيخليهم يفقدوا إحساسهم بيك، وبأهميتك، ودورك في حياتهم، ومع الوقت.. ممكن بسهولة جدّا ينسوا إيه اللي خلاهم يحبّوك من البداية، أو الفارق بين وجودك وعدمك!

ما تبقاش -لا مؤاخذه- فأنلة!

()

ضعفك -من حين لآخر- عياطك، هزيمتك، تخلي الآخرين عنك، خوفك، اكتئابك، عثراتك، غياب اليقين، موت الأحلام، احتياجك لحضن، لكثف تسند عليها، للبوح والفضضة والشكوى، للدبدة برجليك والصريخ والشتيمة، للقعاد لوحدك... ما يتناقضش أبداً مع إنك قوي.

إنت قوي جداً.. لكن إنسان.

ما تخافش.

()

فيه تجارب لو عدّيت منها حيّ، مهما كنت مثخن بالجراح وغرقان في الدموع، مفيش حاجة هتأثر فيك بعدها، ولا حد هيفرق معاك.

()

اعترف بعيوبك، وبروزها، قبل ما حد يعايرك بيها، ويعتبرها نقطة ضعف، وينفذ ليك من خلالها، واعتبرها منحة مش محنة، لأنها كده فعلاً.

لما جيت القاهرة، بعضهم كان بيبيص لي بتعالي، ويستغرب من لهجتي، فكنت أضحك في وشه بابتسامة صفراء، وأقول له: أصلي قروي ساذج بهرته أضواء المدينة.

وأما كان حد يبقّي عايز يضايقني، ويرمي إيغيه على عيني الحولة، كنت أرزعه كلمة ثقيلة، ولما يبص لي بدهشة، أقوله: هي جت فيك؟ أنا كنت قاصد اللي

جنبك، أصل أنا أحول زي ما إنت عارف.

ولما كنت بتعلم إنجليزي، وأتكلم مع مصريين، ويتريقوا على الأكسنت بتاعتني، أكمل عادي بمنتهى الثقة، وأصدر لهم الطرشة، ودلوقتي بترجم مواقع كاملة، وبكسب فلوس من الشغلانة دي، وهم لسه بياخدوا كورسات في معهد القوات المسلحة.

الآخرين مهمتهم في الحياة إحباطك، ومهمتك إنك تقاومهم، وتطلع فوقهم، وتثبت أحقيتك وجدارتك بالحياة.

وأقول لك حاجة أخيرة: الحياة مش هيبقى لها طعم، من غير ولاد الجزمة اللي بنقابلهم فيها دول :

()

إحساسنا بالاستعجال للوصول لآخر الحاجات، وخوفنا من عدم تكرار الفرص، واعتقادنا الظالم في نفسنا إننا مش هنبقى أهل ليها تاني، بيخلينا نتصرف بغباء مُفرط، وتسرع مقيت، فنضج كل شيء، ونخسر -بلا رجعة- الثمار اللي كانت على وشك الوقوع بين أيدينا. افهم أو مُت!

()

- دقة الساعة ما بترحمش، بتقول كله بيخلص!

- بس بتيحي بعدها دقة تانية، بتقول إن لسه فيه أكثر في طريقه لينا.

- الوقت اللي بيعدي بيتخضم من العقد!

- بيتخضم من العقد، بس بيزود خبرتك عمومًا بالبنود والحالات والعقود اللي بعده، وبيقربك من الفهم الكامل لنفسك واللي حواليك، بالتجربة مش بالظن والخيال، نفس منطق التراب اللي بينقص من الحفرة لما بنشيله، أه بينقص بس بيزود عمقها، ويخليها جاهزة للقيام بدورها اللي ربنا خلقهولها.

()

ولا يلبثُ العائدُ بجنابِ ربّه في المُلَمَّات أن يفوزَ بإحدى الحُسنيين: إما تفريج الكرب وإما التفويض بالقوة لتحمله.

()

أوقفني في المحبة، وقال لي: إذا طرقت ولم يُفتح لك، فامكث، وإذا ناديت ولم يُؤبه لك، فرابط، وإذا عمِلت ولم يُر لك أثر، فثابر، إنما هو صبر يوم أو بعض يوم، حتى يُفتح وتنادى وتُرى، فتسكن.

()

كلُّ ما نمُرُّ به الآن، سبق أن رأيناه قبلاً في ظروف مختلفة وأشكال مغايرة، ولو كنّا بالرهافة الكافية لإدراك ذلك، فلن يفاجئنا شيء في الحياة مجدداً، ولن يعود للمصائب/للنعم أي تأثير علينا، سنكون كمن ذاق طَعْمًا مرة في غابر الزمان، فأصبح قادراً على تمييزه كلما مرّ تحت ضِرسه ولو تخفّى في ألف صنف!

()

زي ما عندنا كراكيب زاحمة بيوتنا ومحتلة مساحات من الفراغ إحنا أولى بيها، فيه كراكيب تانية أخطر جَوّاناً: علاقات ملهاش لازمة/شغل لازم يخلص/مواقف لازم تتحسم/كلام لازم يتقال/وعود لازم تتنفذ/حاجات لازم تتعلمها/مشاوير لازم تتعمل/مشاعر لازم يتحط لها حدود.

وكل ما بناجّل التخلص منها، بتحتل مساحة أكبر، وتخلينا أبطأ في رد الفعل، وأكثر تسامحاً مع الفوضى ووهنا في تحقيق أحلامنا ومعرفة السكة اللي لازم نمشي فيها، وصولاً للوقوف محلك سر، وإفساح المجال لكراكيب أكثر! والخوف ليحي يوم، تحتاج الكراكيب مساحة أكبر وأكبر فتطردنا -بلا تردد- من أنفسنا وتفضل هي لوحدها إشارة ودليل على إن كان فيه زمان بني آدمين هنا، لكن هزمتهم عبادة الكراكيب!

()

الأمل بيقدر يعيش جواناً طول الوقت -رغم كل إحباطاتنا والشواهد الواقعية على استحالة تحقيقه- لأنه من نفس مادة الروح المتعالية على أحكام البلى والتفسيخ والتحول والمنطق والزمن التي تجري على الأجساد.

وهو ده الميكانيزم اللي هياها ربنا سبحانه لينا لعبور الشدائد والمحن وتحمل وطأتها الشديدة وقرعها العنيف.

والكارثة بتحل لما بيحصل أي خلل لجهاز الأمل فيعطل ويتوقف مؤدياً لفرط الالتصاق بالواقع وعدم القدرة على رؤية ما هو أبعد منه، وصولاً لوضع الروح قصراً تحت مقصلة الجسم، فيجري عليها ما يجري عليه من هرم وعجز وانحلال!

لكن مادة الروح غير المعدة لذلك ولا المستوعبة له، بتعطب أسرع وأعمق، وصولاً لتدميرها تماماً وخروجها من الخدمة، حتى لو ظل عائلها _الجسم_ على قيد الحياة!

فما تقطعوش كل الحبال، وما تسدوش كل المنافذ، وما تهدوش كل السرايب والطرق الخلفية (فما أضيق العيش لولا فسحة الأمل)!

()

لا نصايحي هتفيدك في حاجة، ولا نصايحك هتفيدني، لأن كل واحد ليه ظروفه،

وحساباته، ونشأته، وأحلامه، ودماغه، وحيله الدفاعية، ومهما نحاول نتقمّص أدوار بعض، مش هنقدر، كل واحد كون قائم بذاته، ولو التقينا في بعض المدارات، ممكن نلهم بعض، نشجع بعض، ننور لبعض لحظات معينة، لكن مفيش تجربة بتُستنسَخ، ولا حالة بيُعاد إنتاجها، فنوفر على بعض الهري والهري المضاد، ونقلع توب أبو العُريّف، والعالم ببواطن الأمور، وننزل على الأرض شوية، ونخوض تجاربنا بنفسنا.. ولنفسنا.

()

الذي تغيّر، لم يكن أصليًا، والذي قلّ، كانت زيادته «عيرة»، والذي ركب الموجة، كان عابر سبيل، والذي استسلم، خُلِق كمطيّة، والذي انفضّ واختفى وتبخّر وذاب، لم يكن إلا خيالاً صنعه احتياجنا!

()

بعض الناس بتخاف من انطلاقك وحرّيتك وحُبّك للحياة واستيعابك للآخر وتقبل المختلف عنك وسعادتك وإنت بتجرّب حاجات جديدة، أو بتعمل حاجة مجنونة، لأنك بتهدّ لهم سلامهم الداخلي وتصالحهم مع عجزهم وعدم قدرتهم على الحركة لقدّام، وبتثبت لهم إن الأحلام بتتحقّق عادي، والدنيا ممكن تبقى حلوة فعلا بشوية تعب، وإنهم ماكانوش مضطّرين للتنازلات الفادحة اللي قدّموها، فبيحاولوا يعملوا دوشة، ويعلّوا صوتهم، ويشاوروا لك على كل التجارب الفاشلة عشان تتعظ، ويسفّوها منك، ويشفطوا حماسك، ويشدّوك لورا معاهم، أملا في إنكم كلكم تبقوا زي بعض في النهاية!

زي طالب فاشل مش عارف يحلّ الامتحان -ده قبل شاومنج طبعًا!- فيعمل دوشة في اللجنة، يتكلم بسرعة ويتنطط ويصرّخ بصوت عالي، ويشاور في كل الاتجاهات، وعازيز رئيس اللجنة والمراقب العام واللي حط الامتحان ووزير التربية والتعليم نفسه!

لأنّه لو ما عملش كده، وسَقَط، بينما حد جاب الدرجة النهائية، منظره هيبقى وحش قوي، وهيتكشف، لكن لما يعمل دوشة، هيحرض الفشلة اللي زيّه، يكشفوا عن نفسهم، ويبدأوا يبتّوا سمومهم معاه، ويمكن يشكلوا ضغط يوصل لفوق، فالامتحان يُعاد النظر فيه، أو أضعف الإيمان، لما النتيجة تطلع، يمصمص شفايفه، ويقول لك: الامتحان كان صعب موت، حتّى اسأل اللجنة "كلها"!

حكمة العدد: حل أسئلتك لوحداك، وملكش دعوة بالدوشة اللي حواليك في اللجنة.

()

إنت جوّا الثقب الأسود للعلاقة الجائرة، بتعتقد لوهله إنك فقدت حواسك الخمس، ومش هتستعيدها تاني أبدًا، لكن بمجرد ما بتخرج من أكفانك، بتلمس

النور وتشوف الروايح وتشم الحياة، وتُبصر كل حاجة بحجمها الطبيعي، زي اللي جوا الأسانسير بيتجي عليه لحظة ما ييقاش عارف هو بيطلع ولا بينزل، لحد ما يلاقي عَتَبَة ثابتة برّه يقيس عليها.

دور على العَتَبَة الثابتة في حياتك، اللي تبين لك إنت طالع ولا نازل.

()

مع الوقت بتكتشف إن اللي بيلوموك على أي حاجة بتعملها: مش قادرين يعملوها، أو خافين، أو مايقدروش يتحملوا تبعاتها، أو لسه متعلقين بأستار التقاليد البالية، وبيحافظوا على مكتسبات، في الغالب عمرهم ما هiestخدموها!

وبدل ما يفهموا إن العمر أقصر من حيرتهم وترددهم وتأجيلهم حياتهم، بيحاولوا - باستماتة- يخلوك زيه: نسخة، هيكل خارجي بلا إرادة داخلية، مسخ، مستخدمين في ذلك أسلحتهم الثقيلة والخفيفة: الدين، العُرف، الظروف، العادات، السن، الشكل الاجتماعي، بلا بلا بلا...

لكن عمرهم ما بيقدّموا حل لمشاكلهم، ولا بيجاوبوا أسئلتهم، ولا بيقدّروا ظروفهم، ولا بيتفهموا احتياجاتهم!

وإذا كان ملعون أبو الناس العزاز.. فما بالك باللي مش عزاز أصلاً؟
سيبك منهم.. كمل.

()

ثم تُدرك أن القوة ليست في التمسك، إنما في التخلي.

()

الباب بيبقى مقفول ومتربس وعليه عنكبوت من الناحية اللي إنت واقف عندها، لكن من الناحية الثانية، اللي عينك مش شيفها، فيه شرخ بيتكوّن ببطء، لو قنطت وأدرت ظهرك وشدت الرجال لسواه، فاتك الخلاص، وانغلقت دائرة القضاء، ولو صبرت ورابطت، رغم يأسك ومحنتك، الشرخ هيتسع ويبقى طاقة نور، تعدي منها للضفة الأخرى، راضيا مرضيا.

()

ساعات بعد العلاقة ما تنتهي بفترة، أحد الطرفين بيقرّر يرجع: حنين بقى، عنده وقت فراغ مش عارف يملأه أزاى، عايز يتأكد من حاجة، مستخسر العمر اللي راح، المهم إن ده بيحصل، لكنه في الغالب بينتهي بخيبة أمل مضاعفة، وساعات ما بيقتضيش على مستقبل العلاقة بينهم بس، لكن بيشوّه الماضي كمان!

والتجربة بتقول إن فيه علاقات لازم تنتهي يوم ما تنتهي، لأن إحياء الموتى عمره ما هيكون من مواهب المُحبّين، وبديلا عن ده لازم نؤمن بقانون "الجُهد المُهدر"،

واللي بيقول إن فيه مجهود بتبذله ساعات وما بيوصلش لأي حاجة، أو بمعنى أدق ما بيوصلكش للي إنت عايزه حالا، لكن أكيد بيبقى له ثمرة ونتيجة، حتى لو ما أدركتهاش دلوقتي، وده طبيعي جدًا وعادل، لأن مستحيل كل الجهود تبقى ذات ثمرة آنية.

وده القانون اللي الطبيعة نفسها ماشية عليه من يوم ما اتخلقت: مش كل الحيوانات اللي بتتولد بتعيش، مش كل البذور اللي بتتزرع بتخرج نباتات، مش كل الأمطار اللي بتنزل بتلاقي أرض صالحة تستفيد منها.

فافتح أصابعك يا صديقي.. ودع الخيط الواهي يسقط من بينها للأبد.

()

اللي جاي جاي، والحاجات لما يتحصل بتفقد هيبتها، والوجع لما بيطول بيبقى زيّه زي غيره، والخذلان لما بيتكرر بيبقى زي شبكة الدبوس. بنجمد ونكبر ونتغير ونكمل الطريق زي الصناديق المقفولة على أسرارها، وقلوبنا -رغم كل الفقد- بتفضل جوابات قديمة متعطّرة محبة مستنية اللي يعرف يفك الطرف بتاعها ويقرأ أبجديتها ويعيش.. ويعيشنا.

()

السلوك الإدماني ليه مجموعة محدّات وعلامات معينة، لو لقيت نفسك بتعملها، يبقى لازم تسمي الأشياء بمسمياتها الصحيحة عشان تعرف تلاقي حل.

١. الاستحواذ الذهني

إنك طول الوقت بتفكر في الحاجة اللي واقع تحت تأثيرها، وإنت نايم وإنت صاحي، وإنت مبسوط وإنت زعلان، وإنت لوحذك وإنت مع الناس، وتفضل ما بين مطرقة الحصول عليها والاستجابة لسُعارها.. وسندان مقاومتها والكف عنها.

٢. فقدان السيطرة

طول الوقت بتقول لنفسك إن فيه حدود مش هتتخطاها، وتخطاها، فيه حاجات مش هتعملها، وتعملها، فيه سقف لتصرفاتك وبتكسره، فيه مكتسبات ما ينفعش تخسرها، وبتخسرها، لدرجة إنك إنت نفسك بتتفاجئ من اللي بتقدر عليه!

٣. الخسائر

السلوك الإدماني شغال من هنا وخسايره شغالة بالتوازي معاه ما بتبطلش، من البسيطة ممكنة التعويض، للضخمة اللي مفيش أي حاجة في الدنيا ممكن ترجعها لأصلها، نفسية واجتماعية ومادية وروحية، وكل ما بتتورط أكثر في المستنقع، الفاتورة تزيد، والتمن يبقى أعلى مما كنت تتخيل، وتفكيرك في الرجوع بيبهت أكثر!

٤. الإنكار

لأنك مش قادر تبطل، فيتلجأ لحيل نفسية كتير عشان تحسن من وضعك وصورتك قدام نفسك وترخص لنفسك مواصلة السلوك الإدماني، زي إنك تعمم البلاء وتقول ما ناس كتير بتعمل كده مش أنا لوحدي، أو تمنطق الأمور وتطلع نفسك مضطر ومغلوب على أمرك وضحية، أو تلقي اللوم على غيرك وتتهمه بأنه السبب في اللي إنت فيه، أو تقارن نفسك بحد ثاني وتقول الحمد لله إنك أقل تورطا منه، أو تهون وتقلل من اللي بتعمله عموما وتشوف إنه ما يستحقش كل الدوشة دي، وإنه سلوك عادي وطبيعي مش إدمان.

ورغم الأدرينالين اللي بيحفّزه السلوك الإدماني والمتعة الوقتية وإثبات الذات والمخاطرة والنشوة، بيصاحب كل ده باكيذج من أسوأ المشاعر الإنسانية قاطبة: الإحباط، فقدان السعادة، الخوف، الاكتئاب، اضطراب الشخصية، نوبات غضب وهياج، عدم الرغبة في الفعل، الانعزال، الفشل الوظيفي، الإحساس بالذنب، احتقار الذات، وصولا للتفكير في القضاء على كل الشواكيش اللي بتدق في دماغك والناس اللي بتتخانق جواك ليل نهار بضربة واحدة: الانتحار.

والمرعب إن الإدمان مش قاصر بس على المخدرات، لكن مظلتها بتتسع عشان تطول كل حاجة في حياتنا تقريبا: إدمان علاقات، إدمان جنس، إدمان أكل، إدمان قمار، إدمان مواقع التواصل الاجتماعي...

وعشان كده مثلا، فيه علاقات مؤذية ما بتقدرش تتخلص منها بسهولة، لأنها ما بتبقاش علاقة عادية لكن إدمانية، ورفضك الاعتراف بالحقيقة دي هيخليها تستأسد وتقوى عليك وتصعب أكثر وتتعدد لحد ما تجيب أجلك!

لكن المٌحيي وسط الضلّمة دي كلها إن أيا كان نوع الإدمان ودرجته، فدايما في إيدك الخيار إنك تحول كل ده للنقيض وتتعافى من آثاره، وتبطل جري جري في طريقك للولا حاجة، وتقف وتلتقط أنفاسك، وتشوف إنت رايح فين، وتخلق سياق مغاير لحياتك، تكون فيه شخص أفضل.

في الأغلب لازم تستعين بمتخصص ينفذ معاك برنامج استعادتك من مملكة الظلام اللي استلبت روحك بدعم كامل من محبيك والناس اللي إنت فارق معاهم، لكن الأهم من الخطوة دي حقيقي: الاعتراف بحجم اللي بتعاني منه وعدم التعالي عليه أو الخجل منه أو التكاثر عن مداواته أو الاستخسار، أو تفضيل المسكنات عن الحلول الجذرية، إذ لا يمكن إجبار شخص على التعافي إن لم يرغب هو في ذلك، وافتكّر إن الموضوع عامل زي قرض البنك: كل ما هتزوج من القسط، مش هيختفي من تلقاء نفسه، لكن هيتراكم عليك وتزيد فوايده لحد ما يبقى يا الدفع يا الحبس.

ما تستناش لحد ما روحك تدخل بالكُلّيّة ورا القضبان!

()

لا خذلان لمن لا عشم له.

()

فلا تُبلغ القمّم بغير التخفّف مما لا يُفيد، ولا يُطال السبق بغير قسوة التقييم
وجرأة اتخاذ القرار.

()

وأحيانا ترتكبُ ذنبا كبيرا، ومع ذلك، لا يُوجعك قلبك، ولا تشعر بأي تأنيب ضمير،
ذلك لأن الله يعلم طبيّتك، وما يُصلحك وما يُفسدك، ولو أوجع قلبك لهذا الذنب
الآن، لفزعْتَ، وأحببْتَ، وتوقفتَ عن الحركة وإصلاح الأخطاء، وربما الحياة
نفسها، لأن جبلك غير قادرة على تحمل هذه المشاعر السلبية الآن، وغير
مدركة لكيفية التعامل معها، لذا ستأتي بنتيجة عكسية، فيؤخرُ الله شعورك
بالذنب، إلى مرحلة تالية، تكونُ فيها أكثرَ علما وخبرة وفهما لنفسك وقوانين الله
وفلسفة الصواب والخطأ، والدور التطهيري للمعاصي، فتتوب بحق، وتستخدم ما
هويتَ فيه وأسرفتَ على نفسك منه، نورًا لبلوغ مقاصد الشريعة، وسلما لارتقاء
سنام الحقيقة، فغرضُ الخطيئة ليس إحراق روحك، ولا ثقب إرادتك، إنما إنارتها
على بصيرة، وبطريقة عملية، وتثبيتك على الطاعة، بعد أن رأيتَ الجانب الآخر
المظلم، وعلمتَ أن روحك لن تالفه، ولم تُخلق للعيش في وحله.

()

هقول لك على حاجة كوميدية جدًا بالنسبة لي، وإن كان بعض الناس ممكن ما
يشوفوهاش كده.

الحكاية بدأت من وأنا صغير، أنا اتولدت أمّور أصلا، وبرنس في نفسي كده،
وشعري سايح ونايح -والله زمبئولك كده- وفجأة في مرحلة ما في الابتدائية،
سفينة فضاء تقريبا نزلت من كوكب بلاميطه، وعملت عليا تجارب ما، فملا محي
انغيرت، وشعري بقي خشن، وأصيبت عيني الشمال بالكسل، واهتزت الرؤية
قدامي شوية، والدي في الحقيقة ما قصّرش وراح لدكتور واتنين وعشرة، وعمل
كثير، بس لسه الدنيا ما كانتش اتقدّمت طبيا قوي، فعيني ما اتظبطتش،
واتضاف لده، إن الجفن حصل له ارتخاء عشان يحمي العين من أشعة الشمس،
والعين اتحرّكت شوية شمال، فيما يعرف بالحول، مع ضعفها بشكل كبير جدًا.

وفي الوقت اللي أهلي كانوا بيعتبروا دي كارثة أصابت طفلهم المدلل، أنا كنت
متصالح تماما مع شكلي، ومع ضعف عيني، وكنت بشكر ربنا إن فيه عين ثانية
شغالة وبتنور في الضلّة :)

ولما عملت نضارة، كنت مستكنيص قوي من شكلي بيها، صحيح كنت عامل زي
أي كائن فضائي يحترم نفسه وسط العيال، بس أنا كحسام ما كانش عندي أي
مشاكل، بالعكس كنت بحاول أقنعهم إني بشوف الحاجة 3 مرات، عين طبيعية
وعدستين، عشان كده أنا أشطر منهم كلهم لأنهم بيعتبروا الحاجة مرتين بس!

الحقيقة ما اتعرّضتُش لمواقف سخيّة أيامها كثير بسبب عيني، لأنني كنت شاطر في المدرسة، وبغشش العيال الواجب والامتحانات، وبكتب لهم جوابات غرامية للبنات اللي ماشيين معاهم (أيون، أنا أكتب وهم يمشوا :)) فعُدّت على خير.

لكن لما كبرت، وبقيت عريض المنكبين، خلال زيارة فاشلة للكويت للبحث عن عمل، وكيل مدرسة مصري، قرأ السي في بتاعتي، وشاف أوّل كتاب ليا، وسألني كام سؤال سدّيت معاه، وفجأة بص بتركيز قوي في عيني الشمال، وقال لي: متأسف مش هينفع عشان العاهة بتاعة عينك!

كانت أول مرة أسمع حد بيوصف اللي عندي بالعاهة! بلّمت شوية، وبعدين انتفضت وقلت له: لا، خالص مفيش مشكلة، الحمد لله إنها مش عاهة في مخي زي اللي عندك!

وسيته ومشيت.

المرّة الثانية، لما بنت زميلتي في شغل ما، بصت لي مرّة بتركيز، وقالت لي: تعرف؟ لو ما كانتش عينك دي مضروبة بالنار كده، كنت بقيت جان!

فبصيت لها بتحدي وقلت لها: بالعكس، ده هي اللي مخلياني جان، عشان هي اللي لغت انتباهك الأول، وخليتك تشوفي بقية حلاوتي ووسامتي!

لكن بصفة عامة، عمري ما ركّزت مع عيني ولا اعتبرتّها عائق عن أى حاجة: حبّيت، واشتغلت، وسافرت، واتجوزت، وخلفت، كفاءة يعني، بالعكس، كنت بنكت عليها طول الوقت، لما أخبط واحد إفيه، ويقفش، أقول له: أنا مش قصدك إنت، أنا قاصد اللي جنبك، ما إنت عارف إني أحول، وأضحك حقيقي من قلبي.

ليه بقول الكلام ده؟

عشان فيه ناس، مشاكلها الصحية أو الشكلية بتوقّفها فعلا، وتخلّيها تشعّر بالعجز والحرّج، حد أهبل يقول لهم كلمة كده ولا كده يتعقدوا، ويكتّوا في بيوتهم، العاهة يا صديقي في العقل والتفكير مش في الجسم، ولدينا بالفعل ما يكفي من مشاكل وتحديات، فمش ناقصة كمان المعاتيه دول.

والمرض أصلا مش عيب، ولا حاجة تتدارى بيها، ولا هو ميزة كمان، هو زيه زي غيره، مُعامل، عنصر، شيء من الأشياء الداخلة في معادلة الحياة.

ولو عندك عيب، أي عيب، اسخر منه، وبروزه، عشان تقطع عليهم السكة دي، وتصلح مع نفسك وكمل وأشرق، في النهاية، لما تتحقق، وتعمل اللي إنت عايزه وتستحقّه -وهتعمله مفيش كلام- كلهم هيمدوا أيدهم ويهنّوك -كرهًا أو طوعًا- لأن الناجح كل الناس بتحاول تقرب منه وتلمس منه نورًا.

السؤال المهم بقى: إيه اللي فكرني بكل ده دلوقتي؟

إنني النهارده، بعد سنين، قابلت الوكيل المصري بتاع الكويت ده على فيس بوك - عمري ما نسيت شكله :) - وعملت له إضافة، قبلها وهو مش عارفني، فدخلت عرّفته بنفسي وفكرته بالموقف الإنساني اللي عمله معايا، وبعدين قلت له: أنا ألفت ١٠ كتب، وأنشأت موقع لتعليم اللغة العربية وصفحة اكتب صح عليها أكثر من ٨٠ ألف متابع، وأنا بعين واحدة، تخيل بقى لو كنت بعدد اتنين عيون وصلحه، كنت عملت إيه في البشرية؟

وحطيت له الاسمايلي البرنس اللي بيطلع لسانه ده، وبعدين رزعته البلوك المتين :) (

قدمت استقالتني من أماكن كثير: كبيرة، وصغيرة، جوه مصر وبره مصر، ساعات في وجود خطة بديلة، وأغلب المرات بلا خطة على الإطلاق.

أوقات بيبقى عشان مش قادر أقدم تنازلات، وأوقات عشان مش مقتنع بمديري وشايف إنه بيلبسنا في الحيط وما عنديش ترف تضييع الوقت، وأوقات عشان وصلت لسقف الخبرة ولازم أتحرّك عشان ما أتكلّسش، وأوقات عشان مش متوافق مع البيئة المحيطة ووجودي بيغيّر طبيعتي وبيستنزفني، وأوقات عشان غياب التقدير أو سوء الإدارة.. وغيرها.

لكن القاسم المشترك الأكبر بين كل المرات دي: إنني ما كنتش خايف.

يمكن أول مرة بس إيدي اتَهزّت، ورجعت من قدام مكتب "الإتش آر" إلى مكتبي، وقلت أفكر ثاني. لكن بعد ما عملتها أول مرة، وشفت إنني ما غرقتش في البحر، والسما ما انطبقتش على الأرض، ولا اتشردت أنا وعيالي، بقيت أكثر قدرة على الحسم واتخاذ القرار.

والحاجة الثانية، إن ربنا عمره ما ضيقها أبدًا، بالعكس، كان بيفتح لي دايماً سكك غير متوقعة، ويسوقني لأبواب ما كانتش منظورة لي وأنا مش محتاجها. وفي كل مرة كان فيه درس قيم للغاية بتعلمه من الشغل ده، ثم من تركي ليه.

بصفة عامة: النوال ثم الترك، الوصول ثم المفارقة، الحيازة ثم فقدان، درجات سلم بنطلعها، وكُشوف وفتوح بفتح لنا، وتجليات بتتنزل علينا، عشان نكتمل ونرتقي، ونُكمل قدرنا، ونتواصل مع ذواتنا الحقيقية، ونعرف ماهيتها، وحدود تحملها وأفاق انطلاقها.

بمعنى آخر: هي محن ظاهرها العذاب وباطنها كامل الرحمة والوداد، أو كما قال الإمام علي: (اطلبوا الحاجات بعزّة فإنّ الأمور تجري بمقادير).

فلا تجزع.

(

كانت أُمي تقول لي، وأنا أطبع قبلة على يدها في المساء: - "تصبح على فرج

بلا ضيق".

فأتعجب وأقول في نفسي: أليس الفرج كافيًا!

حتى أدركت أن "بلا ضيق" أهم من الفرج نفسه، إذ لو كان فرجًا فقط، فربما ينتهي بعد فترة، مُخلفًا ضيقًا أكبر مما فرّجه، وحزنًا على انقضائه يفوق سعادة حلوله، أما إذا كان بلا ضيق، فهذا يعني أنه ممتد ودائم ومستمر.

فبهجة الأشياء إنما تكون في ديمومتها واستمرارها حتى نمتلئ بها، لا في تحققها ثم انفلاتها من بين أيدينا!

()

لما بتروح مشوار أول مرّة بتحس الطريق طويل، ويمكن في نصه بتفكر ترجع، لكن لما بتوصل بتشوف كل حاجة بحجمها الطبيعي وبتقدّر حجم العقبات والتحديات بشكل مختلف، وتكتشف سبل مواجهتها، ويمكن بتضحك على نفسك عشان تصوراتك السابقة ومخاوفك اللي طلعت فشك، وهي دي قيمة التجربة والمعرفة عموماً.

ولو عايز الحق: فيه حاجات كتير بتضيع مننا، مش عشان إحنا مش قدها، لكن عشان بنكسل، وبنأجل، وبنماطل، وبنهئ ونمئ، وما عندناش استعداد نتعب، لحد ما العمر يروح فعلياً وإحنا لسه بنفكر نعمل ولا ما نعملش!

والحقيقة إننا نقدر نعمل كل حاجة، ونخطي أي صعب، فقط لو آمنا إننا نستاهل حياة أفضل ومساحة أكبر، وجديرين نبقى مبسوطين.

ولو كنت لحد النهارده ما قابلتش اللي يقولك إنك تستحق، فأنا بقولها لك أهو من قلبي وبيقين تام ومن قلب التجربة: والله العظيم إنت تستحق، فالحق اللي باقي منك.

()

اللهم امنحنا قوة التخلّي، ويقين التّرك، وإرادة المُضي قُدّمًا، وعصمة النظر للخلف، وبراح الفرص الثانية.

()

لا تؤجّل حزن اليوم إلى الغد.

()

تتوالى الأحداث وتتابع المواقف -في لحظة ما- لتُوصل لك رسالة بعينها، فإن فهمتها استبرأت لنفسك ووفرت عليها مخاضات تالية. وإن صُمّت روحك عنها -لذنب اقترفته أو محنة كُتب عليك خوضها- أوشكت على تكرار الأخطاء نفسها، ونيل المواجه نفسها، حتى يكتب الله لك قيامةً، أو يهب لك بصيرةً، أو يُقيّض لك

قلب محب يُبصرُ لك، ويرفع معك، ويتلقى عنك، فإذا كلاكما -ظهرًا لظهر- يعبر نحو النور.

()

الخطيئة -كالطاعة- سفينةٌ لبلوغ العطية، غير أنها دخول من باب الرعب والقنوط والمذلة والانكسار والمغامرة والتثبّت والتجريب والكِبَر والتلبّيس واختبار المتاحات ورؤية كرامات الستر والإمهال والحلم والتروّي.

من ركبها لم يأمن حتى ينزل. ومن نزل لم يأمن حتى يُباعد بينه وبينها باليقين. ومن باعد لم يأمن حتى يقيم في سفينة الطاعة. ومن أقام، لم يأمن حتى يرسو قلبه في المحيية والتسليم. ومن رسا لم يأمن حتى يستردّ الله وديعته. ومن استرد لم يأمن، حتى يُختم له بالمرور إلى النعمة.

()

فإذا رُزقتَ الفهمَ والتسليمَ، وحُرمتَ الكِبَرَ وسوءَ الظن، رأيتَ في المنع عينَ العطاء.

()

فأنت لا تدري.. لعلّ الله يخفف الجراح بالجراح.

()

لا يُهم الطريق إذا عرفت الوجهة، ولا تُهم النهاية إذا كان هناك من ينتظرها معك.

()

لا تُباهِ بقوةٍ لم تختبرها، ولا ابتلاءٍ لم تجتزه، ولا شرفٍ لم يُوضع على المحك، ولا صبرٍ لم تبلغ منتهاه، ولا عصمةٍ لم تُحرق في أتون الشهوة.

كل أولئك الذين سقطوا.. كانوا يردّدون -تماما تماما- نفسَ كلماتك، قبل أن تقودهم يدُ الله إلى التجربة، فيظهر لهم -قبل غيرهم- كيف ضلّ سعيهم في الحياة وهو يحسبون أنهم يُحسنون صنعا!

فاحذر.

()

10 بديهيات لا بد من التذكير بها كل شوية

1. إحنا مش واحد، لا تربيةً ولا ثقافةً ولا نضجًا ولا إحساسًا، عشان كده مفيش كتالوج جامع مانع للعلاقات الإنسانية، مفيش خطة عمل موحّدة نمشي عليها كلنا بشكل حصري، فنوصل للنتيجة نفسها كل مرة.

2. مهما كانت طبيعة الراحل جامدة والعملية طاغية عليه، الحب "الحقيقي" يحرّكه، ويخليه يتغير ولو جزئياً، أو على الأقل يحاول، لكن لو ده ما حصلش، يبقى ما حبّش، هو -ببساطة- بيدور على صفقة. هو "يدّعي" إنه بيحب، والطرف الثاني يوفر له منافع (جسدية - عاطفية) متحددة كويس قوي قبل ما يدخل برجله الشمال.

3. حدسنا -خصوصاً في المصايب- بيبقى سليم 100%، بس شواغل الدنيا وعدم تصديقنا لنفسنا وانعدام ثقتنا وخوفنا من تغيير اللي اتعودنا عليه هو اللي بيثوشر علينا، ويخلي عنيّا في عين العلامات والنذر ومع ذلك نعمل مش عارفينها ولا فاهمينها!

4. العلاقات كلها كلها مرهقة، وعازية طاقة نفسية مرعبة، أغلبنا ما عايش يملكها. عشان كده ممكن بسهولة نضيع فرصة حقيقية من بين إيدينا، ممكن في نص الطريق نرجع من ثاني، ممكن قبل النهاية بخطوتين نقرر نقعد ونستريح ونحلف ما نتحرك!

5. إحنا مش ناقصين سحلة، وماشييين بعلاج فعلياً. فاللي عايز يحب بجد وبيقيم علاقة صحية، لها بداية وحبكة ولحظة تنوير، أهلاً وسهلاً، واللي عايز يهرّج أهلاً بيه برضه والله، بس يقول من الأول يعني، بلاش شغل تالته تالت ده والحب الحب الشوق الشوق، ويطلع البواب في الآخر هو زعيم العصاة!

6. فيه ناس بتستمر في العلاقات على سبيل الاستخسار، مش هالين عليها تفقد المشاعر الحلوة اللي بتأخذها، خصوصاً إن مفيش بديل، أو هياخدوا وقت على ما يلاقوا غيرها، فيبرضوا بالمتاح لحد ما ربنا يفرجها. النوع ده لو صادفته اضربه بالجزمة على بقله.

7. مفيش حد يفضل على حاله، عنده تحبّ لا إرادي 24 ساعة، ساعات بنمل وساعات بنزهد وساعات بنتعب وساعات بنشك، مع ذلك، حتى لما بيحصل تغيير، فيه ثوابت. فيه مساحات بتفضل طريّة وريانة. فيه أحاسيس ما بتتغيرش. أما اللي بيتغيروا تماماً دول كأنك ما تعرفهموش، فملبوسين، وولاد كلب، وجايين يطلعوا عنيّا وبعدين يسيبونا لما مزاجهم يهفهم!

8. مش معنى إنك واقف على رجلك وبتاكل وبتشرب وبتروح شغلك وساعات بتضحك، إنك ما كنتش صادق في تجربتك اللي انتهت! كل اللي بيبصوا لك ومستغربين صحتك، ما بيجبولكش الخير، وكان نفسهم ضهرك يتقسم نصين، عشان تبقى فاشل وتافه زيهم، صمودك بيخرج خنوعهم وهوانهم على أنفسهم. فما تبصلهموش، مفيش أي علاقة بين انتهاء التجارب والانهيّار والموت جوعاً وكمداً وقطع الشرايين! إنت صح.

9. الحب الحقيقي ما بيتعوضش، بتسيبوا بعض عشان العند أو الغباء أو قلة النضج وتفتكر إنك هتلاقى ست ستها، وتفتكر إنها هتلاقى سيد سيدك، وفي الآخر

إنّو الاتنين بتفضلوا طول حياتكم تحاولوا تستعيدوا لحظة واحدة من شعوركم مع بعض، وتستنسخوا كل حاجة كانت بينكم. فماتتغابوش.

10. الحياة دار تنعم وتمتع برحمة الله وفيض خيره لا دار نكد ومكابدة وشقاء وخذلا،

()

٧ خطوات للتخلص من الابتزاز العاطفي

الابتزاز العاطفي بيحصل لما حد عارف معزته عندك، واستماتتك في سبيل إرضائه، يزقك في اتجاه قرار أو رد فعل معين، حتى لو مش على هواك، أو هيضر مصالحك، أو مش مستعد له دلوقتي، وهو بيعمل ده بأكبر قدر ممكن من اللطف والحميمية المبطنة بتهديد خفي بالتخلي عنك، أو حرمانك من ميزة معينة، أو تغيير طريقة تعامله معاك، لو ما نفذتش اللي طلبه!

المبتز بيبقى فاهم نقاط ضعفك كويس، والحتت اللي يدخل منها، واللحظة الملائمة لتسويق طلبه، وتون الصوت ولغة الجسد اللي هيستخدمها ساعتها، عشان يحاصرک ويحقق أفضل نتيجة ممكنة في أسرع وقت مقابل زيرو مقاومة وإحساس مرعب بالذنب حال مخالفته!

والمدهش إنه ساعات بيعمل ده بدون وعي حتى، ولا نية مبيتة في إيدائك، بالعكس ممكن كمان يبقى فاكّر إن الموضوع ده لمصلحتك، زي الأم اللي بتضغط على بنتها عشان توافق على عريس شايفاه لقطة -رغم إن البنت مش عايزاه- فبتقول لها إنها عايزة تفرح بيها قبل ما تموت وما عادش في العمر بقية!

وصعوبة الموقف عادة بتنبع من إن المبتز بينثر الكثير جدا من الضباب حوالين مطالبه، ويحيطها دائما بأكبر قدر من العاطفة عشان الأمور تلبس عليك لدرجة إنك تتشكك في قناعاتك ويختلط عليك الصح والغلط وتنهار دفاعاتك فتخضع لمنطقه وتستجيب لاستهوائه تماما!

وأول خطوة لمكافحة الابتزاز ده، هو إشعال النور وتبديد الضباب اللي بيحدثه المبتز، وقياس الأمور بشكل عقلي واعى يضمن الإحاطة بجميع الملابسات، وفقا لاستيعابنا إحنا وتقديرنا مش تبعاً للصورة اللي بيمررها لنا.

الخطوة الثانية استيعاب إن خضوعنا للابتزاز في موقف أو بيئة معينة ولو لمرة واحدة، هيسرّسب فيروس الاستسلام لاستجاباتنا العصبية، ويوهن عزيمتنا ويضرب مفك في إرادتنا، فيبرمج الخضوع للابتزاز كرد فعل طبيعي وتلقائي في شخصياتنا، لدرجة إننا ممكن نعمل ده بعد كده من تلقاء نفسنا ومن غير أي

ضغط من أي حد!

الخطوة الثالثة اليقين بأن الخضوع للمبتز مش هينهي دايرة طلباته، بالعكس ده بيبقى مكافأة ليه هتدفعه لتثبيت سلوكه الاستهوائي بحقنا والطمع في مساحات أكبر من التحكم في قراراتنا، وصولا لتحويل استجابتنا من فضل منّا ومجاملة إلى فرض عين وأمر واجب النفاذ وإلا استحققنا العقوبة!

الخطوة الرابعة إننا نمرر له معلومة إن الخيارات الخاطئة لو تمت بدعم منه، وما حقتلناش الإشباع اللي كنا متوقعينه منها، فعلاقتنا به هتتأثر جدا جدا وصولا إلى إنها ممكن تنتهي حرفيا، ويخسرنا للأبد!

الخطوة الخامسة تذكر إننا دائما اللي بندفع التمن لوحدنا في النهاية، مش حد ثاني، ووقت الجد ما بنلاقيش -غالبا- إيد نساعد عليها، ما يعني ضرورة الانحياز للخيارات اللي إحنا على يقين تام وكامل من قدرتنا على تحملها بمفردنا تماما وحتى آخر لحظة!

الخطوة السادسة، لازم نشوف إيه فينا اللي بيشجّع الآخرين على ابتزازنا، ونقفل الحنفية اللي بتجذبهم لينا وتدي لهم إحاء إننا ممكن نقع تحت سطوتهم كل مرة.

الخطوة السابعة، إننا نخلق لنفسنا نسق قيمي ومنظومة سلوكية، تكون مرجعيتنا الأولى حال احتياجنا لأخذ قرار، حاجة كده زي سيستم أو بروتوكول نستخدمه دائما في أي موقف عشان يكشف لنا الخبايا والمميزات والعيوب فيوفر علينا وقت ويزود فرص اختياراتنا الصح.

وفي النهاية لازم التأكيد على إنك هتعيش حياة واحدة بس، فما تصرفهاش بقشيش على حيوات الآخرين.

()

10 فرائض غائبة قد تنقذ حياتك

١. مجاهدة النفس مش صلاة وصوم بس لكن إننا نتعلم نطببط على روحنا وما نعيش في خناقة طول الوقت، ونتخفف من كل الأثقال اللي لازمين نفسنا بيها على طول وشايلنها فوق صهرنا دون أي مبرر أو شكرانية من حد.

٢. مفيش لازم، مفيش مفروض، كل حاجة بأوان، واللي ما اتحققش النهارده يتحقق بُكره، والعلاقات اللي انتهت من حياتنا لا هم خسروا ولا إحنا خسرنّا، لأن كلنا -رغم الألم- كسبنا حكمة التجربة وعرفنا نفسنا على حقيقتها وهي دي المنحة الكبيرة اللي لازم نتعلم نقدرها ونستخدمها نور نعدّي بيه اللي باقي من حياتنا.

٣. مشكلتنا الكبيرة إننا ما بنسامحش نفسنا ولا بنعطف عليها، حتى لو ادعينا العكس طول الوقت، ما بنفردش طولنا ونسيب ادينا ونعوم، لكن بنقاوم بغباء

وعنجهية فبنغرق أكثر! خف تعوم.

٤. مفيش حاجة اسمها القضاء على الخوف، ده الفخ اللي بيستنزف أعمارنا وطاقتنا وبيفتحنا على فراغ لا متناهي، وبديلا لده لازم نتعلم نعيش معاه ونصاحبه ونفهم إنه طبيعة وليه دور صحي في إبقاء أعيننا مفتوحة دائما وخطواتنا أكثر حذرا.

٥. للحياة ضريبة لا بد أن ندفعها: صحة، مال، خذلان، فقد، لكن فيه مقابل برضه لا يمكن إغفاله -ولو كان وقتيا- قوامه الدفا والحب والخبرة والنضج والمعرفة، فماتخليش التمن ينسيك الاستمتاع بالمقابل.

٦. أنت حقا جميل كما أنت، ولك دور في الحياة، وتستحق السعادة، أي شخص/ شيء/ عمل لا يقدم لك هذا، ليس ملائما لك، ربنا لم يخلقنا في الحياة لاستعراض قوته، إنما للتعلم بنعمه ونوال رحمته في النهاية لو تحركنا دون إفراط أو تفريط، ومن لم يدخل جنة الدنيا لن يشم ريح جنة الآخرة.

٧. إنت بتكبر كل يوم وبتتغير، واللي كان بيناسبك امبارح ممكن ما يناسبكش بكره، مش لأنك واطي ولا عبيط، لكن لأن ده ناموس الكون الأعظم، فاصبر على اختياراتك، وفلترها، واتعلم يبقى فيها بعد مستقبلتي، ومرونة، عشان ما تعطلش أو تلاقى نفسك لابس في اختيار لا عاد ينفع يتغير ولا عاد ينفع تكمل معاه!

٨. الوحدة مش شيطان، وأحيانا بتكون أفضل من صحبة التافهين والمؤذنين ومعدومي البصيرة والمنتفعين، صحيح ماهياش أعظم حاجة في الوجود، لكن كمان مش الأسوأ، وخلالها تقدر تلمس الحثت المدارية فيك، وترتب البيت من جوه بعيد عن تشتيت الزحمة والدوشة والخيارات البراقة الزائفة.

٩. الصداقة، أي صداقة، مؤقتة وبنبت ظروفها وفترتها ومصلحتها، فما تنزلش بتقلك على أي علاقة، وما تبروزش أشخاص ولا تسبح بحمد مواقف ولا تبني جبال أوهام وتوقعات، استقبل المنة بالحمد والشكر، وصون العشرة بالصبر والتقدير، لكن خلي زرار الطوارئ تحت إيدك دائما، عشان لما المصلحة تحرق الأخضر واليابس، والطبع يغلب ويكشف الحقائق، تقدر تهرب خفيف خفيف.

. إحنا عايشين في لعبة كراسي موسيقية على كبير قوي، القاعد النهارده واقف بكره، والواقف قاعد، واللي تحت الضوء هيضلم والمضلم هينور، فحوش من كل الحاجات الحلوة اللي بتقابلك في حياتك وما تستهلكاش كلها في لحظتها، خلي ليك دائما رصيد خفي في مكان، قلب، صندوق ذكريات، عشان لما تشك، تلاقى يقين، ولما تقع تلاقى إيد، ولما تعيط تلاقى منديل، وما تزعلش من اللي باع وفهم غلط وخذل وأذى وأساء، ده رصيده اللي حطه بإيده في خزنة العوض، ولن يلبث أن يصرفه بالفوايد كلها بعدين.. وإنت بتتفرج.

آخر سطر

إحنا على الأرض، ومفيش علاج لده، ولا وسيلة لرفع إيدينا في وسط الماتش
عشان نخرج من الملعب ونبدّل مع حد تاني، مهما تعبنا وجبنا آخرنا واتصابنا
واتوجعنا. لازم نفضل نجري ونجري ونجري لآخر دقيقة، ونبذل اللي نقدر عليه
عشان نحرز كل الأهداف الممكنة!

هل لازم تكون الرحلة صعبة؟

للأسف آه، وصعبة جدًا أحيانًا، ومؤلمة، لأن غرضها النهائي تنقيتنا من الشوائب،
واستخلاص جوهرةنا الحقيقي، زي الذهب اللي ما بيتشكّلش غير بالنار، لكن..
حتى الأوقات الصعبة في وسطها لحظات راحة بنسكن فيها، ونعرف سرّ وجودنا،
وتتبدّى لنا علامات ونُذِر للتصرفات اللي لازم نعملها، والطرق اللي لازم نمشي
فيها، لو قريناها صح هنوفر على نفسنا كثير، ولو عاندنا وتعالينا وما شفناهاش،
أيامنا العسيرة هتزيد أكثر وأكثر.

وفي وسط الرحلة، الحب الصادق.. الحقيقي.. الرحيم، هو سُترة النجاة الوحيدة
من الغرق في خضم كل شيء: الدنيا والشهوة والظلم والجبروت والغرور
والإدمان والبعد عن ربنا والخذلان والخوف، الدقة الوحيدة اللي ممكن تصد عنا
ضربات الحياة مهما كانت عفيّة، عشان كده لازم يكون هو هدفنا الأهم من
الرحلة، ولو وصلنا له، نعضّ عليه بالنواجذ، لأنه اسم الله الأعظم الذي إذا نودي
به أجاب.

الحب هو الله نفسه.

حسام

مدينة العبور، 10 من ديسمبر 2018

عن الكاتب

حسام مصطفى إبراهيم

كاتب وصحفي ومحرّر ديسك ومدقق لغوي ومدرب صحافة ولغة عربية
صاحب مبادرة اكتب صح، ومستشار اللغة العربية بوزارة البترول، ومدير تحرير
بالبرنامج الصباحي في قناة dmc news

صدر له:

1. أسود لامع بطريقة غادرة، دار تشكيل
2. لديّ الكثير جدا لأقوله لك، مقالات، دار تشكيل.
3. بتوقيت القاهرة، رواية، دار دؤن.
4. جرّ شكل، ساخر، دار المصري.
5. اللحاق بآخر عربة في القطار، قصص، دار اكتب.
6. يوميات مدرس في الأرياف، ساخر، دار اكتب.
7. من غلبي، ساخر، دار كيان.
8. قراءة في كف الحب، أدب رسائل، دار أجيال.
9. لولا وجود الحب، أدب رسائل، دار أجيال.
10. نعيق الغراب، مختارات قصصية ونقد أدبي، دار اكتب.

للتواصل

Hosammustafa_it@yahoo.com

فيس بوك

facebook.com/HosamMostafaEbrahim